

JNUHUN VAHA NI TEE SAN LUCAS

¹ Cuehē tēe ni cajicu de ni catee yúcún de historia Jesús, t̄acá jniñu jeē ni sáha ya ni cajito yó. ² Te ni catee de t̄aca jnúhun jeē ní cacastūhun ñáyuu nuū yō, jeē ní cajito i jniñu yúcuan nde ná ni quejéé, te ni canacani i jnūhun ya. ³ Te máá ná, suni ni nanducú yúcún ná t̄aca jnúhun ya, nde nuū ní quejéé. Te ni jeni ni na jéé suni íyó váha jeē t̄ee cájí ná t̄aca jnúhun yáha núū ní, amigo Teófilo. ⁴ Te súcuan te cuni ni jéé iyó ndāā t̄aca jnúhun jeē ní cacastūhún i nuū ní.

Jeē ní cachi ndajéhé jeē cacu Juan t̄ee scuándute

⁵ Tiempo jeē ní cuu Herodes rey región Judea, te ni iyo ñin sutū ñayuu hebreo, naní de Zacarías, te grupo Abías cúu de. Te ñasihí de naní ña Elisabet, te suni s̄ehe yucún maá sūtū Aarón cúu ña. ⁶ Te ndindúú de cahiyó ndāā de nuū Yaā Dios, te ndāā váha cásqucu de jniñu ndácu ley maá Jítoho yō Yaā Dios, cájito t̄aca ñáyuu. ⁷ Te tú s̄ehe de íyó, chi ñahan númá cúu Elisabet, te je jéhnu ndindúú de.

⁸ Te ñin quiv̄i te jéjníñu Zacarías nuū jniñu jeē cúu de sutū nuū Yaā Dios, chi ni quee quiv̄i jeē ndívi grupo de. ⁹ Te ni casáha de sorteo, nájnūhun íyó costumbre sutū. Te ni sáha tocar Zacarías jeē quiv̄i de ini cuarto ñi templo Jítoho yō Yaā Dios, te cahmu de s̄uje cūtú. ¹⁰ Te hora jeē cayú s̄uje cūtú, te t̄aca ñáyuu cuehē cáhiin i fuera, cájicān tahu i. ¹¹ Te ni cane ñin ndajéhé maá Jítoho yō nuū de, ñin ya lado váha altar nuū jéhmu de s̄uje cūtú. ¹² Te ni cunéé ni Zacarías ni jito de nuū yā, te yōhyo ni yūhú de. ¹³ Te ni cahān ndajéhé un jíin de:

Zacarías, ma yūhu ró, chi je ni chihi Yaā Dios cuenta jeē ni jíicān tahu rō. Te ñasihí ró Elisabet, scácu ña ñin s̄ehe

yí, te snání ró i Juan. ¹⁴ Te yōhyo cusī ni rō. Te cuehē ñayuu cusī ni jeē cácu i. ¹⁵ Chi kujéhnú sēhe ró sáha máá Yaā Dios. Te ma cóho i vino ni ndixi cuí. Te cunuú máá Espíritu Santo jíin i, nde ná tu cacu i. ¹⁶ Te sáha i jeē cuehē ñayuu nación rō Israel ndīvícoo i nuū Jítóho i Yaā Dios. ¹⁷ Te xīhna gā Juan quiji nacani jnūhun Jítóho yō Jesús, te sáa te quiji ya. Te sáha i nájñūhun ni sáha Elías, tēe ni nacani jnūhun Yaā Dios jenahán, te coneváha i poder jeē nácani i jnūhun, nájñūhun ni coneváha Elías. Te sáha i jeē tāca tátá ndumaní de jíin séhe de. Te suni sáha i jeē ñayuu níhni ni cuatáhú i nuū Yaā Dios, nduu i ñayuu ndaā. Súcuan sátūhva i ñayuu návāha candíje i máá Jítóho yō jeē quíji ya. Achí ndajéhé.

¹⁸ Te Zacarías ni cajñūhún de ya:

¿Nde se cucáhnú ni na núu jendaá cúu? Chi tēe jéhnú cúu ná, te suni jéhnú ñasíhí ná, áchí de.

¹⁹ Te ni cahān ndajéhé un jíin de:

Máá rí cúu Gabriel, te íne ri nuū Yaā Dios, jejníñu ri nuū yā. Te ni tají yá ruhū vēji ri cahān rī jíin ró, te nácani ri jnūhun vāha yáha núu rō. ²⁰ Te jeē tu ní cándíje ró jnūhun ni cahān rī, te cuñíhín ró, te ma cúu cahān rō, chí nde na cácu sēhe ró. Te squícu nahín jnūhun cáhán rī yāhá, na queé quivī, achí ndajéhé.

²¹ Te ñayuu cáhīin ichi fuera, cándetu i Zacarías, te cájeni ni i na vé ni cuu jeē cucuéé de ini cuarto īi templo.

²² Te nuū ní quenda de, te tuá ni cúu cahān de jíin i. Te ni cajecūhun ni i jeē ini templo ni jito ndijin de ĩn jeē ni stéén yā nuū de. Te máá seña na ni sáha de nuū i, chí ni cuñíhín de.

²³ Te nuū ni jínu quivī ni jejníñu de ini templo, te cuanuhun de vehe de. ²⁴ Te ni cuu jecu quivī, te ñasíhí de Elisabet ni jecūhun sēhe ña. Te ni ĩyo ña vehe ña uhūn yoō jeē tuá nde ní jéhén ña. Te jéni ni ña: ²⁵ Súcuan ni sáha

máá Jítóho yō jíín rí, te ni tejiyo ya jnūhun jeē cúcanu rí nuū ñáyuu jeē tú sēhe ri, jéni ni ña.

Jeē ní cachi ndajéhé jeē cacu Jesús

²⁶ Te nuū iñú yoō, te ni tají Yaā Dios ndajéhé yā Gabriel, ni jehēn yā ñn ñuu naní Nazaret, ndañū Galilea. ²⁷ Te ni jehēn yā nuū ñn sūchi sñí nání María. Te je ni cundaā jeē quijnáhan ña jíín ñn tēe nání José, te sēhe yucūn rey David cúu de. ²⁸ Te ni quívi ndajéhé un núū ndeé ña, te ni cahān yā:

Tandii, nacā ndetū cúu ró. Chi máá Jítóho yō Yaā Dios iyó yá jíín ró, te ni sáha ya jeē yóhyo ndetū gā cúu ró núū tāca gā ñahan, áchí yá.

²⁹ Te nuū ni jíto ña nuū yā, te ni cunéé ni ña jeē súcuan cáhán yā, te jéni ni ña naun cáhán yā súcuan jíín ña. ³⁰ Te ni cahān gā ndajéhé un jíín ña:

Ma yūhu ró María, chi ni sáha Yaā Dios jeē váha jíín ró. ³¹ Te jecūhun sēhe ró te scácu ró ñn sēhe yíí, te snání ró i Jesús. ³² Te kujéhnu i, te conaní i Sēhe Yaā kujéhnu téyí. Te máá yá jeē cúu ya Jítóho yō Yaā Dios, sáha ya jeē cuu i rey, nájñūhun jíí i David ni cuu de rey. ³³ Te níí cáni ndacu i jniñu nuū ñáyuu nación Israel. Te ma ndíñi cuiñi jeē ndácu i jniñu. Achí ndajéhé.

³⁴ Yūcuán na te ni cajñūhún María:

¿Ndese coo jeē ni cáhān ní? Chi ná tu coo yíí ná, áchí ña.

³⁵ Te ni cahān ndajéhé un:

Máá Espíritu Santo quiji siquī rō, te poder maá Yaā kujéhnu téyí sáha ñn jniñu jéhnu jíín ró. Te jeē yúcuán máá súchi íi jeē cácu, quíñi cuenta i nuū Yaā Dios, te cahān ñayuu jeē Séhe Yaā Dios cúu i. ³⁶ Te suni cástūhun rí nuū rō jeē jnáhan ró Elisabet, suni scácu ña ñn sēhe vēsú je jéhnu ña. Te vijna íyó íñū yoō jeē tuá cácahān ñayuu jeē

cúu ña ñahan númá. ³⁷ Chi ndihi-ni cuu sáha Yaā Dios, te tu íyó ni ñin jeē ma cúu sáha ya, achí ndajéhé un.

³⁸ Yūcuán na te ni cahān María:

Cuu núu súcuan, chi sáha ná táca jniñu ndácu Jitoho yō Yaā Dios, te na cóo jíin ná nájnūhun ni cachi ní, áchí ña.

Te máá ndajéhé un cuáhān-ni ya.

Jeē ni jécondēhé María Elisabet

³⁹ Te ni cuu jecu quivī, te yachī cuahān María, ni caa ña yucu cuahān ña ñin ñuu región Judea. ⁴⁰ Te ni jinū ña vehe Zacarías, te ni cahān ña jíin Elisabet. ⁴¹ Te nuū ní jini Elisabet jeē cahán María jíin ña, te sūchi ñúhun chíji ña ni canda-ni i. Te ni cunuú Espíritu Santo ini anuá ña. ⁴² Te ni cahān jee ña:

Ni sáha Yaā Dios jeē yóhyo ndetū gā cúu ró núu tāca gá ñahan, jíin jēe yóhyo ndetū sēhe ró. ⁴³ ¿Te ndese cúu jeē ní quee naná máá Jítoho rī nuū rī? Chi tu cújéhnū cuiñi rī. ⁴⁴ Chi jeē ní jini-ni ri jnūhun ni cahān rō jíin rí, te sūchi ñúhun chíji ri ni canda i jeē cúsiñ ni i. ⁴⁵ Te nacā ndetū rō jeē ní candíje ró, chi squícu nahín tāca jnūhun ni cahān máá Jítoho yō jíin ró. Achí Elisabet.

⁴⁶ Yūcuán na te ni cahān María:

Cáhán rī jeē cújéhnū ndasí máá Jítoho yō Yaā Dios,

⁴⁷ te cúsiñ ni rī jíin Yaā Dios, Yaā jnáma ruhū.

⁴⁸ Chi ni sáha ya cuenta ruhū, vésú tu cújéhnū ri.

Te na squícu ri jniñu ndácu ya.

Te nde vijna te tāca ñáyuu jeē nácacu, cahān i jeē yóhyo ndetū rī.

⁴⁹ Chi Yaā jñí ndihi poder, ni sáha ya jniñu jéhnū jíin rí.

Te Yaā iī ndoo cúu ya.

⁵⁰ Te nñí cáni cundáhú ni yā tāca ñáyuu ndíso iyo nuū yā.

⁵¹ Ni sáha ya jniñu jéhnū jíin poder yā,

chi ni scúnu ya ñáyuu casándúxí máá,

⁵² te ñáyuu cácujeñu, ni quende ya jeē cújéhnū i.

Te ñayuu ndahú chi ni sajuhnu ya i,

⁵³ te ñayuu cájiī sōco ni jēhe ya jeē cáji vāha i.

Te ñayuu cucá ní natajī yá i súcuan-ni.

⁵⁴ Te ni chindéé ñáhán yá yohó, ñáyuu nación Israel, jeē cácuu yó mozo yā,

te tu náā ni yā jeē cundáhú ni yā yohó.

⁵⁵ Chi súcuan ni jejnūhun ya nuū tāca jíi yō,

nuū Abraham jíin táca yúcūn de jeē cóo ní cáni.

Achí María.

⁵⁶ Te ni condee ña jíin Elisabet nájñūhun unī yoō.

Yūcuán na te cuanuhun ña vehe ña.

Jeē ní cacu Juan tēe scuándute

⁵⁷ Te ni jinū quivī jeē scácu Elisabet sēhe ña, te ni scácu ña ñin sēhe yí. ⁵⁸ Te tāca ñáyuu ndeé yajni jíin ña jíin táca jnáhan ña, ni cajini i jeē yóhoyo ni cundáhú ni Yaā Dios ña, te ni jengoo i ni cacahān i jñūhun sñi ni jíin ña. ⁵⁹ Yūcuán na te nuū uná quivī jeē ní cacu i, te ni jengoo ñayuu ni sáha i circuncidar sūchi yíquín un. (Te yūcuan cúu ñin jñunī nuū yiqui cúñu tāca sūchi yí hebreo jeē steén jeē cácuu i ñayuu Yaā Dios.) Te snání i sūchí un síhví tátá i Zacarías nuú. ⁶⁰ Te ni cahān naná i:

Ma cúu, chi Juan conaní i, áchí ña.

⁶¹ Te ni cacahān i jíin ña:

¿Te naun? Chi tú ni ñin jnáhan ró nání súcuan, áchí i.

⁶² Yūcuán na te jíin seña ni cacajñūhún i tátá sūchí un ndese cúní de jeē conaní i. ⁶³ Te máá de ni jicān ñin tutu,

te ni tee de: Juan conaní i. Te tāca ñáyuu un ní canaa ni i cájito i. ⁶⁴ Te ni nduvāha Zacarías jeē ní cuñhín de, te ni quejéé de cáhán de jeē yóhoyo vāha Yaā cúu Yaā Dios.

⁶⁵ Te tāca ñáyuu ndeé yajni jíin de, yóhoyo ni canaa ni i. Te ní yucu región Judea ni jitē núu tāca jñūhun yáha jeē súcuan ni cuu. ⁶⁶ Te tāca ñáyuu jeē ní cajini jñūhun, ni quejéé i cánacani ni i, te cacajñūhun jnáhan i:

¿Ndese coo na cuéhnu sūchi yáha? áchí i.
Chi máá Jítóho yō yōhyo ni sáha ya jeē váha jíin i.

Jnūhun luu jeē ní nacani Zacarías

⁶⁷ Te tátá i Zacarías ni cunuú Espíritu Santo jíin de, te ni nacani de jnūhun ni steén Yaā Dios nuū de:

⁶⁸ Yōhyo vāha Yaā cúu máá Jítóho yō, Yaā Dios yohó ñáyuu Israel,
chi ni quiji ya nuū yō jeē cácuu yó ñáyuu yā, te ni jnama ya yohó.

⁶⁹ Te ni jeni ya iin Yaā iyó poder jeē jnáma ya yohó, te Yaā ún cacu yucūn mozo yā rey David.

⁷⁰ Chi súcuan ni jejnūhun ya, ni cacahān tāca tée ndoo ánuá jeē ní canacani de jnūhun ya jenahán.

⁷¹ Chi ni cacahān de jeē jnáma ya yohó núū jeē cájito uhū yohó, jíin núū jeē cáquitī ni nuū yō.

⁷² Chi ni cundáhú ni yā tāca jíi yō jijnáhan, te tu ní náā ni yā contrato iī yā.

⁷³ Chi suu un ní jejnūhun téyí yá nuū jíi yō Abraham,

⁷⁴ suu jeē jnáma ya yohó núū ñáyuu cájito uhū yohó, návāha cuajníñu yó núū yā, te ma yūhu yó i.

⁷⁵ Te coo ndaā coo ndoo ánuá yō, cuajníñu yó núū yā tāca quívi jeē cótecu yō.

⁷⁶ Te róhó súchi lúli, cuu ró tée nacani jnūhun Yaā cujéhnú téyí.

Chi cosnúu ró ichi núú máá Jítóho yō, návāha sátūhva ró ñáyuu, te sáá te quiji ya.

⁷⁷ Te castūhun ró nuū ñáyuu máá yá jeē jnáma ya i, jíin jéē cóne cáhnu ni yā nuū tāca cuéchi i.

⁷⁸ Chi Yaā Dios máá yó, vāha ni yā te cundáhú ni yā yohó. Jeē yúcuan tají yá máá Yaā jeē sáha jeē cundijin ini anuá yō, quiji ya nde andiví,

⁷⁹ návāha jecūhun ni yohó jéē cáyūcu nájñūhun nuū néē nuū jé yajni cuu yō.

Te chuhun ya yohó ichi nuū cóo ndeyí coo sī̄ ni yō.

Achí Zacarías.

⁸⁰ Te sūchi lúli un ní jehnu i te ni ije i jín jnúhun ya. Te ni condee i nde nuū ñúhun téhé ndé quiv̄ ní quenda ndijin i nuū ñáyuu Israel.

Jeē ní cacu Jesús
(Mt. 1.18-25)

2

¹ Te ni cuu jecu quiv̄, te Augusto, tēe cúu rey, ni ndacu de jniñu jeē coo censo jeē núcōsō síhv̄i ndiv̄ii ñayuu ní cáhnu nuū ndácu de jniñu. ² Yāha cúu censo xihna ñúhún jéē ní casáha de ná ni cuu Cirenio gobernador nación Siria. ³ Te ndiv̄ii ñayuu cuanungoo i ná ñuu ná ñuu maá i jeē nácuāha i síhv̄i i. ⁴ Te suni José ni quenda de ñuu Nazaret, ndañúu Galilea. Te cuanuhun de región Judea, te ni najinū de ñuu Belén, jeē cúu ñuu nuū ní cacu rey David jenahán. Chi sēhe yucūn David cúu de. ⁵ Te ni jehēn de návāha nacuāha de síhv̄i de jín María, chi je yajni quijnáhan ña jín de. Te ñúhun sēhe ña ni sáha Espíritu Santo. ⁶ Te níni cáh̄iin de yūcuán te ni jinū quiv̄i jeē cácu sēhe ña. ⁷ Te ni scácu ña sēhe yí nūú ña, te ni chusúcún ña i sahma cuitá, te ni jequin ña i ini ñin nundōo nūú yéji quiti, chi tuá núne mesón condee ña.

Jeē ní canecoo ndajéhé yā nuū pastor

⁸ Te yajni ñuu Belén cáh̄iin tēe cácuu pastor, te cándito de lanchi de ní niñu jecuāā nde yucu ún. ⁹ Te ñin sanaa-ni te ni cane ñin ndajéhé maá Jítóho yō nuū de, te nduva máá Jítóho yō ni ndindēe ní nūú cáh̄iin de. Te yōhyo ni cayūhú de. ¹⁰ Te ni cahān ndajéhé un jín de:

Ma yūhu ró jijnáhan ró, chi vēji ri castūhun rí jnūhun vāha nuū rō, te sáha jeē cúsī ndasí ni tāca ñáyuu: ¹¹ Chi vijna nde ini ñuu David ni cacu ñin Yāā jnama róhó, te

máá Jítóho yō Cristo cúu ya. ¹² Te súcuan nacuni rō sūchi yíquín un, chi ñúsúcún i sahma cuitá te cátú i ini ñn nundōo núū yéji quití. Achí yá.

¹³ Te ñn sanaa-ni te ni canecoo cuehē gā ndajéhé andiví, cáhiin ya jíin ndajéhé un, te cácahān yā jeē yóhoyo vāha Yaā cúu Yaā Dios. Te achí yá:

¹⁴ Yóhoyo luu cújéhnu Yaā Dios nde nuū sucún.

Te na ndúvāha ni tāca ñáyuu ñayīvī, sāha ya jeē cúsiñ ni yā jíin i.

Achí táca ndajéhé.

¹⁵ Yūcuán na te cuanungoo ndajéhé un andiví. Te tēe cácuu pastor ni cacahān de jíjnáhan de:

Na quíhín yō nde ñuu Belén, te cuni yō na vé ni cuu jeē ní castūhun máá Jítóho yō nuū yō, achí de.

¹⁶ Te yachí cuangoo de, te ni nanihín de María jíin José jíin sūchi yíquín un, cátú i ini nundōo núū yéji quití. ¹⁷ Te nuū ní cajini de nuū i, te ni canacani de jnūhun jeē ní cachi ndajéhé yā nuū de siquī sūchi yíquín un. ¹⁸ Te ni canaa ni tāca ñáyuu cájini nahín i jnūhun cácahān tēe cácuu pastor. ¹⁹ Te María, ni quendōo tāca jnúhun yáha nuū jeē níjnūní ña, te nácani ni ña siquī. ²⁰ Te tēe cácuu pastor cuanungoo de, te ni cacahān de jeē yóhoyo vāha Yaā cúu Yaā Dios siquī tāca jéē ní cajini sōho de jíin jéē ní cajito de, chi ni squícu nahín nájñūhun ni cahān ndajéhé yā jíin de.

Jeē ní castéén de i nuū Yaā Dios ini templo

²¹ Te ni cuu unā quivī jeē ní cacu ya, te ni casáha de circuncidar sūchi yíquín un. Te ni casnání de i Jesús, chi síhví yúcuan ní cachi ndajéhé yā nuū María nde ná tu jecūhun i.

²² Te ni jíinu quivī jeē casquícu ña costumbre jeē ndúndoo ña nuū Yaā Dios jíjnáhan ña, nájñūhun cáhán ley jeē ni jéhe ya nuū Moisés. Te ni jengoo de jíin i ñuu Jerusalén

jeē nácuāha de i nuū maá Jítóho yō Yaā Dios. ²³ Súcuan ni casáha de, chi yósó núū tútu ley yā: Tāca súchi yíí núú jéé cácaacu, quihi cuenta i nuū Jítóho yō Yaā Dios, achí tutu. ²⁴ Te suni cuasocō de nájnūhun cáhán ley maá Jítóho yō: Socō rō uū livi chí úū paloma, achí tutu.

²⁵ Te ni iyo ñin tēe nání Simeón, ndéé de ñuu Jerusalén tiempo un. Te tēe ndaā, tēe chíñúhún váha nuū Yaā Dios cúu de. Te ñúhun ni de jeē quée maá Yaā jnama ñayuu nación de Israel. Te máá Espíritu Santo íyó yá jíin de. ²⁶ Te je ni castūhun yá nuū de jeē ma cúū cuiiti de chi nde coto de nuū Cristo jeē tají maá Jítóho yō Yaā Dios. ²⁷ Te ni steén yā nuū de jeē quihín de templo quivī ún. Te suni tátá naná sūchi yíquin Jesús, ni quívicoo de ini templo jíin i, jeē nácuāha de i nuū Yaā Dios nájnūhun cáhán ley Moisés. ²⁸ Te Simeón ni ñunundee de i, te ni cahán de jeē yóhyo vāha Yaā cúu Yaā Dios, te áchí de:

²⁹ Tátá Yaā Dios, vijna te cuu cuāha ni jnúhun jeē cuu ná, chi je ni cusí ni ná.

Chi je ni squícu ní jnúhun ni jejnūhun ní núū sāña jéé cúu ná mozo ní.

³⁰ Chi ni jito jíinúū na núū Yaā jnama sāña jíjnáhan ná.

³¹ Chi ni jeni ní yá jeē jnama ya tāca ñáyuu ñayiví.

³² Te máá yá sáha jeē cúndijin ini anuá ñayuu tācá nación, návāha jecūhun ni i siquī ní.

Te sáha ya jeē kujéhnu ñayuu maá ní Israel.

Achí Simeón.

³³ Te José jíin náná i cánaa ni de cájini nahín de jnūhun ni cahán Simeón siquī i. ³⁴ Te ni jicān tahu Simeón jehē de jíjnáhan de, te ni cahán de jíin náná i María:

Sūchi yáha vēji i jeē candíje cuehē ñayuu nación yō Israel, te cācu i jíjnáhan i. Te sava i ma candíje i, te jnahnū ndetū i. Chi cúu i Yaā ní tají Yaā Dios, te sa squéhichí ni cuehē ñayuu i. ³⁵ Te súcuan te quenda ndijin ndese cájeni

ni tāca ñáyuu. Te máá ró chi jnahuhū ndasí ni rō coto ró jéē ndóho i. Achí Simeón.

³⁶ Te suni íne ñn ñahan nácani jnūhun Yaā Dios, naní ña Ana. Te sēhe Fanuel, yucūn Aser cúu ña. Te je jéñnu ndasí ña. Te nde ná lulí ña te ni condee ña jíín yñ ña uxā cuiyā.

³⁷ Yūcuán na te ni quendōo ndáhú ña, te ni cuu cuūn xico cuūn cuiyā ña. Te tu cújiyo ña ini vehe ñi, chi jéññu ña nuū Jítóho yō Yaā Dios nduú ñuú, te ndite ni ña te jícán tahu ña. ³⁸ Te suni hora un ní quee ña, te ni nacuatáhú ña nuū Yaā Dios. Te ni cahān ña jnūhun sūchi yíquín un jíín táca ñáyuu Jerusalén jeē cáñuhun ni i jeē quée Yaā jnama i.

Jeē cuánungoo de ñuu Nazaret

³⁹ Te ni jīnu ni casquícu de tācá jniñu ndácu ley maá Jítóho yō Yaā Dios, te cuanungoo de ñuu de Nazaret, ndañū Galilea. ⁴⁰ Te sūchi lulí un ní jehnu i, te ni ije i, te ni cundíchí gá i. Te ni sáha Yaā Dios jeē váha ndasí jíín i.

Jeē íne sūchi lulí Jesús ini templo

⁴¹ Te ndijnahan cuiyā jéngoo tátá i náná i ñuu Jerusalén, jeē cúu vico pascua. ⁴² Te nuū ní cuu uxī uū cuiyā i, te cuangoo tucu de Jerusalén, nájñuhun sáha sáha de quivī vico ún. ⁴³ Te ni yāha vico, te cuanungoo de. Te sūchi lulí Jesús, ni quendōo i Jerusalén, te tu ní cájini José jíín náná i. ⁴⁴ Te cájeni ni de jeē cuahán i mēhñu ñáyuu cájica ichi ún. Te ni cajica de ñn quivī, te sáa te ni cananducú de i mēhñu táca jnáhan de jíín ñáyuu cájini jnáhan de jíín. ⁴⁵ Te tu ní cánanihīn de i. Te ni canandicó de cuangoo de Jerusalén, cuananducú de i.

⁴⁶ Te nuū uní quivī te ni cananihīn de i ini templo, néne i mēhñu tée cástéén tutu ley Yaā Dios, te jíni nahín i jeē cácahān de te cájnūhún i de siquī jnúhun ún. ⁴⁷ Te tāca ñáyuu cájini jnūhun cáhán i, cánaa ni cájito jeē váha cájí

xíní i te vāha nástíó cuíñí i jnūhun. ⁴⁸ Te nuū ní cajito tátá i náná i nuū i, te ni canaa ni de. Te ni cahān naná i jíin i:

Séhē, ¿naun ni sáha ró súcuan jíin rí? Chi ruhū jíin tátá rō, yōhō ni canacani ni rī cánanducú rí rohó, achí ña.

⁴⁹ Yūcuán na te ni cahān i:

¿Naun cánanducú ní sãña? ¿A tu cájini ni jéē cánuú cocu ná jíin jniñu Tátá na Yaā Dios? Achí i.

⁵⁰ Te tu ní cájecūhun ni tátá i náná i jnūhun ni cahān i.

⁵¹ Yūcuán na te cuanuhun i jíin de jíináhan de ñuu Nazaret, te ni jendije i nuū de. Te náná i, ni quendōo tāca jnūhun yáha núū jeē níjnūní ña. ⁵² Te Jesús ni jehnu ga i, te ni cundíchí gá i, te cúsiñ ni Yaā Dios jíin i, te suni súcuan tāca ñáyuu.

Jnūhun Juan tēe scuándute
(Mt. 3.1-12; Mr. 1.1-8; Jn. 1.19-28)

3

¹ Te ni cuu xahūn cuiyā jeē ndácu Tiberio jniñu ní nación. Te Poncio Pilato cúu de gobernador Judea, te Herodes cúu de gobernador Galilea, te ñani de Felipe cúu de gobernador Iturea jíin Traconite, te Lisantias cúu de gobernador Abilinia. ² Te sutū cujéhnu ga cácuu Anás jíin Caifás. Te ni quee jnūhun Yaā Dios nuū Juan sēhe Zacarías, jeē íne de nuū ñúhun téhé. ³ Te ni jica nuu de tācá ñuu jeē iyó yajni yūte Jordán. Te cáhán de jíin ñáyuu jeē na nácani ni i jeē stóo i cuēchi i te cuandute i, návāha cone cáhnu ni Yaā Dios nuū cuéchi i. ⁴ Te súcuan ni squícu jnūhun Juan jeē yosó nuū tútu ni tee Isaías, tēe ni nacani jnūhun Yaā Dios nde jenahán:

Coo ñn tēe cana jee nde nuū ñúhun téhé:

Sátūhva ró máá ró jíináhan ró, chi quee maá Jítóho yō.

Te sáha ró jniñu ndaā, chi vēji ya.

⁵ Te tāca xéhvā na ndúndaā,

te tācá yucu jíin loma na ndúnduhvā,
te na ndúyóhó ichi yácuá, te na ndúlii ichi ndáyí.
Te ndihi un cúu jeē ndúvāha ndundaā anuá ñayuu nuū yā.

⁶ Te ndihi i cuni i jeē jnáma Yaā Dios i.
Súcuan cahān Juan, achí tutu.

⁷ Te ni quendacoo cuehē ñayuu, cuahān i nuū de jeē
scuándute de i. Te ni cahān de nuū i:

Va sēhe coō cácuu ró, chi xeēn rō nájñūhun coō. ¿A
cájeni ni rō jeē cuu cunu ró cācu ró núū castigo xeēn jeē
quíji? ⁸ Núu súcuan te sáha ró jniñu váha, te súcuan stéén
rō jeē ní nacani ndije ni rō jeē stóo ró cuéchi ró. Te ma cáni
ni rō cahān rō jeē cuu cācu ró síquī jeē cácuu ró yúcūn
Abraham. Chi cáhán rī jíin ró jeē cuu sáha Yaā Dios jeē
tāca yūū yáha nduu sēhe Abraham jeē candíje váha, te
núu cúni yā. ⁹ Te cácuu ró nájñūhun nundēhé jeē tu jéhe
ndehē váha. Te vijna je íyó túhva Yaā Dios jeē cuáha ya
castigo xeēn, nájñūhun je íyó túhva ñin cāa jeē cahnde nde
yoho yujnu. Núu súcuan te sáha ya jíin ró nájñūhun jíin
tāca yujnu jeē tu cúun ndehē váha, jeē tahndé te cayū nuū
ñuhún. Achí de.

¹⁰ Te ñayuu un ní cacajñūhún i de:

¿Te ndese sáha ná núu súcuan? Achí i.

¹¹ Te ni cahān de:

Róhó jéē cánevāha uū sahma, na cuáha ró ñin nuū jeē
tu névāha. Te róhó jéē cánevāha jeē yéji, suni súcuan na
sáha ró, achí de jíin i.

¹² Te suni jecu tēe cástútú xúhun renta, ni quecoo de jeē
cuándute de. Te ni cacajñūhún de Juan:

Maestro, te máá ná, ¿ndese sáha ná jíjnáhan ná?

¹³ Te ni cahān Juan jíin de:

Ma scaá ró cácan rō xūhún, chi máá cúhva-ni jeē ní
ndacu jniñu nuū rō, achí de.

¹⁴ Te suni ni cacajñūhún jecu soldado:

Te máá ná, ¿ndese sáha ná jíjnáhan ná? áchí de.

Te ni cahān Juan jíin de:

Ma quénde rō ndajníñu ni ñn jíin jnúhun siúhú ni jíin jnúhun stáu yáhu, te cusī ni rō jíin yáhu ró, áchí de.

¹⁵ Te tāca ñáyuu cándetu i jeē quíji Cristo, Yaā jeē tají Yaā Dios, te cájeni ni i jeē sanaa te suu cúu Juan. ¹⁶ Te ni cahān Juan jíin i jíjnáhan i:

Ruhū chi jíin ndute scuándute ri rohó. Te vēji ñn Yaā jeē nájñūhun scuándute ya rohó cúu jeē cuáha ya Espíritu Santo condee ini anuá rō, te poder yā cúu nájñūhun ñuhūn. Te cújéñu ndasí yá, chi tú na vé jéñu cuiti cúu ri nuū yā, ni jeē cuajníñu ri nuū yā vēsú ñn jniñu lúlí gá nájñūhun jeē ndají rí vēsú correa ndijēn yā. ¹⁷ Te sáha ya nájñūhun sáha tēe scánda trigo, chi sásñn ya ñayuu vāha jíin ñáyuu cunéé, nájñūhun cúndoo trigo jeē quénda sñn paja. Te nastútú yá trigo yā ndīvi ini yacā yā. Te paja chi jnaa yā nuū ñuhún jeē ma ndahvá cuiti. Achí Juan.

¹⁸ Te súcuan te jíin cuéhē gā jñūhun ni stihví ni de ñayuu un, ní nacani de jñūhun vāha Yaā Dios nuū i. ¹⁹ Te suni ni cahān xeēn de nuū Herodes, tēe cúu gobernador, chi tēe un ní nacueca de Herodías, ñasihí ñani de Felipe. Te cuehē gā jniñu néé súcuan ni sáha Herodes. ²⁰ Te sa víhyá gā ni sáha de jeē neé gá, chi ni chune de Juan vecāa.

Jeē ní jendute Jesús

(Mt. 3.13-17; Mr. 1.9-11)

²¹ Te nde ná tu quīvi Juan vecāa, ná ni ine de ni scuándute de tāca ñáyuu, te suni ni scuándute de Jesús. Te jícán tahu yā, te ni nune-ni andívi. ²² Te ni cuun Espíritu Santo ni quee xinī yā, te cáa nájñūhun ñn paloma. Te ichi ándívi ní cahān ñn jñūhun:

Máá ró cúu Sēhe ri jeē maní ndasí rí jíin, te yōhyo cúsiñ ni rí jíin ró, achí.

*Lista ñayuu yucūn ní quiji Jesucristo
(Mt. 1.1-17)*

²³ Te ná ni quejéé Jesús steén yā jnūhun, te íyó yá nájñūhun ocō uxī cuiyā. Te cájeni ni ñayuu jeē séhe José cúu ya. Te José ni cuu sēhe Elí, ²⁴ te Elí ni cuu sēhe Matat, te Matat ni cuu sēhe Leví, te Leví ni cuu sēhe Melqui, te Melqui ni cuu sēhe Jana, te Jana ni cuu sēhe José, ²⁵ te José ni cuu sēhe Matatías, te Matatías ni cuu sēhe Amós, te Amós ni cuu sēhe Nahum, te Nahum ni cuu sēhe Esli, te Esli ni cuu sēhe Nagai, ²⁶ te Nagai ni cuu sēhe Maat, te Maat ni cuu sēhe Matatías, te Matatías ni cuu sēhe Semei, te Semei ni cuu sēhe José te José ni cuu sēhe Judá, ²⁷ te Judá ni cuu sēhe Joana, te Joana ni cuu sēhe Resa, te Resa ni cuu sēhe Zorobabel, te Zorobabel ni cuu sēhe Salatiel, te Salatiel ni cuu sēhe Neri, ²⁸ te Neri ni cuu sēhe Melqui, te Melqui ni cuu sēhe Adi, te Adi ni cuu sēhe Cosam, te Cosam ni cuu sēhe Elmodam, te Elmodam ni cuu sēhe Er, ²⁹ te Er ni cuu sēhe Josué, te Josué ni cuu sēhe Eliezer, te Eliezer ni cuu sēhe Jorim, te Jorim ni cuu sēhe Matat, ³⁰ te Matat ni cuu sēhe Leví, te Leví ni cuu sēhe Simeón, te Simeón ni cuu sēhe Judá, te Judá ni cuu sēhe José, te José ni cuu sēhe Jonán, te Jonán ni cuu sēhe Eliaquim, ³¹ te Eliaquim ni cuu sēhe Melea, te Melea ni cuu sēhe Mainán, te Mainán ni cuu sēhe Matata, te Matata ni cuu sēhe Natán, ³² te Natán ni cuu sēhe David, te David ni cuu sēhe Isaí, te Isaí ni cuu sēhe Obed, te Obed ni cuu sēhe Booz, te Booz ni cuu sēhe Salmón, te Salmón ni cuu sēhe Naasón, ³³ te Naasón ni cuu sēhe Aminadab, te Aminadab ni cuu sēhe Aram, te Aram ni cuu sēhe Esrom, te Esrom ni cuu sēhe Fares, te Fares ni cuu sēhe Judá, ³⁴ te Judá ni cuu sēhe Jacob, te Jacob ni cuu sēhe Isaac, te Isaac ni cuu sēhe Abraham, te Abraham ni cuu sēhe Taré, te Taré ni cuu sēhe Nacor, ³⁵ te Nacor ni cuu sēhe Serug, te Serug ni cuu sēhe Ragau, te Ragau ni cuu sēhe Peleg, te Peleg ni cuu sēhe Heber, te Heber ni cuu sēhe Sala, ³⁶ te Sala ni cuu sēhe Cainán, te Cainán ni cuu sēhe Arfaxad, te Arfaxad ni cuu sēhe Sem, te Sem

ni cuu sēhe Noé, te Noé ni cuu sēhe Lamec, ³⁷ te Lamec ni cuu sēhe Matusalén, te Matusalén ni cuu sēhe Enoc, te Enoc ni cuu sēhe Jared, te Jared ni cuu sēhe Mahalaleel, te Mahalaleel ni cuu sēhe Cainán, ³⁸ te Cainán ni cuu sēhe Enós, te Enós ni cuu sēhe Set, te Set ni cuu sēhe Adán, te Adán ni cuu sēhe Yaā Dios, chi ni sáha ya de.

*Jeē ní jito ndee jexeén Jesús
(Mt. 4.1-11; Mr. 1.12-13)*

4

¹ Te Jesús ni cunuú Espíritu Santo ini yā, te ni quenda ya yūte Jordán cuahān yā. Te ni jinū yā nde nuū ñúhun téhé ní sáha Espíritu Santo. ² Te ni ine ya yūcuan úu xico quivī, te ni jito ndee jexeén yā, chi cúní jeē sáha ya cuēchi. Te tāca quivī ún tu ní yéji cuiti yā, te ná ni yāha quivī ún, te jí yā sōco. ³ Yūcuán na te ni cahān jexeén un jíin yá:

Núu máá ró cúu Sēhe Yaā Dios, te cahān rō jeē yuū yáha na ndúu staā caji rō, achí.

⁴ Te ni cahān Jesús jíin:

Tuú chi yósó núu tútu iī: Nasūu máni máá jíin stāā cátecu ñayuu, chi suni jíin táca jnúhun cáhán Yaā Dios, achí yá.

⁵ Yūcuán na te cuahān jexeén un jíin yá nde xinī ñin yucu súcún, te ñin núnúu-ni ni steén nuū yā tācá nación ní cáhnu ñayiví. ⁶ Te ni cahān jíin yá:

Nuū maá ró cuāha ri jeē kujéhnú ró núu ndivii nación yáha, chi yōhyo luu cáa. Chi máá rí jnñi ndihí, te cuu cuāha ri nuū ndé ñin cúní rī. ⁷ Núu súcuan te núu cuiñi yítí ró chiñúhún ró ruhū, te cuāha ndihí ri nuū rō. Achí jexeén.

⁸ Te ni cahān Jesús jíin:

Satanás, cujiyo quihīn rō, chi yósó núu tútu jeē chiñúhún ñayuu máá Jítóho i Yaā Dios, te nuū maá-ni ya cuajníñu i. Achí yá.

⁹ Yūcuán na te cuahān jexeén un jíin yá nde ñuu Jerusalén. Te ni jeni ya xinī torre templo. Te ni cahān jíin yá:

Te núu Sēhe Yaā Dios cúu ró, te síngava ró máá ró nde nuū ñúhun, chi jnama ya rohó. ¹⁰ Chi yósó núu tútu:

Tejníñu ya ndajéhé yā quijicoo coto róhó.

¹¹ Te cunundee yā rohó jíinánhan ya, návāha ma cáchihi ró jéhē rō nuū yuú.

Achí tutu. Achí jexeén.

¹² Te ni cahān Jesús:

Tuú chi suni yósó núu tútu jeē ma cóto ndee ñayuu Jitoho i Yaā Dios, núu jnama ya i chí tuú, áchí yá.

¹³ Te tuá ni níhín jexeén modo coto ndee Jesús quivī ún, te ni cujiyo cuahān jecu-ni tiempo.

Jeē ní quejéé Jesús nácani ya jnūhun región Galilea

(Mt. 4.12-17; Mr. 1.14-15)

¹⁴ Te ni cunuú fuerza Espíritu Santo ini Jesús, te cuanuhun yā Galilea. Te ní región yajni yūcuan ní jitē núu jnūhun ya. ¹⁵ Te ni steén yā jnūhun ini tācá vehe iī sinagoga, te ndíhi ñayuu ni cajejnúhún i ya.

Jeē cuánuhun yā ñuu Nazaret

(Mt. 13.53-58; Mr. 6.1-6)

¹⁶ Te ni najinū yā ñuu Nazaret nuū ní jehnu ya. Te quivī ndétátú ni quivī ya ini vehe iī sinagoga, nájnūhun sáha sáha ya. Te ni ndocuiñī yā jeē cahu ya tutu iī. ¹⁷ Te ni cajēhe de tutu ni tee Isaías, tēe ni nacani jnūhun Yaā Dios nde jenahán. Te ni nune ya tutu ún, te ni nanihín yā nuū yosó jnúhun ni cahu ya:

¹⁸ Espíritu maá Jitoho yō Yaā Dios iyó yá jíin rí, chi ni tejníñu ya ruhū jeē nácani ri jnūhun vāha nuū ñayuu ndahú.

Te ni tají yá ruhū vēji ri jíin jnúhun jeē ndúvāha ni ñayuu cáucuíhyá ni.

Te castūhun rí nuū ñáyuu cáyíhi ndaha jexeén jeē coo libre i.

Te sáha ri jeē ndúndijin ini anuá ñayuu tu cájecūhun ni, te jnama ri ñayuu jeē cándoho i sáha jnáhan i.

¹⁹ Te nacani ri jnúhun jeē ní quee tiempo jeē sáha Jitoho yō Yaā Dios jeē váha ñayuu.

Achí tutu ni cahu ya.

²⁰ Te ni nacasi yā tutu ún, te ni nacuāha ya nuū tée jéjníñu ini sinagoga, te ni nucōo ya jeē steén yā jnúhun nuū ñáyuu cáhiin ini sinagoga. Te tācá i cájito vāha i nuū yā. ²¹ Te ni quejée yá cahán yā jíin i:

Vijna te ni squícu jnúhun cáhán tutu iī yāha ní cajini sōho ró, áchí yá.

²² Te ndivii i ni cacahān jeē váha tēe cúu ya, te cánaa ni i jeē ní cajini i tāca jnúhun luu ni cahán yā. Te ni cacajnūhun jnáhan i:

¿A násūu séhe José cúu tēe yáha?

²³ Te ni cahán yā jíin i:

Jíní vāha ri jeē cájeni ni rō cahán rō jnúhun yátá yáha jíin rí: Tēe tájna, sátájna ró maá ró núu súcuan. Te jnúhun yáha cúní cahán jeē nájnūhun ni nasávāha ri cuehē ñayuu cácuñu ini ñuu Capernaum ni canihīn rō jnúhun, suni súcuan na sáha ri ñuu yō yāhá návāha candíje ró cájeni ni rō. Achí yá jíin i.

²⁴ Te ni cahán gā yā:

Jendaá cahán rī jíin ró, ni iin tēe nácani jnúhun Yaā Dios, tu cájetáhú ñayuu ñuu maá de nuū de. ²⁵ Te suni jendaá cahán rī jíin ró jeē ni íyo cuehē ñahan ní ndóo ndáhú ini nación yō Israel, tiempo ni cotecu Elías, tēe ni nacani jnúhun Yaā Dios. Te tiempo un tu ní cúun cuiñi saū unī cuiyā yosáva, te ni iyo iin jnamā xeēn ní cáhnu

nación. ²⁶ Te tu ní tájí Yaā Dios Elías quihīn de nuū ni ĩn ñahan viuda nación yō Israel, chi nuū máá ĩn-ni ñahan viuda jeē ndeé ñuu Sarepta ndañúū Sidón, ni jehēn de ni jito de jeē ní yeji ña. ²⁷ Te ini nación yō Israel suni ni ĩyo cuehē tēe ni candoho cuehyī stehyú, tiempo jeē ní cotecu Eliseo, tēe ni nacani jnūhun Yaā Dios. Te ni ĩn de tu ní cándíje jeē ndúvāha de sáha Eliseo, chi sa suhva máñúhún-ni Naamán, tēe nación Siria ni nduvāha. Achí yá.

²⁸ Yūcuán na te tāca ñáyuu cáhīin ini sinagoga, yōhyo ni caquitī ni i jnūhun ní cahān yā. ²⁹ Te ni candocuñī i, te ni caquenehen i ya yatā ñúú ún, cuahān i jíin yá xinī yúcu íne ñuu ún, chi cáconi i chundahá i ya ñinga ya cava ún. ³⁰ Te tu ní cúu sáha i, chi ni yāha-ni ya mēhñú i cuahān yā.

Jeē ní quenehen ya tachī ini ĩn tēe
(Mr. 1.21-28)

³¹ Yūcuán na te cuahān Jesús ñuu Capernaum región Galilea. Te quivī ndétātu ní steén yā jnūhun nuū ñáyuu. ³² Te ni canaa ni i cájini i jnūhun steén yā. Chi ni steén vāha ya nuū i, chi jíiní vāha máá yá.

³³ Te ini vehe sinagoga un íne ĩn tēe jeē ñúhun tachī xeén ini de. Te tēe un ní cana cóhó de:

³⁴ Cujíyo ní. ¿Naun vēji ní núū na jíjnáhan ná, Jesús ñuu Nazaret? ¿A véji ní jéē snāā ni sáña, chí naún? Je jíiní na ndé ĩn cúu ní, chi Sēhe ĩi Yaā Dios cúu ní. Achí de.

³⁵ Te Jesús ni cahān xeēn yā nuū tachī ún:

Casi yuhu ró te quenda ró ini tēe yáha, áchí yá.

Te ni cotúú-ni tēe un núū tāca ñáyuu, ni sáha tachī ún. Te ni quenda ini de cuahān, te tú na vé ni sáha ga jíin de.

³⁶ Te ndíhi ñáyuu un ní cayūhú i, te ni cacahān i jíin jnáhan i:

¿Na jnūhun cúu yāha jēē ní cuu súcuan? Chi cújéhnū tēē yáha jēē ndácu nīhin de jniñu nuū tachí, te quēnda-coo-ni, áchí i.

³⁷ Te jnūhun ya ni jitē núu cuahān ní cáhnu región yūcuán.

Jeē ní nasávāha ya naná chīsó Simón Pedro

(Mt. 8.14-15; Mr. 1.29-31)

³⁸ Yūcuán na te ni quenda Jesús ini vehe iī sinagoga, te cuahān yā te ni jinū yā vehe Simón. Te náná chīsó Simón, yīhi xeēn quiji ña, te ni cacahān ndahú de jíin yá jehē ña.

³⁹ Te ni jīta ndeyi ya nuū ña, te ni cahān yā jeē na ndíco quiji ún. Te ni nduvāha-ni ña. Te ni ndocuññi-ni ña, te ni sáha ña jeē ní yeji yā jíin de.

Jeē ní nasávāha ya cuehē ñayuu

(Mt. 8.16-17; Mr. 1.32-34)

⁴⁰ Te jeē ni quéé niāndii, te tāca ñáyuu jeē iyó jnáhan i cácuñū ndīnuū cuehyī, ni caquindeca i jnáhan i un núū yā. Te ni soó yá ndaha ya siquī ññ ññ i, te súcuan ni nasávāha ya i. ⁴¹ Te suni cuehē ñayuu ni quendacoo tachī ini i, te cácana cóhó táchī ún:

Máá ní cúu Sēhe Yaā Dios, achí.

Te ni cahān xeēn yā nuū, te tu ní jéhe ya jnūhun jeē cahán gā súcuan, chi cájini jeē maá yá cúu Cristo, Yaā ní tají Yaā Dios.

Jeē ní nacani ya jnūhun región Galilea

(Mr. 1.35-39)

⁴² Te nuū ní cundijin, te ni quenda ya cuahān sñn ya yatā ñūū nuū tú ñayuu. Te tāca ñáyuu cánanducú i ya, te ni jinūcoo i nuū íne ya. Te cástétu i ya jeē tú cujiyo ya nuū i. ⁴³ Te ni cahān yā jíin i:

Suni cánuú jeē nacani ri jnūhun vāha nuū tāca gá ñuu siquī ndese ndácu Yaā Dios jniñu, chi jeē yúcuan ní tají yá ruhū vēji ri. Achí yá.

⁴⁴ Te ni jica cuu ya ní región Galilea, nácani ya jnūhun ini tācá vehe iī sinagoga.

*Jeē ní canihīn de cuehē chācá ni sáha ya
(Mt. 4.18-22; Mr. 1.16-20)*

5

¹ Te iin quivī te íne Jesús yumar Genesaret. Te ni quecoo cuehē ñayuu, te ni chitú níhin i nuū yā, chi cáconi i cuni nahín i jnūhun Yaā Dios. ² Te ni jito ya jeē yúcu uū barco yajni yumar. Te tēe cájni chācá, je ni quendacoo de ini barco, te cánacate de ñunu de. ³ Te ni quivī ya ini iin barco jeē cúu barco Simón. Te ni cahān yā jíin de jeē na scáca yátá de quihīn jecu gā nuū ndúte. Te ni cucōo ya, te nde ini barco un ní steén yā jnūhun nuū ñáyuu cuehē jeē yúcu i yundúte un. ⁴ Te nuū ni jínu ni steén yā, te ni cahān yā jíin Simón:

Scáca ró barco na quíhín yō nde nuū iyó cúnú ndute, te sínga ró ñunu ró jnií ró chāca, áchí yá.

⁵ Te ni cahān Simón:

Maestro, ní niñu ni casínga ná ñunu jeē jnií ná tí, te tu ní níhín cuítí ná ni iin tí. Te jeē cahán maá ní súcuan, te na sínga tucu ná ñunu, áchí de.

⁶ Te ni casínga de, te ni quivícoo cuehē ndasí chāca, nde nducú táhndē ñunu de. ⁷ Te ni cacaja ndahá de nuū jnáhan de cáhiin ini inga barco, na quíjicoo chindéé ñájnáhan jíin de. Te ni quecoo de, te ni cascútú ndí de tí ndíndúú barco, te nde je yajni quēe barco. ⁸ Te ni jito Simón Pedro jeē súcuan ni cuu. Te ni jecuiñí yití de nuū Jesús, te ni cahān de:

Cujiyo ní núu ná, chi tēe íyó cuéchi cúu ná, áchí de.

⁹ Chi máá de jíin táca téé cáhīin jíin de, ni cayūhú de jeē ní canihīn de cuehē chācá un ní sáha ya. ¹⁰ Te suni ni cayūhú Jacobo jíin Juan, ndīndúú séhe Zebedeo, chi tēe chíndéé ñájnaahan jíin Simón cácuu de. Te ni cahān Jesús jíin Simón:

Ma yūhu ró, chi nde vijna te sáha ri jeē nihīn rō cuehē ñayuu candíje ruhū, nájnuhun ni nihīn rō cuehē chācá. Achí yá.

¹¹ Yūcuán na te nuū ni jíinūcoo de jíin barco nuū ñúhun íchi, te ni castóo de ndihī ndajníñu de, te ni candiquīn de ya cuangoo de.

Jeē ní nasávāha ya iin tēe ndóho cuehyī stehyú

(Mt. 8.1-4; Mr. 1.40-45)

¹² Yūcuán na te íne Jesús ini iin ñuu, te ni quee iin tēe ndóho cuehyī stehyú. Te ni jito de nuū Jesús, te ni jecuiñī yití de ni jequīn de nuū de nde nuū ñúhun, te ni cahān ndahú de jíin yá:

Jíní na jēé cuu sáha ní jēé nduvāha ná, te núu cúní ni, áchí de.

¹³ Yūcuán na te ni soó yá ndaha ya siquī de, te ni cahān yā:

Cúní rī. Te na ndúvāha ró, áchí yá.

Te ná ni cahān yā súcuan, te ni nduvāha-ni tēe ndóho cuehyī stehyú un. ¹⁴ Te ni ndacu ya jniñu nuū de jeē ma cáchi cuiṭi de nuū ní iin. Te áchí yá:

Quisteén rō maá ró nuū sutú, te condahá ró jeē socó rō nuū Yaā Dios siquī jeē ndúndoo ró núu yā, nájnuhun ni ndacu Moisés jniñu jenahán. Te súcuan te cuni ñayuu jeē ní nduvāha ró. Achí yá.

¹⁵ Te víhyá gā ni jītē núu jnūhun ya cuahān. Te ni cataca cuehē ñayuu jeē cúní nahín i jnūhun stéén yā, jíin jēé nasávāha ya i nuū tāca cuéhyī cándoho i. ¹⁶ Te máá yá cuahān sīin ya nuū tú ñayuu, te ni jicān tahú yā.

Jeē ní nasávāha ya iin tēe ndóho cuehyī ni íjin
(Mt. 9.1-8; Mr. 2.1-12)

¹⁷ Te iin quivī te stéén yā jnūhun, te jecu tēe grupo fariseo jíin tēe cástéén tutu ley Yaā Dios, cáyūcú de yūcuán. Te tēe un ní quecoo de nuū yā jeē véjicoo de tācá ndañū Galilea, jíin ndañū Judea, jíin ñuu Jerusalén. Te poder maá Yaā Dios iyó jíin yá jeē nasávāha ya ñayuu cácuñū. ¹⁸ Yūcuán na te ni quecoo jecu tēe, cándiso de iin tēe ndóho cuehyī ni íjin, cátú de nuū iin camilla. Te cánducú de squívī de tēe ún ini vehe, te caquin de nuū íne ya. ¹⁹ Te tu ní cániñin de modo quivicoo de jíin tēe un, chi cáyūcú chitú ñayuu. Te ni cacoo de siquī véhe, te ni canune de teja. Te ni cascúun de tēe cúhú un jíin camilla de nde nuū íne Jesús mēñū ñáyuu. ²⁰ Te ni jini Jesús jeē cácañje de jeē cúu nasávāha ya tēe cúhú un. Te ni cahān yā jíin tēe cúhú un:

Róhó, je íne cáhnu ni rī nuū tāca cuéchi ró, áchí yá.

²¹ Yūcuán na te tēe cástéén tutu ley Yaā Dios jíin tēe grupo fariseo, ni quejéé de cájeni ni de siquī yā: ¿Ndé iin cúu tēe yáha jéé cahán de jnūhun ndevāha jeē quití ni Yaā Dios? Chi nasūu Yāā Dios cúu de jeē cóne cáhnu ni de nuū cuéchi.

²² Te ni jini Jesús jeē súcuan cájeni ni de, te ni cahān yā jíin de:

¿Naun cájeni ni rō jeē cahán ndevāha ri? ²³ Jeē úu jnūhun yáha, ¿ndé iin yí gá cáa? ¿A jéé cahán rī jíin tēe cúhú: Je íne cáhnu ni rī nuū tāca cuéchi ró? ¿Chí yí gá jeē cahān rī: Ndocuññī te caca ró, chi je ni nduvāha ró, achi rī?

²⁴ Te vijna te na stéén rī jeē maá rí, Yaā ní nduu tēe, ndíso jniñū ri ini ñayivī yáha jéé cóne cáhnu ni rī nuū cuéchi.

Yūcuán na te ni cahān yā jíin tēe ni íjin ún:

Cahán rī jíin ró, ndocuññī te naquihin ró camilla rō, te quinhun rō vehe ró, áchí yá jíin de.

²⁵ Te ni ndocuiñi-ni tēe ún, jito jínū ñayuu. Te ni naquihin de camilla nuū ni cátu de, te cuanuhun de vehe de. Te nácuatáhu de nuū Yaā Dios. ²⁶ Te yōhyo ni canaa ni tāca ñáyuu cájito i, te ni cacahān i jeē yōhyo vāha Yaā cúu Yaā Dios. Te suni yōhyo cáyūhú i, te cácahān i:

Vijna te ni cajito yó jniñu jénu téyí, áchí i.

Jeē ní cana ya Leví

(Mt. 9.9-13; Mr. 2.13-17)

²⁷ Yūcuán na te ni quenda ya cuahān yā, te ni jito ya nuū ñn tēe stútú xúhun renta, naní de Leví, néne de nuū cutútú xúhun renta. Te ni cahān yā jíin de:

Condiquin ruhū na quhín yō.

²⁸ Te ni ndocuiñi de, te ni stóo de ndihi ndajniñu de, te cuahān de jíin yá.

²⁹ Yūcuán na te ni sáha Leví ñn vico cáhnu vehe de, jeē cúsiñi ni de jíin Jesús. Te cuehē tēe cástútú xúhun renta jíin sava ga tēe, cáyūcú de mesa cáyeji de staā jíin yá. ³⁰ Te tēe grupo fariseo jíin tēe cástéén tutu ley Yaā Dios, ni quejé de cácahān de siquī tēe cáscuáha jíin yá, te ni cacajnūhún de:

¿Najehē cáyeji rō cájihu ró jíin tēe cástútú xúhun renta jíin tēe cása ha cuēchi? áchí de.

³¹ Te ni cahān Jesús:

Ñayuu cáhiyo vāha, tu jíni ñúhún i tēe tájna, chi ñayuu cácu hū cúu jeē jíni ñúhún. ³² Te ruhū nasūu jeē véji ri cana ri ñayuu tú cuēchi, jeē cúu i nájnūhun ñayuu cáhiyo vāha. Chi sa suhva véji ri cana ri ñayuu cáhiyo cuēchi, jeē na nácani ni i te stóo i cuēchi i. Achí yá.

Jeē ní cacajnūhún de ya siquī jeē cóndite ni

(Mt. 9.14-17; Mr. 2.18-22)

³³ Yūcuán na te ni cacahān de jíin yá:

Tēe cáscuáha jíin Juan, jíin tée cáscuáha jíin grupo fariseo, cuehē jínu cáhīyo ndite ni de te cájicān tahu de. Te tēe cáscuáha jíin máá ní, ¿naun tu cásáha de súcuan? Chi cáyeji de cájihi de.

³⁴ Te ni cahān yā jíin de:

¿A cuu condite ni de níní jéē iyó rí jíin de? ¿A cuu sáha ró jéē condite ni ñayuu cáhīin vico nándāha, te núu níní néne tēe nándāha? ³⁵ Te quee quivī jeē cújiyo tēe ni nandāha, te quivī ún chi condite ni i. Achí yá.

³⁶ Te suni ni cahān yā uū jnūhun yátá síquī jeē tu quíjnáhan jnūhun jeé jéē steén yā jíin táca jnúhun jehán. Achí yá:

Ni ñn ñayuu tu jéhnde i ñn pedazo sahma jée i, te nachuhun i nuū ñn sahma túhú i. Chi núu súcuan te stívī i sahma jée i, te suni tu quíjnáhan jeē jeé un jíin jéē tuhú.

³⁷ Te tú ni ñn chūhun vino jeé ini ññi túhú. Chi núu súcuan, te vino jeé un ndatá ññi, te naa vino jíin ññi. ³⁸ Chi cánuú jéē cūhun vino jeé ini ññi jée, te súcuan te quéndō vāha ndindúú. ³⁹ Te ñayuu cájihi vino áva, tu cúní i coho i jeé jeé, chi jeé áva cúu jeé váha ga, achí i. Achí yá.

Jeē ní cataxín de yoco trigo quivī ndétātu
(Mt. 12.1-8; Mr. 2.23-28)

6

¹ Te ñn quivī ndétātu ní yāha Jesús cuahān yā mēhñú nuū cáa trigo. Te tēe cáscuáha jíin yá ni cataxín de yoco trigo, te ni caquūn de ini ndaha de, te ni cayeji de. ² Te sava tēe grupo fariseo ni cacajnūhún de:

¿Najehē casáha ró jniñu jeē tu iyó váha sáha ró quivī ndétátú?

³ Te ni cahān Jesús jíin de:

¿A tu ní cácahu cuiṭi rō tutu ndese ni sáha David, ñn quivī jeē ni jíi de sōco jíin tēe cáhīin jíin de? ⁴ Te ni quivī

de ini vehe Yaā Dios, te ni quihin de pan iī jeē yosó ndijin nuū Yaā Dios. Te ni yeji de, te suni ni jēhe de ni cayeji tēe cáhiin jíin de. Te tú na ley jeē cáji ni iin tēe, chí máá-ni sutū cuu caji. Te vēsú súcuan te tú na cuēchi ní íyo siquī de. Achí yá.

⁵ Te ni cahān gā yā jíin de:

Ruhū, Yaā ní nduu tēe, máá rí cúu jeē ndácu jniñu siquī ndese sáha ñayuu quivī ndétátú, áchí yá.

Jeē ní nduvāha tēe ni ichī ndaha

(Mt. 12.9-14; Mr. 3.1-6)

⁶ Te inga quivī ndétátú, suni ni quivī ya ini vehe iī sinagoga, te ni steén yā jnūhun. Te yūcuan íne iin tēe ni ichī ndaha váha de. ⁷ Te tēe cástéén tutu ley jíin tēe grupo fariseo, cájito yuhu de ya núu nasávāha ya tēe un quivī ndétátú, návāha nihīn de cuēchi siquī yā. ⁸ Te máá yá je jíiní yā ndese cájeni ni de. Te ni cahān yā jíin tēe ni ichī ndaha ún:

Ndocuīñī, te condichi rō mēhñu yáha, áchí yá.

Te ni ndocuīñī de, te ni jecondichi de mēhñú. ⁹ Yūcuán na te ni cahān yā jíin de jíjnáhan de:

Na cájnūhun rí rohó iin jnūhun: ¿Ndese cáhán ley siquī quivī ndétátú? ¿A jéē sáha vāha yó, chí sáha néé yó? ¿A jéē nasávāha yó ñáyuu je yajni cuu, chí sáha yó jéē cúu í? Achí yá.

¹⁰ Te ndéhé yá nuū de jeē cáyūcú de ní xiin ya. Te ni cahān yā jíin tēe cúhú un:

Scáá ndaha ró.

Te ni scaá de, te ni nduvāha-ni ndaha de. ¹¹ Te yōhyo ni caquitī ni tāca tēe un, te ni quejéé de cándajñuhún de siquī Jesús, ndese cahni de ya.

Jeē ní nacāji ya uxī uū tēe apóstol

(Mt. 10.1-4; Mr. 3.13-19)

¹² Te ni cuu jecu quiv̄i, te ni quenda ya cuacacān tahu yā nde yucu. Te n̄í niñu ni jicān tahu yā nuū Yaā Dios. ¹³ Te nuū ní cundijin, te ni cana ya tāca tēe cáscuáha jíin yá. Te ni nacāji ya uxī uū de, te ni cahān yā jeē cuu de apóstol, condiso jniñu de nacani de jnūhun ya. ¹⁴ Te yāha cúu síhv̄i de jíjnáhan de: Simón jeē ní nasnání yá de Pedro, jíin ñani de Andrés, te suni Jacobo jíin Juan, Felipe jíin Bartolomé, ¹⁵ Mateo, Tomás, Jacobo sēhe Alfeo, Simón tēe grupo cananista, ¹⁶ Judas ñani Jacobo, jíin Judas Iscariote, tēe jeē ní nastúu de ya.

Jeē ni stéén yā nuū ñáyuu cuehē

(Mt. 4.23-25)

¹⁷ Te ni nanuu ya yucu jíin táca tēe un jēe cascuáha jíin yá, te ni jecuiñ̄i yā ĩn nduhvā jíin de. Te cuehē ñayuu n̄í región Judea jíin ñuu Jerusalén, jíin ñáyuu yumar ñuu Tiro jíin ñuu Sidón, ni quecoo i jeē cúni nahín i jnūhun stéén yā, jíin jéē ndúvāha i cuehȳi cándoho i. ¹⁸ Te ñayuu jeē ñúhun tachī ini i, suni ni canduvāha i ni sáha ya. ¹⁹ Te ndiv̄ii ñayuu cáconi i quehé i ya, chi súcuan ndúvāha i sáha ya jíin poder yā.

Jnūhun ñayuu yōhyo ndetū jíin ñáyuu jeē xeēn ndoho

(Mt. 5.1-12)

²⁰ Te ni ndacoto ya nuū tēe cáscuáha jíin yá un, te ni cahān yā:

Yōhyo ndetū rohó jēē cándoho ndáhú, chi quiv̄i ró ñuu nuū ndácu Yaā Dios jniñu.

²¹ 'Yōhyo ndetū rohó jēē cájii sōco vijna, chi quiji quiv̄i jeē ndutú chíji ró.

'Yōhyo ndetū rohó jēē cándahyū rō vijna, chi quiji quiv̄i jeē cuecú rō.

²² 'Yōhyo ndetū rō te núu cáquit̄i ni ñayuu nuū rō jeē siquí ruhū, Yaā ní nduu tēe, te cásquéhichī i rōhó, te

cácahān neé i nuū rō, te cácahān i jeē ñáyuu casáha jniñu neé cácuu ró. ²³ Te na cóo sīñ ni rō quivī sáha i súcuan, te víhyá gā na cúsiñ ni rō, chi cáhnu téyí coo tahū rō nde andiví. Chi suni súcuan ni casáha uhū tāca jí i jíin tée ni canacani jnūhun Yaā Dios nde jenahán.

²⁴ Te nacā jeē xeēn ndoho róhó ñáyuu cucá, chi vijna-ni cúu jeē cáhiyo sīñ ni rō.

²⁵ Nacā jeē xeēn ndoho róhó ñáyuu jeē víjna cáhiyo vetū chíji ró, chi quiji quivī jeē cuu rō sōco.

'Nacā jeē xeēn ndoho róhó ñáyuu jeē víjna cájecū rō, chi quiji quivī jeē nducuíhyá ni rō te ndahyū rō.

²⁶ Nacā jeē xeēn ndoho tāca ró núu cájejnúhún ñáyuu rohó, chi suni súcuan ni cajejnúhún jí i tāca tée ni canacani jnūhun stáhú ndé jenahán.

Jnūhun jeē cundáhú ni yō ñayuu cájito uhū yohó

(Mt. 5.38-48; 7.12)

²⁷ Te cáhán rī jíin róhó jeē cájini sōho: Cundáhú ni rō ñayuu cájito uhū rohó. Te sáha vāha ró jíin ñáyuu cáquitiñ ni nuū rō. ²⁸ Te cacān rō jeē vāha coo ñayuu cácahān ndevāha síquī rō. Te cacān tahú rō jehē ñáyuu cácahān neé núu rō. ²⁹ Te núu ndé tée cani de ñin lado yiqui núu rō, te vāha ga suni cuāha ró ñnga lado cani de, vēsú jeē nácuāha ró jéē ndútahū de. Te núu ndé tée cúní de quende de ticāchi ró, suni cuāha ró jnūhun jeē na quíhín de jíin ndé camisa rō. ³⁰ Te na-ni ñayuu jicán nuū rō, te cuāha ró núu i. Te ñayuu quíhin ndajniñu ró, ma nándacān rō. ³¹ Te nájñūhun cácuñi rō jeē sáha vāha ñayuu jíin ró, suni súcuan na sáha vāha ró jíin i.

³² Chi núu íyó mání rō jíin máá-ni ñayuu jeē maní jíin ró, ¿te na vé jeē vāha ga sáha ró núu súcuan? Chi nde tēe casáha cuēchi, suni maní de jíin tée maní jíin máá de. ³³ Te núu sáha vāha ró jíin máá-ni ñayuu jeē casáha vāha jíin

ró, ¿te na vé jeē váha ga sáha ró núu súcuan? Chi nde tēe cásáha cuēchi, suni súcuan cásáha de. ³⁴ Te núu cuāha núu ró núu maá-ni ñayuu jeē ñúhun ni rō nacuāha i nuū rō, ¿te na vé jeē váha ga sáha ró núu súcuan? Chi nde tēe cásáha cuēchi, suni jéhe núu de nuū tāca gá tēe cásáha cuēchi, návāha nanihīn tucu de. ³⁵ Núu súcuan te cundáhú ni rō ñayuu cájito uhū rohó, te sáha vāha ró jíin i, te cuāha núu ró núu i. Te ma cuáha ró máá síquī jeē cani ni rō jeē suni nacuāha i nuū rō. Te súcuan te cáhnu coo tahū rō, te stéén rō jeē cácuu ró séhe Yaā cujéhnú téyí. Chi máá yá vāha ni yā jíin ñáyuu tu nácuatáhú núu yā jíin ñáyuu casáha néé. ³⁶ Núu súcuan te cundáhú ni rō ñayuu, nájnūhun máá Tátá rō cúndáhú ni yā i.

Ma cahán yō síquī cuéchi jnāhan yó
(Mt. 7.1-5)

³⁷ 'Ma cahán rō síquī cuéchi ñayuu ndese sáha i, návāha suni ma cahán Yaā Dios cuēchi síquī rō jeē casáha ró súcuan. Ma cahán xeēn rō síquī i jeē tú vāha sáha i, návāha suni ma cahán Yaā Dios súcuan síquī rō. Cone cáhnu ni rō nuū i, te suni cone cáhnu ni yā nuū rō. ³⁸ Cuāha ró núu ñáyuu, te suni súcuan cuāha Yaā Dios nuū rō. Chi vāha ndasí cuáha ya nuū rō, nájnūhun jeē chícuāha váha ya, quisi ya, sáníhin ya, te nde scáa ya cuāha ya nuū rō. Chi cūhva jeē cájēhe ró núu ñáyuu, suni cūhva un cuáha ya nuū rō. Achí yá.

³⁹ Te ni cahān yā ĩn jnūhun yátá jíin i:

Tēe cástéén jnūhun tú ndaā, cácuu de nájnūhun tēe cuáá. Te ĩn tēe cuáá, ¿á cuu stéén de ichi nuū inga tēe cuáá? ¿A tú ñingava ndíndúú de ini xehvā? ⁴⁰ ĩn tēe scuáha, tu cújéhnú de nuū maestro de. Te tēe scuáha ún, núu je ni cutūhva vāha de, te jinū de coo de nájnūhun maestro de.

SAN LUCAS 6:41 29 SAN LUCAS 6:49

⁴¹ Te cuēchi jnáhan ró cúu nájnūhun jeē íne ñn yāca lúli tñnūú i. ¿Te naun cásáha ró cuenta jeē súcuan, te tu cásáha ró cuenta cuēchi máá ró jeē cúu nájnūhun jeē íne ñn nduhu tñnūu máá ró? ⁴² ¿Te naun cácahān rō jíin jnáhan ró: Condetu, na táva rī yāca íne tñnūu ró, te tu cánacani ni rō jeē íne ñn nduhu tñnūu máá ró? Tēe stáhú-ni cácuu ró núu súcuan. Xīhna gā tñnūu máá ró tava rō nduhu, te yūcuán na te cuu condēhe váha ró jēe táva rō yāca tñnūu jnáhan ró.

*Jíin jniñu cásáha ñayuu te nácuni yō ndese ñayuu cácuu i
(Mt. 7.17-20; 12.34-35)*

⁴³ Tu íyó yujnu váha jeē jéhe ndehē neé, te ni tu íyó yujnu neé jéē jéhe ndehē váha. ⁴⁴ Chi jíin ndéhē jeē jéhe ñn ñn yujnu, te jíin yō núu yujnu váha cúu. Chi tu scóyo yó ndehē higo xinī íñu, ni tu scóyo yó ndehē uva xinī yucú zarza. ⁴⁵ Te suni súcuan tēe vāha, cáhán de jnūhun vāha, chi vāha ánuá de. Te tēe sáha neé cáhán de jnūhun neé, chi cánéé ánuá de. Chi modo ndese íyó ánuá ñayuu, máni jeē yúcuan cúu jeē cácahān i.

*Siquī uú vehe
(Mt. 7.24-27)*

⁴⁶ ¿Najehē cácahān yññúhún ró jíin rí: Jitoho ná, áchí ró, te tu cásquícu ró jniñu ndácu rí? ⁴⁷ Tāca ñáyuu vēji nuū rī te jíin sōho jnūhun cáhán rī te squícu, na stéén rī nuū rō ndese cúu i. ⁴⁸ Cúu i nájnūhun ñn tēe jeē ní jeni de vehe de, te ni jete cúnú de nde ni nihīn de toto, te ni jeni de siquī. Te nuū ní ndaa yūte, te ni chundahá vehe ún, te tu ní cánda cuiñi sáha, chi siquī toto íin. ⁴⁹ Te tāca ñáyuu jíin sōho jnūhun cáhán rī, te tu squícu i, cúu i nájnūhun ñn tēe ni jeni de vehe de nuū ññuhun, te tu yftuu jehē. Te nuū ní ndaa yūte, te ni chundahá vehe ún, te ni cotúú-ni, te ni naa iñ-ni. Achí yá jíin i jíinánhan i.

*Jeē ní nasávāha ya mozo capitán
(Mt. 8.5-13)*

7

¹ Te nuū ni jínu ni cahān yā ni cajini nahín ñáyuu ún, te cuahān yā ñuu Capernaum. ² Te ñn tēe nación Roma jeē cúu capitán, íyó ñn mozo de jeē manī ndasí de jíín. Te mozo un cúhu i te je yajni cuu i. ³ Te ni jini capitán jnūhun Jesús. Te ni tají de jecu tēe jéhnū cándacu jniñū nuū ñáyuu hebreo, cuango de nuū yā jeē cahán ndahú de jíín yá jeē na quíji ya sávāha ya mozo de. ⁴ Te ni jinūcoo tēe un núū Jesús, te ni cacahān ndahú ndasí de jíín yá:

Chindéé ñáhán ní tēe cúu capitán, chi tēe vāha cúu de. ⁵ Chi manī de jíín nación yō, te máá de ni ndacu jniñū ni cuvāha ñn vehe sinagoga cuu yó. Achí de.

⁶ Yūcuán na te cuahān Jesús jíín de jíínáhan de. Te nuū ní cuyajni ya vehe capitán, te ni tají de jecu amigo de cuajnahān yā. Te ni cacahān de jíín yá:

Achí capitán jeē tu cúní de sájnéñū de níhín, chi tu cújéhnu de jeē quihín ni quívi ní vehe de. ⁷ Jeē yúcuān tu ní sájéhnu de máá de jeē quíji de nuū ní, áchí de. Te máá jéē cahán-ni ní, te na ndúvāha-ni mozo de, áchí de. ⁸ Chi máá de suni ndíso jniñū de ni casáha tēe cácujuhnu ga. Te cújéhnu de nuū tācá soldado de, áchí de. Te núu cáhán de jíín ñn tēe jeē na quihín de, te cuahān de. Te núu cáhán de jíín inga tēe jeē na quíji de, te quíji de. Te núu ndácu de ñn jniñū nuū mozo de, te sáha i, áchí de. Achí táca tēe un jíín yá.

⁹ Te jeē ní jini Jesús jnūhun yáha, te ni naa ni yā. Te ni ndió cóto ya ni cahān yā jíín ñáyuu cuehē cándiquin yatā yā:

Jendaá cahán rī jíín ró jeē ni nación yō Israel tu ní níhín rī ni ñn ñáyuu candíje níhin súcuan, nájnūhun cándíje tēe

ún, vēsú tēe nación tu jíní jnūhun Yaā Dios cúu de. Achí yá.

¹⁰ Te tēe ni tají capitán nuū yā, ni najinūcoo de vehe, te ni cajito de jeē jé ni nduvāha mozo un.

Jeē ní nastécu yā sēhe yí ñahan viuda

¹¹ Yūcuán na te cuahān yā ñin ñuu naní Naín. Te tēe cáscuáha jíin yá, jíin ñáyuu cuehē, suni cuango i jíin yá. ¹² Te ná ni cuyajni ya yuñúú ún, te yūcuan ní quendacoo ñayuu jeē quíchindūji i ñin tēe suchí jéē ni jíhī. Te máñúhún-ni i nuū naná i, te ñahan viuda cúu ña. Te cuehē ñayuu ñuu un véjicoo jíin ña. ¹³ Te ná ni jito máá Jítóho yō nuū ña, te ni cundáhú ni yā ña, te ni cahān yā jíin ña:

Ma ndahyú ni, áchí yá.

¹⁴ Yūcuán na te ni jinū yā nde nuū ndíyí ún, te ni jnií ya yejnū, te ni cajecuiñī tēe cándiso ún. Te ni cahān yā jíin súchi ní jihī:

Cáhán rī jíin ró, ndocuiñī, achí yá.

¹⁵ Yūcuán na te ni nucōo súchi ní jihī ún, te ni quejéé i nácahān i. Te ni nacuāha ya i nuū naná i. ¹⁶ Te ndívii ñayuu ni cayūhú i jeē ní cajito i, te ni cacahān i jeē yóhyo vāha Yaā cúu Yaā Dios. Te cácahān i:

Mēhñu yó ni quee ñin tēe cújéhnu nácani jnūhun Yaā Dios.

Te suni cácahān i:

Máá Yaā Dios ni quejéé yá chindéé ñáhán yá ñayuu yā. Achí i.

¹⁷ Te ni jitē núu jnūhun ya ñí cáhnu región Judea jíin táca región yajni yūcuán.

Jeē ní tají Juan uū tēe nuū yā

(Mt. 11.2-19)

¹⁸ Te íne Juan vecāa, te tēe cáscuáha jíin de ni castūhun núu de jeē súcuan ni cuu tācá jniñu yáha. ¹⁹ Te

ni cana Juan uū tēe ún, te ni tají de cuangoo nuū Jesús, návāha cajnūhún de ya núu máá yá cúu ndije Cristo jeē ní cachi Yaā Dios jeē tají yá, chí núu nasūu yá cúu te condetu de inga. ²⁰ Te ni jinūcoo tēe un núu yā, te ni cacahān de:

Juan tēe scuándute ni tají de sāña véjicoo ná cajnūhun ná nihín núu máá ní cúu Cristo jeē achí tutu jeē quíji, chí condetu yó inga tēe quiji. Achí de.

²¹ Te máá hora un ní nasávāha ya cuehē ñayuu cácuḥū, jíin ñáyuu cándoho cuehyī xeēn, jíin ñáyuu ñúhun tachí ini. Te suni cuehē ñayuu cuaá ní ndundijin tñnūú i ni sáha ya. ²² Te ni cahān yā jíin de:

Cuángoo te castūhun ró nuū Juan tācá jniñu ni cajito ró jíin jnúhun ni cajini ró. Te cachi rō nuū de jeē ñáyuu cuaá cánanune tñnūú i, te ñayuu yacúa cánacaca i, te ñayuu ndóho cuehyī stehyú cánduvāha i, te ñayuu sohó cánanune sōho i, te ñayuu jihí nátecu i sáha ri. Te suni nácani ri jnūhun nuū ñáyuu ndahú jēē jnama Yaā Dios i. ²³ Te yōhyo ndetū tēe jeē ma nácani yátá ni de jeē ruhū cúu Cristo. Súcuān cachi rō nuū Juan. Achí yá jíin de.

²⁴ Te ná cuānahun ndindúú tēe ún, te ni quejéé Jesús cahán yā jnūhun Juan jíin ñáyuu:

¿Na vé ni jécondēhe ró jijnáhan ró ndé nuū ñúhun téhé? ¿A ñn tēe jéni ñn jéni uū ni, nájñūhun ite jeē cánda sáha tachí? ²⁵ Te núu tuú, ¿te na vé ni jécondēhe ró núu súcuān? ¿A ñn tēe cúní cujéñu jeē ñúhun sahma lúu? Tuú chi cájini rō jeē tēe cáñuhun sahma lúu te cánducú tāca jēē cúsiñ ni, máni ini vehe rey cáyūcú de. ²⁶ ¿Te na vé ni jécondēhe ró núu súcuān? ¿A ñn tēe nácani jnūhun Yaā Dios? Cáhān rī jíin ró jeē suu ni jecondēhe ró. Te cújéñu ga Juan yáha vēsú tāca gá tēe ni canacani jnūhun Yaā Dios. ²⁷ Chi jnūhun Juan cúu jeē ni cáhān Yaā Dios jeē yosó núu tútu i:

Tají rí tēe nacani jnūhun ri cosnūú de ichi núú Cristo,

návāha coo tūhva ñayuu jeē jinú yā.

Achí Yaā Dios, achí tutu. ²⁸ Te cáhán rī jín ró jeē ini ñayīvi yáha cújéhnu ga Juan tēe scuándute vēsú tāca gá tēe jeē ni íyo ini ñayīvi. Te vēsú súcuan te tāca tēe núu ga ini ñuu nuū ndácu Yaā Dios jniñu, cújéhnu ga de vēsú Juan. Achí yá.

²⁹ Te tāca ñáyuu jín táca tēe cástútú xúhun renta, ni cajini i jnūhun cáhán yā, te ni cajetáhú i jeē Yaā ndaā cúu Yaā Dios, chi je ni cajendute i nuū Juan. ³⁰ Te tēe grupo fariseo jín tēe cástéén tutu ley, ni casquéhichī de jnūhun jeē cuní Yaā Dios sáha ya jeē váha de, chi tu ní cájendute de nuū Juan. ³¹ Te ni cahān gā maá Jítóho yō:

Yāhá cachi rī ñn jnūhun yátá návāha na cúni rō ndese cúu ñayuu tiempo vijna. ³² Cúu i nájñūhun sūchi lúlí cáhiin nuū yáhu cácasquí i. Te cácana ndee i xinī jnáhan i: Ni cativi rī scuilí, te tu ní cájita jéhe ró. Te ni cajita ri yaa jeē cuihyá jíta, te tu ní cándaahyū rō, achí i. Te nájñūhun cándāa sūchi lúlí un jéē tu ní nújnahan ni i ni ñn, suni súcuan cándāa ró. ³³ Chi ni quiji Juan tēe scuándute, te cuehē jínu ni íyo ndite ni de, tu ní yéji de staā ni tu ní jíhi de vino. Te tu ní cánujnahan ni rō, chi ni cacahān rō jeē ñūhun tachī ini de. ³⁴ Yūcuán na te ni quee máa rí, Yaā ní nduu tēe, te yéji rī jíhi ri, te tu cánujnahan ni rō, te chísoó jnúhun ró cácahān rō jeē máni máa jéē yéji rī jíhi ri vino. Te quíjnahan ri jín tēe cástútú xúhun renta jín táca gá tēe cásaaha cuēchi, áchí ró. ³⁵ Te núu cúndichí ñn tēe jín jnúhun Yaā Dios, te jín jniñu sáha de te cájini tāca gá tēe ndichí jeē ndichí de. Achí yá.

Jeē íne Jesús vehe Simón tēe fariseo

³⁶ Te ñn tēe fariseo ni cana de Jesús jeē cáji yā staā jín de. Te ni jinū yā vehe de, te ni cucōo ya mesa jeē cáji yā staā. ³⁷ Yūcuán na te ñn ñahan sáha cuēchi, ndéé ña

ñuu yúcuán, te ni jini ña jeē ni jínū Jesús vehe tēe fariseo un, yéji yā staā. Te ni quee ña jíin ñin frasco yuū luu jeē ñūhun chítú aceite perfume. ³⁸ Te íin yítí ña nuū jehé yā, te ndáhyú ña. Te ni quejéé ña stáji ña jehē yā jíin ndute tñnúú ña, te ni nasíchí ña jíin ixi xíní ña. Te ni techūhú ña jehē yā, te ni chuhun ña perfume un. ³⁹ Te tēe fariseo un jeē ní cana de ya, ni jito de jeē súcuán ni sáha ña, te ni jeni ni de: Núu tēe nácani jnūhun Yaā Dios cúu tēe yáha, te cuni de ndese ñahan cúu ñahan yáha jeē quehé ña de, chi ñahan sáha cuēchi cúu ña, jéni ni de. ⁴⁰ Yūcuán na te ni cahān Jesús jíin de:

Simón, cúní rī cahān rī jíin ró ñin jnūhun.

Te ni cahān maá de:

Cahān ní, Maestro.

⁴¹ Te ni cahān Jesús:

Ñin tēe jéhe núu xūhún, ni īyo uū tēe táú nuū de. ñin de ni cotaū uhūn ciento denario, te inga de ni cotaū uū xico uxī denario. ⁴² Te tú na vé cánevāha tēe un jēe náchunaa de. Te tēe jéhe núu xūhun ní ine cáhnu ni de nuū ndíndúú tēe ún. Núu súcuán te cachi rō: Jeē ndíndúú tēe ún, ¿ndé ñin de coo manī gā jíin de? Achí yá.

⁴³ Te ni cahān Simón:

Jéni ni na jēe tēe ni cotaū cuehē gā, achí de.

Te ni cahān yā jíin de:

Ndaā cahán rō, achí yá.

⁴⁴ Te jító ya nuū ñahan ún, te ni cahān gā yā jíin Simón:

¿A jító ró na vé sáha ñahan yáha? Jeē ní quee rī vehe ró, te tu ní jéhe ró ndute jeē ndúndoo jehē rī nájñūhun íyó costumbre. Te ñahan yáha ní stáji ña jehē rī jíin ndute tñnúú ña, te ni nasíchí ña jíin ixi xíní ña. ⁴⁵ Te tu ní téchūhu ró ruhū nájñūhun íyó costumbre. Te ñahan yáha, nde jeē ni quívi ri vehe ró, tu jécuiñī ña jeē téchūhú ña jehē rī. ⁴⁶ Te tu ní chūhun ró aceite xiní rī nájñūhun íyó

costumbre. Te ñahan yáha ní chuhun ña aceite perfume jehē rī. ⁴⁷ Núu súcuan te cáhán rī jíín ró jeē ni stéén ña jeē yóhyo manī ña jíín rí síquī jeē íne cáhnu ni rī nuū tāca cuéchi ña, vēsú cuehē cúu. Te núu cone cáhnu ni rī nuū ñin ñayuu iyó jecu-ni cuéchi, te jecu-ni stéén i jeē maní i jíín rí, achí yá.

⁴⁸ Te ni cahān yā jíín ña:

Je íne cáhnu ni rī nuū tāca cuéchi ró, achí yá.

⁴⁹ Yūcuán na te ñayuu cáyeji staā jíín yá, ni quejéé i cácahān maá i:

¿Ndé ñin ga cúu tēe yáha jéē cahán jeē íne cáhnu ni nuū cuéchi? achí i.

⁵⁰ Te Jesús ni cahān gā yā jíín ñahan ún:

Ni candíje ró rúhū, te jeē yúcuan ní jnama ri rohó. Cuáhán te na ndúsī ni rō. Achí yá.

Jnūhun ñahan ní cajejníñu nuū yā

8

¹ Yūcuán na te ni cuu jecu quivī, te ni jica cuu Jesús tācá ñuu náhnu jíín ñuu lulí. Te nácani ya jnūhun vāha te cástūhun yá ndese ndácu Yaā Dios jniñu. Te ndihúxí uū tēe cácuu apóstol, cájica de jíín yá. ² Te suni íyó jecu ñahan cájica jíín yá, jeē ní quenehen ya tachī ini sava ña, te ni nasávāha ya sava ña jeē cándoho cuehyī. Te ñin ña cúu María ñuu Magdala, te ini ñahan un ní quenehen ya uxā tachī. ³ Te inga ña cúu Juana, ñasihí Chuza, tēe ndíso jniñu ini vehe Herodes. Te inga ña cúu Susana, jíín cuéhē gā ñahan jeē cáchindéé ñáhán ña, jéhe ña tāca jéē jíni ñúhún yá jíín de jíínáhan de.

Jnūhun yátá síquī tēe jéte trigo
(Mt. 13.1-9; Mr. 4.1-9)

⁴ Te cuehē ñayuu tācá ñuu yūcuan ní jinūcoo i nuū Jesús. Te ni cacutútú cuehē ndasí ñáyuu, te ni cahān yā ñin jnūhun yátá jíin i:

⁵ ñin tēe cate trigo, ni quenda de jeē cáte de. Te ná ni quejéé de jéte de, te jecu trigo ni jítē yuhíchi. Te ni cajeñū ñayuu siquī, te ni cayejí saa. ⁶ Te jecu gā ni jítē nuū ñúhun yuū. Te ni cane, te ni ichī-ni, chí tú cuehē cajin. ⁷ Te jecu gā ni jítē nuū náne ñū. Te ñnuú-ni ni canecoo ñū jíin, te ni jesí nuū. ⁸ Te jecu ni jítē nuū ñúhun váha. Te nuū ní jehnu, te ni jēhe cuehē nunī, chí jeē ñin ñin ni jēhe nde ciento. Achí yá.

Yūcuán na te ni cahān jee ya:

Tāca róhó jéé jíni sōho, na chúsóhó ró, achí yá.

Najehē cahán yā máni jnūhun yátá

(Mt. 13.10-17; Mr. 10-12)

⁹ Te tēe cáscuáha jíin yá ni cacajñuhún de ya na vé cuní cahān jnūhun yátá yáha. ¹⁰ Te ni cahān yā:

Róhó jíináhan ró, chí sáha Yaā Dios jeē cájecūhun ni rō jnūhun ni yisāhi yáha, ndese quívicoo ñayuu ndaha Yaā Dios jeē ndacu ya jniñu nuū i. Te máni jíin jnūhun yátá cáhán rī jíin sava ga i, návāha vēsú cájito i, te quéndō i nájñuhun jeē tú na vé ni cájito i. Te vēsú cájini sōho i, te ma jécūhun ni i.

Jeē ní castūhun cájí yá jnūhun yátá tée jéte trigo

(Mt. 13.18-23; Mr. 4.13-20)

¹¹ Jnūhun yátá yáha cuní cahān: Trigo un cúu jnūhun Yaā Dios. ¹² Te trigo jeē ni jítē yuhíchi cúu nájñuhun ñayuu cájini sōho jnūhun, te quíji-ni jexeén te quénde-ni jnūhun ini anuá i, návāha ma candíje i te ma jnáma ri i. ¹³ Te trigo jeē ni jítē nuū ñúhun yuū cúu nájñuhun ñayuu cájini jnūhun, te cájetáhu i te cácusñi ni i jíin. Te tu cúcutú jnūhun ún ini anuá i. Te jecu-ni quívī cácandíje i, te núu ni

quejéé jnúndóho, te cájica yátá i. ¹⁴ Te trigo jeē ni jítē nuū náne iñu cúu nájnūhun ñayuu cájini jnūhun, te cuango i te cácuñéñu i jíín jniñu i jíín jéē cuní i cucúcá i te coo sñi ni i. Te tu íje i jíín jnúhun ya. ¹⁵ Te trigo jeē ni jítē nuū ñúhun váha cúu nájnūhun ñayuu cájini nahín jnúhun ya, te cájniñi vāha i, chi íyó váha íyó ndáā anuá i. Te cáhije i jíín jnúhun ya, chi cá candije vāha i.

Jnūhun yátá síquī lámpara

(Mr. 4.21-25)

¹⁶ 'Núu nástñin ñayuu ñin lámpara, te tu jési i ni ñin síquī, ni tu jéni i chíji jito. Chi sa suhva jéni i nuū sucún, návāha cundijin nuū ñáyuu quívicoo vehe. ¹⁷ Te suni súcuan tu íyó ni ñin jnūhun sāhi jéē ma cúni ñayuu, chi ndihi tāca jnúhun cácahān i nane ndijin te cuni ñayuu.

¹⁸ 'Núu súcuan te na cúni sōho vāha ró, chi ñayuu je jécūhun ni, stéén gā yā nuū i. Te ñayuu tu cándije, máá jecu jeē jéni ni i jeē jiní i, sa suhva naa. Achí yá.

Náná yā jíín ñani yā

(Mt. 12.46-50; Mr. 3.31-35)

¹⁹ Yūcuán na te ni quee naná yā jíín táca ñani yā nuū íne ya. Te tu ní cúu quívicoo ña nuū yā síquī jeē chitú ñayuu.

²⁰ Te ñin ñayuu ni castūhun núu yā:

Náná ni jíín táca ñani ni cáhiin nuū quéhe, te cácuni cahān jíín ní, áchí i.

²¹ Te ni cahān maá yá:

Suni náná rī jíín ñani rī cácuu ñayuu cájini sōho jnūhun Yaā Dios te cásquícu i, áchí yá jíín i.

Jeē ní jecuññi tachī níhin jíín mar ni sáha ya

(Mt. 8.23-27; Mr. 4.35-41)

²² Te ñin quívī ni quívī ya ñin barco jíín tée cáscuáha jíín yá, te ni cahān yā jíín de:

Na yáha yó quíhñi yō inga lado mar.

Te ni cascáca de barco cuango de. ²³ Te níni cáscáca de barco, te ni quixī yā. Te ni jequĩhi ñin tachī ñihin nuū mar, te je yajni chitú ndute ini barco, te ndúcú quéé barco. ²⁴ Te ni castóna de ya, te ni cacahān de:

Maestro, Maestro, vijna te quēe yó chíji ndute te naa yō, achí de.

Te ni ndocuiñi-ni ya, te ni cahān yā nuū tachī ñihin jíin núū mar. Te ni cajecuiñi-ni, te ni cuu nayúú íi-ni. ²⁵ Te ni cahān yā jíin téé cáscuáha jíin yá:

¿Naun tu cácandíje ró?

Te máá de yōhyo ni cayūhú de, te cánaa ni de, te cácahān de jíin jnáhan de:

¿Ndeé ñin ga cúu téé yáha jéé nde nuū tachí ñihin jíin núū ndúte ndácu de jniñu te cájetáhú jéé cahán de? Achí de.

Tēe Gadara jeē ndóho tachī

(Mt. 8.28-34; Mr. 5.1-20)

²⁶ Yūcuán na te ni cane ya jíin de región Galilea, te cuahān yā región Gadara jeē íne inga lado mar Galilea.

²⁷ Te nuū ní nanuu ya nuū ñúhun íchi, te ñin téé ñuu un ní quee de nuū yā. Te je ni cuu cuehē cuiyā ñúhun cuehē tachī ini de. Te tu ñúhun cuiti de sahma, ni tu ndéé de vehe, chí sa suhva nuū cáyindūji ndīyi ndeé de. ²⁸ Te ná ni jito de nuū Jesús, te ni jecuiñi yití de nuū yā, te ni cana cóhó de:

¿Naun vēji ní núū ná, Jesús Sēhe Yaā cujéhnu téyí? Cáhán ndahú ná jíin ní jeē ma stóho ní sáña, achí de.

²⁹ Súcuan ni cahān de, chí je ni ndacu ya jniñu nuū tachí un jéé na quéndacoo ini de. Te ni cuu cuehē jínu sáha xeēn tachí jíin de. Te cájihni ñayuu ndaha de jehē de jíin cadena, návāha tú na vé sáha de. Te ndiñi-ni jéhnde de, te jínu de jéhén de nde nuū ñúhun téhé sáha tachí ún. ³⁰ Te Jesús ni cajnūhun yá de:

¿Na vé naní ró?
Te ni cahān de:
Legión naní ná.

Súcuan ni cahān de jeē naní de, chi ñúhun cuehē tachī ini de. ³¹ Te ni cacahān ndahú táchī un jíín yá jeē ma tají yá quihīn ini tūhnchi cúnú. ³² Te yucu yúcuan cáhiin cuehē quini cájitu ti. Te tachī jeē cáñuhun ini tēe un ní cacahān ndahú jíín yá jeē na cuáha ya jñūhun quīvicoo ini quini ún. Te ni jēhe ya jñūhun. ³³ Te ni quendacoo tachī ún ini tēe ún, te ni quīvicoo ini quini. Te quini un ní cajinu ti ni ningoo ti ĩn yucáva, ni quīvicoo ti nuū mar, te ni ndaquīhi ti ndute, ni cajihī tī.

³⁴ Te tēe cándito tī ni cajito de jeē súcuan ni cuu, te ni cayūhú de. Te ni cajinu de cuacastūhún de nuū ñáyuu ñuu un jíín ñáyuu tāca rancho. ³⁵ Te cuangoo ñayuu un cuácondēhé i na vé ni cuu. Te ni jinūcoo i nuū íne Jesús. Te ni cajito i nuū tēe ní quendacoo tachī ini, néne de nuū jehé Jesús, te ñúhun de sahma, te je ni nducájí xini de. Te ni cayūhu ñáyuu ún. ³⁶ Te tēe ní cajito ni canacani de jñūhun nuū ñáyuu, ndese ni nduvāha tēe ni ñuhun tachī ini.

³⁷ Yūcuán na te tāca ñáyuu ñí región Gadara, ni caquejé i cácahān ndahú i jíín yá jeē na cújiyo ya quihīn yā, chi yōhyo cáyūhú i. Te ni ndīvi ya ini barco jeē quīnuhun yā. ³⁸ Te tēe jeē ní quendacoo tachī ini, ni cahān ndahú de jíín yá jeē na cuáha ya jñūhun quihīn de jíín yá. Te Jesús ni cahān yā jeē na quéndō de, te áchí yá:

³⁹ Cuánuhun vehe ró, te nacani ró jñūhun ndese yōhyo jéhnú jniñu ni sáha Yaā Dios jíín ró, achí yá jíín de.

Te cuahān de, te ni nacani de jñūhun ñí ñuu ún, ndese yōhyo jéhnú jniñu ni sáha Jesús jíín de.

Jñūhun sēhe sáhi Jairo jíín ñahan ní quehé yusáhma ya
(Mt. 9.18-26; Mr. 5.21-43)

⁴⁰ Te nuū ní najinū Jesús inga lado mar, te ñayuu un ní cacusñi ni i jeē ní najinū yā, chi ndiñi i cándetu i ya. ⁴¹ Te ni quee ñin tēe cújéñnu ini vehe iñ sinagoga, naní de Jairo. Te ni jecuiñi yití de nuū jehé yā, te ni cahān ndahú de jíin yá jeē na quíhín yā jíin de vehe de. ⁴² Chi íyó ñin sēhe sñhí de jeē mañúhún-ni i nuū de, te íyó i nájnūhun uxī uū cuiyā. Te sūchí un je yajni cuu i. Te cuahān yā jíin de. Te cuehē ñayuu cándiquin i ya, te ni chitú níhin i xiin ya cuango i.

⁴³ Te mēññu ñayuu un cuáhān ñin ñahan cúhú jeē ní cuu uxī uū cuiyā ndóho ña cuehyi ñiñi. Te ni jexin ña tāca jēē névāha ña jíin tēe tájna, te tu ní ndúvāha ña sáha ni ñin de. ⁴⁴ Te ni quee ña ichi yátá yā, te ni quehé ña yusáhma ya. Te ni jecuiñi-ni ñiñi ña.

⁴⁵ Yūcuán na te ni cahān Jesús:

¿Ndé ñin ni quehé sahma ri? achí yá.

Te ndivii i ni cacahān jeē tu ní quéhé i. Te Pedro jíin tēe cáhiin jíin de, ni cacahān de:

Maestro, jíto ní jēē ñayuu cuehē yāha ní chitú níhin i xiin ní, te cáquñi i níhín, te cájnūhun ní ndé ñin ni quehé sahma ní.

⁴⁶ Te ni cahān Jesús:

Tuú chi ñin ñayuu ni quehé sahma ri, chi ni jini rī jeē jíin fuerza rī ni nduvāha ñin ñayuu, achí yá.

⁴⁷ Te ni jini ñahan un jēē tu ní cúu coo yuhu jeē ni sáha ña. Te quisi i ña ni quee ña, te ni jecuiñi yití ña nuū jehé yā. Te jíto jíinúu tāca ñayuu, te ni cachi cají ña najehē ni quehé ña yusáhma ya, jíin jēē ní nduvāha-ni ña. ⁴⁸ Te ni cahān yā jíin ña:

Séhē, ni candíje ró jēē cuu nasávāha ri rohó, te jeē yúcuan ní nduvāha ró. Cuáhán te na ndúsñi ni rō, achí yá.

⁴⁹ Te níni cáhán gā yā súcuan, te ni quee ñin tēe vēji vehe Jairo, tēe cújéñnu ini sinagoga, te ni cachi nuū de:

Je ni jihī sēhe s̄hí ní. Te ma sájnéñu ga ní Maestro, achí de.

⁵⁰ Te ni jini Jesús jnūhun yáha, te ni cahān yā jíin Jairo: Ma yūhu ró, chi candíje-ni ró, te nastécu rī sēhe ró, áchí yá.

⁵¹ Te ni jinū yā vehe, te tu ní jéhe ya jnūhun quīvi ñayuu jíin yá, chi máá-ni Pedro jíin Juan jíin Jacobo jíin tátá naná sūchi s̄hí un. ⁵² Te cácuuíhyá ni ndíhi ñayuu cáyūcú ini vehe, te cándahyū i jehē sūchí un. Te ni cahān yā:

Ma ndahyú rō jijnáhan ró. Tu ní jíhí i, chi quíxí-ni i, áchí yá.

⁵³ Te ni cajecū catá i jeē ni cáhān yā, chi cájini i jeē ni jíhí sūchi s̄hí un. ⁵⁴ Yūcuán na te ni jniñ ya ndaha i, te ni cahān jee ya jíin i:

S̄hí, ndocuíñī, achí yá.

⁵⁵ Te ni natecu i, te ni ndocuíñī-ni i. Te ni ndacu ya jniñu jeē na cuáha ña jeē cáji i. ⁵⁶ Te tátá i náná i yōhyo ni canaa ni de cájito de. Te ni ndacu níhin ya jniñu nuū de jeē ma cáchi de nuū ni ñin jeē súcuan ni cuu.

*Jeē ní tají yá ndíhúxí uū de cuanacani de jnūhun
(Mt. 10.5-15; Mr. 6.7-13)*

9

¹ Te ni nastútú yá ndíhúxí uū tēe cáscuáha jíin yá, te ni sáha ya jeē cóndiso jniñu de te coo poder de jeē quénehen de tachí ini ñayuu, jíin jéē nasávāha de ñayuu cácuñū. ² Te ni tají yá de quíngoo de jeē nácani de jnūhun ndese ndácu Yaā Dios jniñu, jíin jéē nasávāha de ñayuu cácuñū. ³ Te ni cahān yā jíin de:

Ma cóndiso ró jéē cuajniñu ró ichi, ni vara, ni ñunu, ni staā, ni xūhún. Te quihīn rō jíin ñin-ni camisa, te ma cóndiso ró inga. ⁴ Te na-ni vehe núu ni quívicoo ró, te yūcuán coyūcu ró nde quenda tucu ró quíhīn rō inga ñuu.

⁵ Te núu ñin ñuu tu cájetáhú i róhó, na quéndacoo ró yúcuan, te scóyo ró tícachā jehē rō, te súcuan stéén rō jeē iyó cuéchi i jeē tu ní cájetáhú i. Achí yá.

⁶ Te ni quendacoo de cuahān de, ni cajica nuu de tācá ñuu, ni canacani de jnūhun jnáma Yaā Dios ñayuu. Te tāca lado ni canasávāha de ñayuu cácuñū.

Jeē ni jíñi Juan tēe scuándute

(Mt. 14.1-12; Mr. 6.14-29)

⁷ Te Herodes, tēe cúu gobernador, ni jini jnūhun de tācá jniñu sáha Jesús. Te ni cunéé ni de, chí cájeni ni sava ñayuu cácahān i jeē Juan ni natecu de. ⁸ Te sava ga i cácahān jeē ní nane Elías, tēe ni nacani jnūhun Yaā Dios nde jenahán. Te sava ga i cácahān jeē ñnga tēe ni nacani jnūhun ya nde jenahán, ní natecu de. ⁹ Te ni cahān Herodes:

Juan chí ni ndacu ri jniñu ni tahndē xinī. Núu súcuan ¿te ndé tēe cúu tēe yáha jeē jíni jnūhun ri jeē sáha de jniñu jéñu? Achí de.

Te ni nducú Herodes modo coto de nuū Jesús.

Jeē ni scáji yā uhūn mil tēe

(Mt. 14.13-21; Mr. 6.30-44; Jn. 6.1-14)

¹⁰ Te ni ndecoo tēe cácuu apóstol jeē ní tají yá ni canacani jnūhun. Te ni cacachi de nuū yā tācá jniñu ni casáha de. Te ni jeca ya de cuahān sñn ya jíin de ñn lugar nuū tú ñayuu, yajni ñuu Betsaida. ¹¹ Te ni cajini ñayuu, te suni cuangoo i. Te ni jetáhú yá i, te ni nacani ya jnūhun ndese ndácu Yaā Dios jniñu, te ni nasávāha ya ñayuu cácuñū.

¹² Te nuū cuáhini, te ni quecoo ndihúxí uū tēe cáscuáha jíin yá, te ni cacahān de jíin yá:

Tají ní ñayuu cuehē yāhá na quíngoo i tācá ñuu jíín táca rancho yajni yāhá, te nducú i nuū ndóo i te cuaan i jeē caji i, chi tú na vé iyó yáha, áchí de.

¹³ Te ni cahān yā jíín de:

Cuāha máá ró jeē caji i, áchí yá.

Te ni cacahān de:

Tú na vé cánevāha ná, chi uhūn-ni staā jíín úū-ni chācá. Te vēsú núu quicuaan ná stāā caji ndihi ñayuu cuehē yáha, te ni ma cúu, áchí de.

¹⁴ Chi iyó nájñūhun uhūn mil tēe. Te ni cahān yā jíín tēe cáscuáha ún:

Cahān jíín ñayuu na cúcōo sñin cincuenta cincuenta i, áchí yá.

¹⁵ Te súcuan ni casáha de, te ni cacucōo ndihi ñayuu.

¹⁶ Te ni quihin ya ndihúhún staā jíín úū chācá un, te ni ndacoto ya ichi ándiví, te ni nacuatáhu yá. Te ni tahu cuéchí yá staā ún, te ni jēhe ya nuū tēe cáscuáha jíín yá, te ni casaja de nuū ñayuu cuehē. ¹⁷ Te ndivii i ni cayeji, te ni candutú chíji i. Te ni canastútú de pedazo staā jeē ní quendōo, te ni chitú úxī uū jīca.

Jeē ní cahān Pedro jeē Jesús cúu Cristo

(Mt. 16.13-19; Mr. 8.27-29)

¹⁸ Te ñin quiví ni cusñin Jesús, jícán tahu yā, te máá-ni tēe cáscuáha un cáhīin de jíín yá. Te ni cajñūhun yá de:

Ruhū, ¿ndé ñin cúu ri cácahān ñayuu? achí yá.

¹⁹ Te ni cacahān de:

Sava i cácahān jeē cúu ní Juan tēe ni scuándute. Te sava ga i cácahān jeē cúu ní Elías, tēe ni nacani jñūhun Yaā Dios nde jenahán. Te sava ga i cácahān jeē inga tēe ni nacani jñūhun ya ní natecu de.

²⁰ Yūcuán na te ni cajñūhun yá de:

Te máá ró, ¿ndé ñin cúu ri cácahān rō?

Te ni cahān Pedro:

Máá ní cúu Cristo, Yaā ní tají Yaā Dios, achí de.

Jeē ní castūhún Jesús jeē cúu yā

(Mt. 16.20-28; Mr. 8.30-9.1)

²¹ Yūcuán na te ni ndacu nihin ya jniñu nuū de jeē ma cáchi de jnūhun yáha núu ní ñn ñayuu. ²² Te ni cahān yā:

Máá rí, Yaā ní nduu tēe, cánuú ndoho xeēn rī. Te tāca tēe jéhnu jíin sūtū cácujuhnu jíin tēe cástéén tutu ley, squéhichī de ruhū. Te cahni de ruhū, te nuū uní quivī te natecu rī, achí yá.

²³ Yūcuán na te ni cahān yā jíin ndihi de:

Na-ni ñayuu núu cúní i condiquin i ruhū, na cási i jeē cuní maá i, te na cóndiquin i ruhū tāca quivī, te cuāha i jnūhun ndoho i jnūndóho jeē siquí rī, vēsú na cúu i. ²⁴ Chi núu ndé ñáyuu cuní i cācu i nuū jnūndóho quiji nuū i jeē siquí ruhū, núu súcuan te jnahnū ndetū i nñ cáni. Te núu ndé ñáyuu, vēsú na cúu i jeē siquí ruhū, te cotecu i nñ cáni. ²⁵ ¿Chi ndé cuajniñu vēsú na cúndeyí ñayuu nihin i nñ ñáyiví, te núu squiví i maá i nuū jnahnū ndetū i nñ cáni? ²⁶ Chi núu na-ni ñayuu cúcanu i jeē siquí ruhū, Yaā ní nduu tēe, jíin siquí jnūhun cáhān rī, suni súcuan cucanu rī jeē siquí maá i, quivī ndíji ri. Te quivī ún chi yōhyo luu cujéhnu ri, nájñūhun cújéhnu Tátá rī, te suni cácujuhnu ndajéhé ndoo ya sáha ya. ²⁷ Te jendaá cahān rī jíin ró jeē sava tēe cáhiin yáhá, ma cúu de chi nde cuni de jeē ndácu Yaā Dios jniñu jíin poder yā. Achí yá.

Jeē tucu ni nduu ya

(Mt. 17.1-8; Mr. 9.2-8)

²⁸ Yūcuán na te nájñūhun nuū uná quivī jeē ni cáhān yā jnūhun yáha, te ni caa ya ñn yucu, cuacacān tahu yā. Te Pedro jíin Jacobo jíin Juan cuango de jíin yá. ²⁹ Te níní jícán tahu yā, te tucu ni nduu nuū yā, te sahma ya ni nducujín quiyi, te ndíndē. ³⁰ Yūcuán na te ni canecoo

uū tēe, cándajnūhún de jíin yá. Te cúu de Moisés jíin Elías, tēe ni cahīyo jenahán. ³¹ Te luu ndíndēe de cáhiin de, te ni cacahān de jíin yá siquī jeē ní cuyajni cuu yā ñuu Jerusalén. ³² Te Pedro jíin tēe cáyūcu jíin de, yōhyo cájii de māhná, te vēsú súcuan te tu ní cáquixī de. Te ni cajito de jeē lúu ndíndēe yá jíin ndíndúú tēe cáhiin jíin yá. ³³ Te nuū ní cacujiyo tēe un núu yā, te ni cahān Pedro jíin yá:

Maestro, nacā jeē váha jeē cáhiin ná yáha. Te na sáha ná únī vehe ramada, ñin cuu máá ní, ñnga cuu Moisés, te ñnga cuu Elías, achí de.

Te tu sáha de cuenta na vé cúu jeē cahán de. ³⁴ Te níni cáhán de súcuan, te ni quee vicō nūhun ní jesi nuū de jíjnáhan de. Te ni cayūhú de jeē cáhiin de chíji vicō ún. ³⁵ Te nuū vicó un ní cahān ñin jnūhun:

Yáha cúu Sēhe ri jeē maní ndasí rí jíin. Te na cúni nahín ró jnūhun cáhán yā, achí.

³⁶ Te nuū ni jínu ni cahān jnūhun ún, te máá ñin na Jesús ñin ya nuū de. Te máá de tu ní cácahān cuiti de, te tāca quivī ún tu ní cácachí de nuū ni ñin jeē súcuan ni cajito de.

Jeē ní nasávāha ya ñin sūchi ñúhun tachī ini

(Mt. 17.14-21; Mr. 9.14-29)

³⁷ Te ñnga quivī un ní nanuu ya yucu jíin de. Te cuehē ñayuu ni jejnahan i ya. ³⁸ Te mēhñu ñáyuu cuehē un ní cana jee ñin tēe:

Maestro, jícan tahu na núu ni jēe condēhe ní sēhe yí ná, chi máñúhún i nuū ná. ³⁹ Te máni jeē sáha xeēn tachī jíin i, te cána cóhó i sáha, te jéhni yíhí i, te jée tiñū yuhu i. Te yōhyo stóho i, te yōhyo uhū siaá i. ⁴⁰ Te ni cahān ndahú ná jíin tēe cáscuáha jíin ní jeē na quénehen te tachī ún, te tu ní cúu sáha de, áchí de.

⁴¹ Te ni cahān yā jíin de jíjnáhan de:

Ñayuu yōhyo ñihni ni cácuu ró, chi tu cácdáje ró jéē cuu nduvāha i. ¿Nasaa ga quivī condee rī jíin ró jeē

cuándeŷ ni rī jín ró? Cuáquihin sēhe ró na quíji i, áchí yá.

⁴² Te níní véji i nuū yā, te ni cotúú i ni sáha tachī, te ni jehni yīhí i. Te Jesús ni cahān xeēn yā nuū tachí un, te ni nasávāha ya sūchí un, te ni nacuāha ya i nuū tatá i. ⁴³ Te ndivii ñayuu nahán ní canaa ni i cájito i jeē yóhyo jéhnú jniñu sáha Yaā Dios.

Jeē ni cáhān tucu ya jeē cúu yā

(Mt. 17.22-23; Mr. 9.30-32)

Te níní canaa ni i cájito i tācá jniñu ni sáha Jesús, te ni cahān yā jín tée cáscuáha jín yá:

⁴⁴ Chuhun vāha ni rō jnūhun cáhán rī yāhá, te ma náā ni rō, chí ruhū, Yaā ní nduu tēe, nastúu i ruhū quīvi ri ndaha tāca tée xeēn, achí yá.

⁴⁵ Te tu ní cájecūhun ni de jnūhun cáhán yā, chí tu ní cúu cuiŷi jecūhun ni de. Te ni cayūhú de cajnūhún de ya siquī jnúhun ni cahān yā.

Ndé ñáyuu cúu jeē cújéhnú ga

(Mt. 18.1-5; Mr. 9.33-37)

⁴⁶ Yūcuán na te tēe cáscuáha jín yá ni caquejéé de cácahān de siquī núu ndé ñin de cújéhnú ga. ⁴⁷ Te Jesús ni jini yā jeē súcuan cájeni ni de. Te ni jniñ ya ndaha ñin sūchi lúlí, te ni jeni ya i xiin ya. ⁴⁸ Te ni cahān yā jín de:

Na-ni ñayuu núu jeē siquí ruhū jetáhú i sūchi lúlí yáha, te ruhū jetáhú i. Te ñayuu jetáhú rúhū, suni jétáhú i Yaā ní tají rúhū vēji ri. Te ñayuu núu ga mēhñu ró, máá i cújéhnú ga, achí yá.

Ñayuu tu cáhán siquī yā, ñin i jín yá

(Mr. 9.38-40)

⁴⁹ Yūcuán na te ni cahān Juan:

Maestro, ni cajito ná ñin tēe jeē jíin sǎhví ní quénehen de tachí ñin ñayuu. Te ni cajesi na jéē sáha de, chi tu jíca de jíin yó, achí de.

⁵⁰ Te ni cahān Jesús jíin de:

Ma cási rō jeē sáha de, chi tēe tu cáhán siquī yō, ñin de jíin yó, achí yá.

Jeē ni cáhān yā nuū Jacobo jíin Juan

⁵¹ Te ni cuyajni quivī jeē quínuhun yā andiví, te ni tee téyí ni yā jeē quihín yā ñuu Jerusalén. ⁵² Te ni tají yá sava tēe yósnúu de jíin jnúhun jeē jinú yā. Te cuango de ñin ñuu Samaria návāha nducú de nuū ndóo ya. ⁵³ Te ñayuu Samaria un tu ní cájēhe i vehe ndóo ya, chí ni cajini i jeē ndé Jerusalén quihín yā. ⁵⁴ Te Jacobo jíin Juan, tēe cáscuáha jíin yá, ni cajini de jeē súcuan cúu, te ni cacahān de jíin yá:

¿A cúní ni jéē ndácu yó jniñu quiji ñuhūn nde andiví, nájnūhun ni sáha Elías, návāha naa ñayuu yáha? Achí de.

⁵⁵ Yūcuán na te ni ndió cóto Jesús nuū de, te ni cahān yā nuū de:

Tu cájini rō na nuū vēji jnūhun cácahān rō. ⁵⁶ Chi ruhū, Yaā ní nduu tēe, tú vēji ri jeē snāā rī ñayuu, chi sa suhva jeē jnáma ri ñayuu, achí yá.

Yūcuán na te cuahān yā jíin de ñga ñuu.

Siquī ñáyuu jeē cácuni i condiquīn i ya

(Mt. 8.19-22)

⁵⁷ Te níin jíca ya ichi jíin de, te ni cahān ñin tēe jíin yá: Condiquīn na níhín quihín yō ndé-ni cúu-ni nuū quihín ni, achí de.

⁵⁸ Te ni cahān Jesús jíin de:

Tāca ñúcuui, íyó yáū cava cáñuhun tī. Te suni saa, iyó táca tī. Te ruhū, Yaā ní nduu tēe, tú nuū cusú rī, achí yá.

⁵⁹ Te ni cahān yā jíin ñga de:

Condiquīn ruhū na quíhín yō.

Te máá téé un ní cahān de:

Condetu ní ndé na quíchindūji ná tátá na xíhna gā.
Yūcuán na te condiquīn na níhín, áchí de.

⁶⁰ Te ni cahān Jesús jíin de:

Stóo tāca ndīyī na chíndūji jnáhan ndīyī, chí ndīyī cácuu ñayuu tu cácanđije. Te róhó, cuáhán te nacani ró jnúhun ndese ndácu Yaā Dios jniñu, áchí yá.

⁶¹ Yūcuán na te suni ni cahān inga de:

Cúní na condiquīn na níhín, te cuāha ní jnúhun jeē xíhna gā quicahān na jíin ñáyuu cáyūcú vehe ná, áchí de.

⁶² Te ni cahān Jesús jíin de:

Núu na-ni tēe quéjéé de condiquīn de ruhū, te núu máni jeē nácani cuihyá ni de siquī tāca jéé ni stóo de, núu súcuu te cúu de nájnūhun ñn tēe jítu jíin yátá, te jícó cóto de ichi vehe de. Te ma cuajniñu de condiquīn de ruhū siquī jniñu ndácu Yaā Dios, achí yá.

Jeē ní tají yá unī xico uxī de

10

¹ Te ná ni cuu tācá jniñu yáha, te máá Jítóho yō ni nacāji ya unī xico uxī gā de. Te ni tají yá ndihuū ndihuū de jeē cósnūú de nuū yā, quingoo de tācá ñuu jíin táca lugar nuū jé yajni quihín maá yá. ² Te ni cahān yā jíin de:

Ñayuu yáha cácuu i nájnūhun trigo jeē tahndé, te ndaā jeē cuehē cúu, te tēe cahnde chí jecu-ni de cúu. Núu súcuu te cacān tahu rō nuū maá Jítóho rō Yaā Dios jeē na tájí yá cuehē tēe na quíngoo de cahnde de trigo, cúu jeē nacani de jnúhun ya nuū ñáyuu. ³ Te cuángoo jíjnáhan ró, te na cástūhun rí nuū rō jeē tají rí rohó quíngoo ró nájnūhun londe mēhñu yíhī. ⁴ Te ma cóndiso ró ñunu, ni yijni xūhún, ni ndijēn. Te ichi ma cucuéé ró ndajnūhun ró jíin ni ñn. ⁵ Te na-ni vehe núu ni quívi ró, te xíhna gā

cahān rō: Na quíji jnūhun ndeyí jnūhun sī ni nuū rohó, ñáyuu vehe yáha, achi rō. ⁶ Te núu vehe yúcuan íyo ñáyuu vāha, te jnūhun ndeyí ní cahān rō jinū siquī i. Te núu tuú, te jnūhun ndeyí ní cahān rō ma jinú siquī i. ⁷ Te suni vehe yúcuan coyūcu ró, te caji rō coho ró jéē cuáha ñáyuu nuū rō. Chi siquī jniñu jeē nácani ró jnúhun nuū ñáyuu, te cánuú coto i rōhó. Ma quéndōo ró tijni vehe, chi ñin-ni vehe. ⁸ Te na-ni ñuu núu ni quivícoo ró, te núu cuatáhú i rōhó, te caji rō tāca jéē cuáha i nuū rō. ⁹ Te nasávāha ró ñáyuu cácuñu ñuu yūcuán. Te cachi rō nuū i: Je ni cuyajni Yaā Dios jeē ndacu ya jniñu nuū rō, achi rō. ¹⁰ Te na-ni ñuu núu ni quivícoo ró, te núu tu ní cájetáhú i rōhó, te quendacoo ró ini calle yūcuán, te cahān rō: ¹¹ Nde ticachā ñuu rō yāha jéē ni jnī jehē rī, na náscóyo ri jeē cúu seña jeē iyó cuéchi ró jéē tu ní cájetáhú ró. Te na cónahán ró jeē Yaā Dios je ni cuyajni ya jeē ndacu ya jniñu nuū rō nuú. ¹² Te cáhán rī jín ró jeē quiví juicio te xeēn gā coo castigo siquī ñuu casáha súcuan vēsú siquī ñuu Sodoma nuū ní casáha ndasí ñáyuu cuéchi.

*Jeē ní cuxeēn yā nuū sava ñuu niñni ni
(Mt. 11.20-24)*

¹³ Nacā jeē xeēn ndoho ró, ñáyuu ñuu Corazín. Te nacā jeē xeēn ndoho ró, ñáyuu ñuu Betsaida. Chi núu ini ñuu Tiro jín ñuu Sidón ni sáha ri jniñu jéñu jeē ni sáha ri ini ñuu maá ró, te yachī nacani ni ñáyuu ñuu un jéē stóo i cuéchi i núú. Te sáha i seña jeē steén jeē nácani ni i siquī cuéchi i, chi cuhun i sahma jnúú te chuhun i yaā xinī i núú. ¹⁴ Núu súcuan te quiví coo juicio te xeēn gā coo castigo siquī rō jijnáhan ró vēsú jeē ni íyo siquī ñuu Tiro jín ñuu Sidón. ¹⁵ Te rōhó ñáyuu ñuu Capernaum, ¿á cájeni ni rō jeē cujéñu ró nájñuhun ñin jeē cáa cuahān ichi ándiví?

Tuú chi sa nanuu ró ndé lugar nuū cáyūcu ánuá ndīyī. Achí yá.

¹⁶ Te ni cahān gā yā jíin tée jeē tají yá quingoo:

Ñayuu chusóhó jnúhun cahān rō, nuū maá rí chusóhó i. Te ñayuu squéhichī rohó, suni ruhū squéhichī i. Te ñayuu squéhichī ruhū, suni squéhichī i Yaā ní tají rúhū vēji ri. Achí yá.

Jeē ní ndecoo tēe ni tají yá

¹⁷ Te ni ndecoo unī xico uxī tēe un, cácusī ni de te cácahān de jíin Jesús:

Nde tachī cájetáhú núū na jéē jíin síhví ní, chi quéndacoo ini ñayuu, achí de.

¹⁸ Te ni cahān yā jíin de:

Súcuan cúu, chi ni jito ri jeē nájñūhun ìn taja ni níngava Satanás ichi ándiví, chi ni quende rī ndīhī poder un. ¹⁹ Te vijna te je ni jēhe ri fuerza nuū rō jeē cueñū rō nájñūhun síquī tāca cóō jíin tísuhma, te cundeyí ró síquī tāca fuerza maá jéē jíto uhū yohó, te tú na vé sáha ga jíin ró. ²⁰ Te ma cúsi ni rō maá-ni jeē cájetáhú táchī nuū rō, chi sa cusī gā ni rō jeē yosó síhví ró nde andiví. Achí yá.

Jeē ní cusī ni Jesús

(Mt. 11.25-27; 13.16-17)

²¹ Te suni hora un ní cusī ni Jesús, ni sáha Espíritu Santo, te ni cahān yā:

Na cútahū na núū ni Tátā, Jitoho andiví jíin ñáyīví. Chi ni jesi ni táca jnúhun ndíchí ní, jeē ma cúni ñayuu ndíchí jíin ñáyuu tūhva cuenta ñayīví yáha. Te ni steén ni núū ñáyuu cácuu nájñūhun sūchí lúlí. Chi súcuan ni nujnahan ni ni Tátā, achí yá.

²² Te ni cahān gā yā:

Ndivii ni jēhe Tátá rī nuū rī. Te tu cájini ñayuu ndé ìn cúu ruhū, Sēhe Yaā Dios, chi máá-ni Tátá rī cúu jeē jini

yā ruhū. Ni tu cájini ñayuu ndese Yaā cúu máá Tátá, chi máá-ni Sēhe cúu jeē jiní. Te íyó ñáyuu jeē cuní maá Séhe stéén yā nuū i ndese Yaā cúu Tátá yā, te máá i suni cuni i. Achí yá.

²³ Yūcuán na te jíto ya nuū tée cáscuáha ún, te ni cahān yā jíin máá-ni de:

Yōhyo ndetū ñayuu cájito jniñu jéhnū jeē cájito máá ró.

²⁴ Chi cáhán rī jíin ró jeē cuehē tēe ni canacani jnūhun Yaā Dios, jíin táca rey, ni cacuni de coto de jeē cájito máá ró, te tu ní cájito de. Te suni ni cacuni de cuni sōho de jeē cájini sōho máá ró, te tu ní cájini de. Achí yá.

Jnūhun ñin tēe vāha ni nación Samaria

²⁵ Yūcuán na te ñin tēe stéén tutu ley Yaā Dios, ni ndocuiñi de ni jecahān de jíin Jesús, chi cuní de coto ndee de ya. Te ni cajnūhún de:

Maestro, ¿na vé sáha ná te nihīn tahu na cotecu na ñí cáni andiví? áchí de.

²⁶ Te ni cahān yā jíin de:

¿Ndesé yósó núū tútu ley? ¿Ndesé cáhán cáhu ró? Achí yá.

²⁷ Te máá tēe un ní cahān de jeē cahán nuū tútu:

Coo manī ndasí ró jíin máá Jítóho rō Yaā Dios, nde jnāā ndasí ró sáha ró ndihī jeē cúsiñ ni yā, nde jíin ini jíin ánuá rō, jíin ñí fuerza rō, jíin ñí jéē níjnūní rō. Te cundáhú ni rō jnáhan ró nájnūhun cundáhú ni rō maá ró, achí. Achí de.

²⁸ Te ni cahān yā jíin de:

Vāha ni cahān rō. Te núu cuu sáha ró súcuan te nihīn tahu rō cotecu rō ñí cáni, áchí yá.

²⁹ Te máá tēe un cuní de jeē quéndōo ndaā de nuū yā jíin jnúhun ni cajnūhún de, te ni cahān de:

¿Te ndé ñáyuu cácuu jnáhan ná? áchí de.

³⁰ Te ni cahān Jesús:

Īn tēe ni quenda de ñuu Jerusalén, ni cuun de cuahān de ñuu Jericó. Te ichi un ní canecoo ñacuīhna núū de, te ni caquende ndīhi ndajníñu de, te nde sahma ñúhun de. Te ni cacani ndevāha ún de jeē jé yajni cuu de núú. Te ni castóo ún de, te cuangoo. ³¹ Te ni cuu jeē íchi un yáha ĩn sutū quihīn de, te ni jito de nuū tée ún, te ni síyo-ni de cuahān de. ³² Te suni súcuan ĩn tēe grupo levita jeē cájejníñu ini templo, vēji de ichi ún, te ni jito de nuū tée ún, te ni yāha jíca-ni de cuahān de. ³³ Te ĩn tēe nación Samaria, suni vēji de ichi ún, te nuū ní jito de, te ni cundáhú ni de tēe ún. ³⁴ Te ni quee de nde nuū catú tée ún, te ni chuhun de aceite jíin vino nuū ni túji tēe ún, te ni jihni de sahma nuū. Te ni soó de tēe un síquī quitī de, te cuahān de jíin tée un ndé ĩn mesón, te ni condito de. ³⁵ Te ĩnga quivī ún, hora jeē quihín de, te ni tava de uū xūhun cáa, ni jēhe de nuū tēe chíí mesón. Te ni cahān de: Coto ní tée yáha, te núu caxīn gā ni xūhun ní jíin de, te nuū nándicó ná te nachunaa ná núū ní, áchí de. ³⁶ Núu súcuan ¿te ndese jéni ni rō? Jeē ndīnúní tée ún, ¿ndé ĩn de ni chihi cuenta jeē jnāhan de cúu tēe ni canecoo ñacuīhna núū? Achí yá jíin tée stéén tutu ley.

³⁷ Te ni cahān de:

Tēe jeē ní cundáhú ni tēe ni tujī, vēsú tēe ñuu jíca cúu de.

Yūcuán na te ni cahān Jesús jíin de:

Cuáhán núu súcuan, te suni súcuan cundáhú ni rō tāca ñáyuu, achí yá.

Jeē ni íne ya vehe Marta jíin María

³⁸ Yūcuán na te ni quihīn tucu ya ichi cuahān yā, te ni jinū yā ĩn ñuu lulí. Te ĩn ñahan nání Marta, ni cana ña ya ni jehēn yā vehe ña. ³⁹ Te Marta, íyó ĩn cuhū ña nání María. Te María ni cucōo ña nuū jehé Jesús, jíni nahín ña

jnūhun cáhán yā. ⁴⁰ Te Marta chi cúnée máá ña jíin cuéhē jniñu sáha ña. Te ni quee ña nuū yā, te ni cahān ña:

¿A tu sáha ní cuenta jeē cuhū na ní stóo máñúhún ña sãña núū jniñu? Te cahān ni jíin ña na chíndéé ñáhán ña sãñá, áchí ña.

⁴¹ Te ni cahān Jesús jíin ña:

Marta, yōhyo ndíhví ni rō jíin cuéhē jniñu, te yōhyo stóho ró máá ró jíin. ⁴² Te íyó ñn-ni jniñu cánuú. Te María chi ni nacāji ña jniñu cánuú, suu jeē ndíhví ni ña siquī jnúhun Yaā Dios, te ma quénehen yó ña nuū ún. Achí yá.

*Jeē ni stéén yā ndese cacān tahu yō
(Mt. 6.9-15; 7.7-11)*

11

¹ Te ñn quiñvī íne Jesús ñn lugar jicān tahu yā. Te nuū ní ndíhí ni jicān tahu yā, te ñn tēe scuáha jíin yá, ni cahān de:

Stéén ni núū ná ndese cacān tahu na jíjnáhan ná, nájnūhun ni steén Juan nuū tēe ni cascuáha jíin de, áchí de.

² Te ni cahān yā jíin de:

Jeē cacān tahu rō, te suhva cahān rō:
Tátá maá ná jíjnáhan ná jēē ndeé ní andiví,
níní na cóo yíñúhún ná nuū ní, chi Yaā ñi cóo ní.
Te ñúhun ni na jēē yachí quiñvī ndacu ní jniñu ñí
ñáyiví yáha.

Te na cóo tācá jniñu nújnahan ni ní,
nájnūhun íyó ini andiví, súcuan na cóo ini ñáyiví.

³ Staā jeē cátecu na táca quiñvī, cuāha ní núū ná vijna.

⁴ Te cone cáhnu ni ni núū tāca cuéchi cásáha ná núū ní,
nájnūhun cáhine cáhnu ni na núū ñáyuu casáha cuéchi
nuū ná.

Te ma cuáha ní jnúhun jeē coto ndee jexeén sãñá,
chi sa suhva jnama ní sãña nuū tāca jēē neé.

Achi rō jijnáhan ró. Achí yá.

⁵ Te ni cahān gā yā:

Núu ndé ñn róhó íyó ñn amigo rō, te núu quihīn rō vehe de sava ñuú te cahān rō jiín de: Amigo, cuāha núu unī staā nuū rī. ⁶ Chi ñn amigo rī jeē jíca de viaje, ni quee de vehe rī, te tú na vé névāha rī jeē cuáha rī caji de. Achi rō. ⁷ Te núu cahān tēe íne ini vehe: Ma stáhān rō ruhū, chi ndíhyú yehyí rí, te je cáquixī sēhe rī jiín rí, te ma cúu ndonda rī jeē cuáha rī nuū rō, achi de. ⁸ Te cáhān rī jiín ró, vēsú ma ndónnda de cuāha de nuū rō siquī jeē cúu de amigo rō, te jeē yóhoyo stáhān rō de, jeē yúcuan ndonda de cuāha de ndihī jeē jíni ññhún ró. ⁹ Núu súcuan te cáhān rī jiín ró jijnáhan ró jeē suni súcuan cacān tahu rō nuū Yaā Dios, te cuāha ya nuū rō. Te nducú ró tāca jēē váha íyó núu yā, te nihīn rō sáha ya. Te cacān tahu rō nde nihīn rō, nájñuhun sáha ñayuu cahán yehyí ndé nune quīví i. ¹⁰ Chi tāca ñáyuu jicán, cuāha ya nuū i. Te ñayuu nducú, suni nihīn i. Te ñayuu cahán, nune ya ichi nihīn i jeē cuní i.

¹¹ ¿Te ndé ñn ró cúu tátá, te núu sēhe ró jícan i staā nuū rō, te á cuáha ró ñn yuū nuū i? Te núu jícan i chācá, ¿te á cuáha ró ñn coō nuū i? ¹² Chí núu jícan i ñn ndivī, ¿te á cuáha ró ñn tisuhma nuū i? Tú cuítī súcuan. ¹³ Núu súcuan te máá ró jijnáhan ró, vēsú ñáyuu iyó cuéchi cácuu ró, te cájini rō cuāha ró jēē váha nuū séhe ró. Te nagā ni cuu máá Tátá rō andiví jēē ma cuáha ya Espíritu Santo nuū ñáyuu jícan nuū yā. Achí yá.

Jeē ní cacahān de jeē jejniñu ya fuerza Satanás

(Mt. 12.22-30; Mr. 3.19-27)

¹⁴ Te quénehen ya ñn tachī ini ñn tēe, jeē ní cuñhín de ni sáha. Te nuū ní quenda tachī, te ni nacahān tēe ni cuñhín un. Te ni canaa ni ñayuu cájito i. ¹⁵ Te sava ñayuu ún chi ni cacahān i:

Jíin fuerza Satanás jeē cujéhnu nuū tachí, quénehen tēe yáha táca táchī ini ñayuu, achí i.

¹⁶ Te sava ga i cúní i coto ndee i ya, te ni cajicān i jeē sáha ya jeē coo ñin seña ichi ándiví. ¹⁷ Te máá yá jiní yā jeē súcuan cájeni ni i, te ni cahān yā:

Tācá nación jeē sasñin máá te cuajnáhan máá, núu súcuan te snāa jeē iyó váha máá. Te núu ñayuu ñin vehe sásñin máá te cuajnáhan máá, núu súcuan te ma cúu ga coyūcu cáhnu. ¹⁸ Te suni súcuan Satanás, núu sásñin máá jíin jnáhan tachī, ¿te ndese cuiñi ñihin jeē ndácu jniñu núu súcuan? Chi cácahān rō jeē jíin fuerza Satanás quénehen ri tachī ini ñayuu. ¹⁹ Te núu súcuan cúu núu, te ñayuu cascuáha jíin máá ró jijnáhan ró, ¿na jíin fuerza cáquenehen máá i tachī, cájeni ni rō? Núu súcuan te máá i jíjnáhan i cachi jeē ní castívi ndasí ró ni cacahān rō jeē cáquenehen ri tachī jíin fuerza Satanás. ²⁰ Te tuú chi sa suhva jíin fuerza Yaā Dios cúu jeē quénehen ri tachī. Núu súcuan te je ndéé Yaā Dios mēhñu ró jeē ndácu ya jniñu.

²¹ Te núu ñin tēe ndacuī, ndíto de vehe de jíin nújíi de, núu súcuan te tú ni ñin ndajníñu de ndoñúhún. ²² Te núu quiiji inga tēe ndacuī gā, te cundeyí jíin tēe ún, núu súcuan te quende nujíi de jeē ndíto de vehe de, te sáha de ndese cúní maá de jíin ndajníñu jeē quende de. Te nájnūhun tēe ndacuī gā ún, súcuan cúu máá rí nuū Satanás.

²³ Te ñayuu tu íyó mání jíin rí, núu súcuan te jíto uhū i ruhū. Te ñayuu tu nástútú jíin rí, núu súcuan te sa jéte núu i ñayuu vejicoo nuū rí.

Tachī jeē nastútú jnáhan ndívi ini ñayuu

(Mt. 12.43-45)

²⁴ Núu ni quenda ñin tachī ini ñin tēe tu cándíje, te jíca cuu nuū ñūhun téhé, ndúcú núu ndétátú, te tu níhín, yūcuán na te jéni ni maá: Na quínuhun rí vehe nuū ní quenda ri. ²⁵ Te núu ni ndee tucu, te jíto jeē tēe tu cándíje

un cúu de nájnūhun ñin vehe jeē ní ndundoo. ²⁶ Yūcuán na te jéquihin uxā gā tachī xeén gā vēsú maá. Te quívicoo ini tēe un jēē cóyūcu yúcuán. Núu súcuán te xeén gā ndoho tēe un jēē sándīhí vēsú jeē xīhna ñúhún. Achí yá.

Yōhyo ndetū ñayuu cájini nahín jnúhun ya

²⁷ Te níni cáhán yā jnúhun yáha, te ñin ñahan íne mēhñu ñayuu cuehē un, ní cahān jee ña jíin yá:

Yōhyo ndetū ñahan ní scácu níhín te ni scáxin ña níhín, áchí ña.

²⁸ Te ni cahān yā:

Sa suhva yōhyo ga ndetū ñayuu cájini nahín jnúhun Yaā Dios te cásquícu i, áchí yá.

Jeē ní cajicān ñayuu tu cácadíje ñin jniñu jéhnu

(Mt. 12.38-42; Mr. 8.12)

²⁹ Te ni cataca cuehē gā ñayuu nuū Jesús, te ni quejéé yá cahán yā:

Ñayuu iyó vijna máni cásáha néé i. Te cájicān i ñin jniñu jéhnu jeē steén núu Yaā ní tají Yaā Dios cúu ri. Te tú na inga jniñu jéhnu stéén rī nuū i, chi máá-ni jniñu jéhnu nájnūhun ni cuu jíin Jonás, tēe ni nacani jnúhun Yaā Dios nde jenahán. ³⁰ Chi nájnūhun ni cajini ñayuu ñuu Nínive jeē ní cuu ñin jniñu jéhnu jíin Jonás, suni súcuán cuni ñayuu tiempo yáha jeē coo ñin jniñu jéhnu jíin rúhū, Yaā ní nduu tēe, jeē quijnáhan jíin modo ni ndoho Jonás. ³¹ Te reina jeē ní cújéhnu nación ichi sur, natecu ña jíin ñayuu tiempo yáha, quivī juicio jeē sándaā yā cuēchi, te cahān ña cuēchi síquī i. Chi nde jicá téyí ní quiji ña ni jini nahín ña jnúhun ndíchí ní cahān rey Salomón. Te vijna chi cújéhnu ga ruhū, Yaā íne yáhá vēsú Salomón, te tu cácadíje ró rúhū. ³² Te tāca ñayuu ñuu Nínive nuū ní nacani Jonás jnúhun, natecu i jíin ñayuu tiempo yáha, quivī juicio jeē sándaā yā cuēchi, te cahān i cuēchi síquī ñayuu yáha. Chi

máá i ni canacani ni i ni castóo i cuēchi i quivī ní nacani Jonás jnūhun nuū i. Te vijna chi cújéhu ga ruhū, Yaā íne yāhá vēsú Jonás, te tu cá candije ró rúhū.

Jnūhun yátá síquī lámpara

(Mt. 5.15; 6.22-23)

³³ 'Núu nástín ñayuu ìn lámpara, tu chísāhí i, ni tu chúne i chíji ìn cajón. Chi sa suhva jéni i nuū sucún, návāha cundijin nuū ñáyuu quívicoo vehe. ³⁴ Te tinūu ró cúu nájñūhun lámpara nuū yiqui cúñu rō. Núu súcuan te núu tinūu ró íyó ndijin, te ní-ni yiqui cúñu rō cundijin. Te núu tinūu ró tu íyó ndijin, te ní-ni yiqui cúñu rō íyó nee. ³⁵ Te suni súcuan cúu ánuá rō, te coto ró jēē ma cáni néé ni rō, návāha tú coo nee ini anuá rō. ³⁶ Chi núu máni jniñu váha cásáha ró, te tú na jniñu néé cásáha ró, núu súcuan te luz yā cundijin vāha ini anuá rō, nájñūhun ìn lámpara jeē sáha jeē cundijin vāha. Achí yá.

Jeē ni cáhān yā jeē iyó cuēchi de jijnáhan de

(Mt. 23.1-36; Mr. 12.38-40; Lc. 20.45-47)

³⁷ Te nuū ní cuu ni cahān yā, te ìn tēe grupo fariseo ni cana de ya jeē caji yā staā vehe de. Te ni quívi ya, te ni cucōo ya mesa jeē caji yā staā. ³⁸ Te tēe fariseo un náā ni de jító de jeē tu squícu ya costumbre jeē nandahá yá te caji yā staā. ³⁹ Te ni cahān máá Jítóho yō jíin de:

Róhó tēe fariseo jijnáhan ró, chi nájñūhun jeē cánacate ró yátā vaso jíin yátā cohó cúu jeē nandahá ró. Te ichi íni rō chi ñūhun máni máá jnúhun cuíhná jíin jnúhun néé. ⁴⁰ Tēe cánéé cácuu ró. ¿A tu cājini rō jeē Yaā ni sáha yiqui cúñu rō, suni ni sáha ya anuá rō? ⁴¹ Te jeē cājēhe ró caridad nuū ñáyuu ndahú, na sáha ró síquī jeē cundáhú ndije ni rō i. Te súcuan te coo ndaā anuá rō.

⁴² 'Nacā xeēn ndoho róhó tēe fariseo, chi cásquícu ró tācá jniñu lúli, te tu cásquícu ró jniñu cánuú. Chí cásáha

ró úxī uxī nuhnī tamīnu jíín ruda jíín táca yucū, te cásocō rō ññ siquī tāca úxī un núū Yaā Dios. Te tu cásáha cuiti rō jniñu ndaā, ni tu cáhiyo manī rō jíín Yaā Dios. Tāca jēē yáha cánuú sáha ró núú, te suni ma stóo ró jēē socó rō tāca yúcū ún.

⁴³ Nacā xeēn ndoho róhó tēe fariseo, chi máni cánu-jnahan ni rō cucōo ró núú silla yññhún gá ini vehe ññ sinagoga. Te cánujnahan ni rō jeē cahán yññhún ñáyuu jíín ró nuū calle.

⁴⁴ Te nacā xeēn ndoho róhó tēe cástéén tutu ley Yaā Dios, jíín róhó tēe fariseo, chi tēe stáhú-ni cácuu ró. Chi cándāa ró nájñuhun yaū ndīyī jeē tú ndijin, chi cásnāā rō anuá ñáyuu, te tu jíín i jeē súcuan cásáha ró jíín i. Achí yá jíín de.

⁴⁵ Yūcuán na te ni cahán ññ tēe stéén tutu ley:

Maestro, jeē ni cáhán ni táca jññhun yáha, suni nde siquī maá ná jíínáhan ná ní cahán ní, áchí de jíín yá.

⁴⁶ Te ni cahán yā:

Suni nacā xeēn ndoho róhó tēe cástéén tutu ley. Chi suni cástéén rō tāca ley ni catava maá ró jeē yññ sáha, te tu cácuñdeyī ñáyuu squícu i. Te máá ró, chi ni ññ xinī ndáha ró tu cáscánda ró jēē squícu ró.

⁴⁷ Nacā xeēn ndoho ró jíínáhan ró. Chi cásáha ró vehe siquī nuū yññdūji ndīyī jíí rō, tēe ni canacani jññhun Yaā Dios nde jenahán. Te suni tāca jíí rō ni cajehni de tēe ún.

⁴⁸ Te jeē casáha ró súcuan cúu jeē cáquijnáhan ró jíín de siquī jñññ ní casáha de. Chi máá de ni cajehni tēe ún, te máá ró cásáha ró vehe ndīyī ún.

⁴⁹ Jeē yúcuan nde jenahán ní cahán Yaā Dios ññ jññhun ndíchí: Tají rí tāca tēe nacani jññhun ri jíín táca tēe apóstol quingoo de nuū i. Te sava de cahni i, te sava ga de coto xeēn i, áchí Yaā Dios. ⁵⁰ Te súcuan te siquī ñáyuu tiempo yáha na cóndee cuēchi jeē ní cajehni jíí i tēe ni

canacani jnūhun Yaā Dios, nde quivī ni jécōo ñayiví te nde vijna, ⁵¹ nde Abel xīhna gā te nde Zacarías, tēe ni cajehni de ini templo sava mēhñu cuarto ii jín altar. Núu súcuan te cáhán rī jín ró jeē siquī ñáyuu tiempo yáha condee tāca cuéchi ún.

⁵² Nacā xeēn ndoho róhó jéē castéén tutu ley, chi cájesi rō ichi jeē jécūhun ni ñayuu jnūhun ya. Chi ni máá ró tu cācuni rō jecūhun ni rō, ni tu cájēhe ró jnúhun jeē jecūhun ni ñayuu cācuni. Achí yá.

⁵³ Te jeē ni cáhān yā jnūhun yáha, te tēe cástéén tutu ley Yaā Dios jín tēe fariseo, yōhyo ni caquitī ni de nuū yā. Te ni caquejéé de cástíchí de ya siquī cuehē gā jnūhun. ⁵⁴ Chi yuhu-ni cánducú de núu sanaa te stíví yá jnūhun cahān yā, návāha nihīn de cuēchi siquī yā.

Siquī jnūhun stáhu cācahān tēe fariseo

12

¹ Te níní súcuan cúu, te ni cacutútú cuéhē mil ñayuu, chi nde cájeñū i siquī jehé jnáhan i. Te xīhna gā ni quejéé yá cahán yā jín tēe cáscuáha jín yá:

Coto má candíje ró levadura tēe grupo fariseo, chi suu cúu jnūhun stáhu cācahān de. Chi jíté núu nuū ñáyuu, nájnūhun ndécava levadura nuū ñújen pan. ² Chi jnūhun stáhu un má quéndōo sāhí cuiti, chi ndihī natūu ndijin, te cuni ñayuu. ³ Núu súcuan te suni máá ró, tāca jnúhun ni cacahān rō jeē tu ní jíní ñayuu, ñn quivī te cuni vāha i. Te tāca jnúhun ni cacahān sāhi ró jeē ndihyú yehyí, ñn quivī te cahān jee ñayuu yatā tācá vehe.

Jeē ní cachi yā ndé ñn cúu jeē yūhu yó

(Mt. 10.28-31)

⁴ Cáhán rī jín ró jijnáhan ró, amigo: Ma yūhu ró coto ró ñáyuu cahni yiquí cúñu rō, chi núu ni cajehni i róhó,

te tuá na vé cúu sáha ga i. ⁵ Te na cáchi rī nuū rō ndé ñin yūhu ró coto ró: Jeē yūhu ró coto ró cúu Yaā Dios jeē núu sáha ya jeē cúu rō, te íyó poder yā chune ya rohó infierno. Suu máá yá cúu jeē yūhu ró jeē ma stívi ró nuū yā.

⁶ 'Te tǎcá saa chi tú yahu ndéé tī, chi nde uhūn tī jeē uú centavo lulí. Te ni ñin tī tu náā ni Yaā Dios jeē tu ndíto ya. ⁷ Te nagā ni cuu róhó jíjnáhan ró, chi nde ndíhi xini rō je ni cahu ya. Núu súcuan te ma yūhu ró jíjnáhan ró, chi cánuú ndasí gá rō nuū yā vésú cuehē tǎcá saa.

*Ñayuu jejnúhún Jesucristo nuū inga ñayuu
(Mt. 10.32-33; 12.32; 10.19-20)*

⁸ 'Te cáhan rī jíin ró, tǎca ñayuu jeē cuajnúhún rúhū nuū inga ñayuu, suni súcuan ruhū, Yaā ní nduu tēe, cuajnúhún rí i nuū tǎcá ndajéhé Yaā Dios. ⁹ Te tǎca ñayuu jeē ma cuájnúhún rúhū nuū inga ñayuu, suni súcuan ma cuájnúhún rí i nuū tǎcá ndajéhé Yaā Dios.

¹⁰ 'Te núu ndé ñayuu cahān i siquī ruhū, Yaā ní nduu tēe, cone cáhnu ni Yaā Dios nuū i. Te núu ndé ñayuu cahān ndevāha i siquī Espíritu Santo, ma cóne cáhnu ni Yaā Dios nuū i.

¹¹ 'Te núu cuandeca i róhó táca vehe ñi sinagoga nuū tēe cásandaā cuēchi, jíin núu tēe cácuu tohō, te ma nácani ndasí ni rō ndese stío cúñí rō jnūhun nuū de. ¹² Chi máá hora un te Espíritu Santo steén yā nuū rō ndese cahān rō. Achí yá.

Siquī jeē ma ténuū yō ndajníñu cúcá

¹³ Yūcuán na te ñin tēe ñne nuū ñayuu cuehē un ní cahān de jíin Jesús:

Maestro, cahān ni jíin ñani na jéē na táhú sáva de tahū na jíin de, áchí de.

¹⁴ Te ni cahān yā jíin de:

¿Ndé ìn ni jeni ruhū jeē ndacu ri jniñu tahū sáva tahū rō? Achí yá.

¹⁵ Te ni cahān gā yā:

Condito ró máá ró jijnáhan ró jéē ma ndíyo ni rō xūhun jíin táca gá. Chi vēsú cuehē ndasí ndajníñu névāha ìn tēe, te nasūu jéē yúcuan sáha jeē quéndōo ndetū de, áchí yá.

¹⁶ Yūcuán na te ni cahān yā ìn jnūhun yátá jíin i:

Ni ìyo ìn tēe cúcá jeē névāha ñuhun jeē cúu vāha ndasí itu. ¹⁷ Te tēe cúcá un ní nacani ni de: ¿Ndese sáha ri? Chi tuá ndé cuhun niñi ri. Achí de. ¹⁸ Te ni jeni ni de: Suhva na sáha ri. Na cánu rī tāca yácā rī, te nasáha ri jeē náhnu ga. Te yūcuán chuvāha ndihi ri niñi ri jíin táca ndajníñu ri. ¹⁹ Yūcuán na te cahān rī jíin ánuá rī: Vijna te cuehē teyí névāha yó jéē canda cuehē cuiyā. Na ndétātu yó te caji yō coho yó, te na cúsiñ ni yō, ni jeni ni de. ²⁰ Te ni cahān Yaā Dios jíin de: Tēe cánéé cúu ró. Chi jecuáa vijna cuu rō, te tāca jéē ní chuvāha ró, ¿ndé tēe cuu? Achí Yaā Dios jíin de. ²¹ Te súcuan ndoho tāca tēe jeē sacúcá de máá de, te tu ndúcú de jeē quendōo ndetū de sáha Yaā Dios. Achí yá.

Yaā Dios ndíto ya yohó

(Mt. 6.25-34)

²² Te ni cahān yā jíin tēe cáscuáha jíin yá:

Núu súcuan te cáhán rī jíin ró: Ma nácani ndasí ni rō siquī jeē cótecu rō, núu ndese caji rō, ni siquī sahma, núu ndese cuhun ró. ²³ Chi Yaā Dios ni sáha ya jeē técu rō jíin yiqui cúñu rō, te nagā ni cuu jeē ma cuáha ya jeē caji rō jíin jéē cúhun ró. ²⁴ Condēhe ró ndese cátecu quití cácuu nájnūhun cálú, chi tu cátaji ti, ni tu cánastútú tí jeē chuvéha ti, ni tú yacā tī. Te vēsú súcuan te máá Yaā Dios scáji yā tī. Te cánuú ndasí gá rō jijnáhan ró vēsú tācá quití ún. ²⁵ ¿Te ndé ìn ró, á cuu scuéhnu ró máá ró sava metro gā, vēsú na nácani ndasí ni rō? ²⁶ Te núu ma cúu sáha ró

vēsú ñin jniñu lúli súcuan, ¿te najehē cánacani ndasí ni rō siquī jeē caji rō jiín jéē cuhun ró?

²⁷ 'Condēhe jíjnáhan ró ndese jée ita tāca yúcū. Chi tu sájniñu, ni tu táú. Te cáhán rī jiín ró jeē ni rey Salomón, quivī ní ñúhun de sahma váha ndasí, tu ní ñúhun de sahma lúu súcuan nájnūhun ita ún. ²⁸ Te núu súcuan jéhe Yaā Dios sahma lúu ita un jéē jée vijna te sajnē cayū nuū ñuhún, te nagā ni cuu róhó jíjnáhan ró jéē ma sáha ya jeē nihín rō sahma. ¿Te naun tu cá candíje nihin ró jéē ndíto ya rohó? ²⁹ Núu súcuan te ma nácani cuihyá ni rō ndese caji rō ndese coho ró. ³⁰ Chi tāca ñáyuu ñayivī jéē tu cá candíje cúu jeē máni siquī jeē yáha cándihvī ni i. Te máá ró jíjnáhan ró, chi íyó Tátá rō andiví, te jíní yā jeē cājini ñúhún ró tāca jéē yáha. ³¹ Te sa suhva cánuú gá jeē cóndihvī ni rō siquī jniñu jeē ndácu Yaā Dios nuū rō. Yūcuán na te sáha ya jeē nihín rō tāca jéē yáha.

Ndese coo cúca yó nde andiví

(Mt. 6.19-21)

³² 'Ma yūhu ró jíjnáhan ró chi cácuu ró nájnūhun lanchi ri. Chi vēsú jecu-ni cácuu ró, te máá Tátá rō cúsi ni yā jeē quívicoo ró ñuu nuū ndácu ya jniñu. ³³ Xīco ró jeē cánevāha ró, te cuāha ró xúhun un núu ñáyuu ndahú. Te súcuan caya rō tahū rō nde andiví núu ma cútúhú, nájnūhun jeē chuvéha ró xúhun ini yijni. Chi nde andiví te ma náā jeē váha coneváha ró. Chi yūcuán má quívī ñacuínhá, ni ma cúu stívī tiquíxin. ³⁴ Chi nde nuū nihín rō tahū váha ró, yūcuán cúu nuū cóndihvī ni rō siquī.

Jeē na cóo tūhva yó jéē ndéē yā

³⁵ 'Coo tūhva ró jíjnáhan ró jéē ndéē Jitoho rō, te coo ró nájnūhun mozo jeē nastín i lámpara i. ³⁶ Chi íyó tūhva i te cándetu i jeē ndéē patrón i jeē cuahán de vico nándāha. Chi núu ni ndee de te cahán de, te nune-ni i yéhyí jíjnáhan

i. ³⁷ Te yōhyo ndetū mozo un núu ni ndee patrón i, te cuni de jeē cándito i. Jendaá cahán rī jíin ró jeē máá patrón sātūhva de máá de, te scúcōo de i mesa te cani de cohō i. ³⁸ Te vēsú cucuéeé de ndee de nde sava ñuú, chí jēē nēē gā, te núu cuni de jeē súcuan cándito mozo de, te yōhyo ndetū i jíjnáhan i núu súcuan. ³⁹ Te na jécūhun ni rō jeē cahán jnūhun yátá yáha: Tēe chíi vehe, núu ni jini de na hora quiiji ñacuihná, te condito de, te ma cuáha de jnūhun jeē sacuíhná vehe de núu. ⁴⁰ Te suni súcuan coo tūhva ró jíjnáhan ró, chí núu tuú, te máá hora jeē tú na vé cájeni ni rō, te ndee ruhū, Yaā ní nduu tēe. Achí yá jíin de.

Jnūhun mozo vāha jíin mozo tu squícu

(Mt. 24.45-51)

⁴¹ Yūcuán na te Pedro ni cajnūhún de ya:

¿A jíin máá-ni ná jíjnáhan ná cáhan ni jnūhun yátá yáha, chí suni cáhan ni jíin ndihi ga ñayuu? achí de.

⁴² Te ni cahān máá Jítóho yō:

Cáhan rī jíin ndé-ni ñayuu cúu nájnūhun mozo jeē ndito xiní te squícu vāha. Te máá patrón sáha de jeē condiso jníñu i coto i ñayuu vehe de, návāha scáji i máá hora. ⁴³ Te yōhyo ndetū mozo un jēē núu ni ndee patrón, te cuni de jeē súcuan squícu vāha i. ⁴⁴ Jendaá cahán rī jíin ró jeē cani de mozo un jēē cóto i ndihi ndajníñu de. ⁴⁵ Te núu jéni ni i jeē ma ndíji yachī patrón i, te quejéé i cani i tēe jíin ñahan cácuu jnáhan mozo i, te caji i coho i te najīni i, ⁴⁶ núu súcuan te ndee-ni patrón quivī jeē tu ndétu i jíin hora jeē tú na vé jéni ni i. Te stóho xeēn de i, te squívī de i ndoho i jíin ñayuu tu cásquícu.

⁴⁷ Te mozo jeē jíní i ndese nújnahan ni patrón i, te núu tu sātūhva i ni tu squícu i jeē cuní de, ndoho xeēn i jíin yujnu xíi. ⁴⁸ Te mozo jeē tu jíní i ndese nújnahan ni patrón i, te núu sáha i jniñu jeē cani de i, núu súcuan te cūhva-ni cani de i. Chí ñayuu jeē steén cuehē yā nuū i, suni cuehē

nandacān yā nuū i. Te ñayuu jeē cuehē gā jniñu téjníñu ya i, suni cuehē gā nandacān yā nuū i.

Jeē siquí Jesús te cusñin ini ñayuu

(Mt. 10.34-36)

⁴⁹ 'Ni quee rī jeē nájñūhun jeē scuiquín rī ñuhūn ini ñayīví, te suu cúu jeē cusñin ini ñayuu jeē siquí ruhū. Te cúní rī jeē yachī coo súcuan, návāha quīvicoo ñayuu ndaha Yaā Dios. ⁵⁰ Te íyó ñin jñūdóho cánuú ndoho ri, te cúcuíhyá ndasí ni rī chi nde jinu ndoho ri, te ndusī ni rī. ⁵¹ ¿A cájeni ni rō jeē véji ri jeē cóyūcu mání ñayuu ñayīví? Cáhán rī jíin ró jeē tuú, chi sa suhva jeē cusñin ini ñayuu jeē siquí ruhū. ⁵² Chi nde vijna te quejéé jéé uhūn ñayuu ñin vehe, sásñin máá jíjnáhan, unī siquī uú, te uū siquī uní. ⁵³ Chi tátá cusñin ini jíin séhe yíí, te sēhe yíí jíin tátá, te náná jíin séhe síhí, te sēhe síhí jíin náná, te náná chíso jíin séhe jēnú, te sēhe jēnu jíin náná chíso. Achí yá.

Jeē ni cáhān yā siquī seña andiví

(Mt. 16.1-4; Mr. 8.11-13)

⁵⁴ Te suni ni cahān yā jíin ñayuu cuehē ún:

Núu cájito ró jeē náne vicō ichi núu cáne niāndii, te cácahān rō jeē cuun saū, te súcuan cúu. ⁵⁵ Te núu queé tachī véji ichi sur te cácahān rō jeē nandii, te súcuan cúu. ⁵⁶ Tēe stáhú-ni cácuu ró. Chi cájecūhun ni rō ndese stéén seña andiví jíin ini ñayīví, ¿te naun tu cájecūhun ni rō ndé ñin cúu ruhū jeē sáha ri tēcá jniñu jéhnu tiempo yáha?

Jeē cóndihvī ni yō jeē ma cóndee cuēchi siquī yō

(Mt. 5.25-26)

⁵⁷ ¿Te najehē tu cánacani ni maá ró ndé ñin cúu jniñu ndaā sáha ró? ⁵⁸ Te núu ñin ñayuu quihñin i jíin ró nuū tohó jeē cacán i cuēchi siquī rō, núu súcuan te níní cuáhān rō jíin i ichi te condihvī ni rō sándaā rō jíin i. Chi núu tuú, te squíví i rōhó núu juez, te juez síáha de rōhó núu

policía, te policía chune de róhó vecāa. ⁵⁹ Te jendaá cahán rī jíín ró jeē ma quénda cuiti rō yūcuán chi nde chunaa rō ndihī cuiti xūhun cájicān de. Te suni súcuan condihvī ni rō cahān ndahú ró jíín Yaā Dios, návāha ma ndácunehen ya cuēchi siquī rō. Achí yá jíín de.

Jeē cánuú nacani ni yō jeē stóo yó cuéchi yó

13

¹ Te ìin quivī yúcuan ní quecoo jecu tēe, ni canacani de jnūhun nuū yā ndese ni candoho jecu tēe Galilea. Chi ná cájehni de quitī jeē socó de, te ni quecoo mozo Pilato ni cajehni tēe ún. ² Te ni cahān Jesús:

Tēe Galilea un, ¿á cájeni ni rō jeē súcuan ni candoho de siquī jeē xeēn gā ni iyo cuēchi de vēsú tāca gá ñayuu Galilea? ³ Cáhán rī jíín ró jeē tuú. Te róhó jíjnáhan ró suni jnahnū ndetū rō núu tú nacani ni rō jeē stóo ró cuéchi ró. ⁴ Te xahūn unī tēe jeē ní cotúú torre Siloé siquī de, te ni cajihī de, ¿á cájeni ni rō jeē ní casáha de cuēchi xeēn gā vēsú tāca gá ñayuu ñuu Jerusalén? ⁵ Cáhán rī jíín ró jeē tuú. Te máá ró jíjnáhan ró, suni jnahnū ndetū rō núu tú nacani ni rō jeē stóo ró cuéchi ró.

Jnūhun yátá núndēhe higo

⁶ Yūcuán na te ni cahān yā jnūhun yátá yáha jéē steén yā ndese cácuu ñayuu tu squícu jnūhun Yaā Dios:

Cácuu i nájnūhun ìin nundēhe higo jeē íin nuū ñūhun ìin tēe. Te ni jecondēhé de núu íin ndehē xinī, te tú na vé íin. ⁷ Te ni cahān de jíín mozo sájniñu nuū ñūhun de: Vijna te je íyó únī cuiyā jeē quíji rī nducú rí ndehē xinī yújnu higo yáha, te tú na vé cúun xinī. Núu súcuan te cahnde rō, chi máá jéé sajnēñu nuū ñūhun, áchí de. ⁸ Te ni cahān mozo un jíín de: Stóo ní na cuíñi ìin na cuiyā, te na nástáyā ná jéhē te chuhun ná jéhen. ⁹ Te na cóndēhe

yó núu tú cuun ndehē inga cuiyā. Te núu tuú, te tahndē, achí mozo. Achí yá.

Jeē ní nasávāha ya ñin ñahan quivī ndétātú

¹⁰ Te ñin quivī ndétātú te stéén Jesús jnūhun ini vehe ñi sinagoga. ¹¹ Te iyó ñin ñahan jeē ní cuu xahūn unī cuiyā cuhú ña. Chi ñin tachī ni sáha jeē jíca tǎhí ña, te tuá cúu cuiti caca jnuu ña. ¹² Te ni jito Jesús nuū ña, te ni cana ya ña, te ni cahān yā jíin ña:

Vijna te nduvāha ní jēē cuhú ni.

¹³ Te ni soó yá ndaha ya siquī ña, te ni nucuiñī jnuu-ni ña, te ni nacuatáhu ña nuū Yaā Dios. ¹⁴ Te tēe cújéhnū ini vehe ñi sinagoga, ni quitī ni de nuū Jesús jeē ní nasávāha ya ñahan un quivī ndétātú. Te ni cahān de jíin ñayuu:

Íñū quivī iyó jēē sájniñu yó, te tāca quivī ún quijicoo ró nduvāha ró. Te quivī ndétātú chi ma cúu, achí de.

¹⁵ Yūcuán na te ni cahān maá Jítoho yō jíin de:

Tēe stáhú-ni cácuu ró. Quivī ndétātu ¿á tu cándají ró stiquī rō burro ró jēē quíscóho ró tí ndute? ¹⁶ Te ñahan yáha jēē cúu ña ñin sēhe yucūn Abraham, chi nájñūhun ni conuhnī ña xahūn unī cuiyā ni sáha Satanás. ¿Te á tu iyó váha jeē nájñūhun nandají rí ña nuū cuehyī ndóho ña quivī ndétātú? Achí yá.

¹⁷ Te jeē ni cáhān yā súcuan, te tāca tēe cájito uhū de ya, ni cacucanu de. Te ndíhi ñayuu ún chi ni cacusī ni i jíto i tācá jniñu jéhnū sáha ya.

Jnūhun yátá síquī ndiquin mostaza

(Mt. 13.31-32; Mr. 4.30-32)

¹⁸ Te ni cahān yā:

Na cáhān rī ñin jnūhun yátá návāha cuni rō ndese ndúcuehē ñayuu ndácu Yaā Dios jniñu nuū. ¹⁹ Ndúcuehē i nájñūhun jéhnū ñin ndiquin mostaza jeē jéquin ñin tēe nuū

ñúhun de, te ndúu nájñūhun ñin yujnu. Te cúu cáhnu, te tǎcá saa chi cásáha tǐ tacā tǐ chiji ndaha ún. Achí yá.

Jñūhun yátá síquī levadura

(Mt. 13.33)

²⁰ Te ni cahān tucu ya:

Súcuan cúu jeē ndúcuehē ñayuu jeē ndácu Yaā Dios jniñu nuū: ²¹ Cúu nájñūhun levadura jeē ní quihin ñin ñahan, te ni saca ña jíin únī kilo harina, te ni ndaa ndihí ñujen ni sáha. Achí yá.

Síquī jeē quívī yó yéhyí túū

(Mt. 7.13-14, 21-23)

²² Te jíca Jesús jeē cuahán yā ichi ñūū Jerusalén, te yáha ya tǎcá ñuu náhnu jíin ñuu lulí, te stéén yā jñūhun. ²³ Te ñin ñayuu ni cajñūhún i ya:

¿A jecu-ni ñayuu jnama Yaā Dios, chí naún? Achí i.

Te ni cahān yā jíin i:

²⁴ Condiñvī ni rō quívicoo ró ndaha Yaā Dios. Chi cúu nájñūhun ñin yéhyí túū. Te cáhán rī jíin ró jeē ñin quivī te cuehē ñayuu nducú i quívicoo i, te ma cúu ga. ²⁵ Te quivī ún te sáha ri nájñūhun ñin tēe chíí vehe jeē ndocuiñī de te nacasi de yéhyí. Te ichi yátá véhe cuiñī ró jíjnáhan ró, te scáján ró yehyí, te cahān rō: Nune ní yéhyí na quívicoo ná. Te cahān de jíin ró: ¿Ndé nuū véjicoo ró? Chi tu jíin rī rohó, achi de. ²⁶ Yūcuán na te quejéé ró cahān rō jíin de: Ni cayejí ná ni cajihí ná jíin ní, te ini calle ñuu na ní steén ni jñūhun, achi rō. ²⁷ Te cahān maá de: Cáhán rī jíin ró jeē tu jíin rī rohó ndé chi véjicoo ró. Cuijiyo quingoo ró, chí ñayuu casáha jniñu néé cácuu ró. Achi de. ²⁸ Te quívicoo ró núū ndahyú rō, te nacayihí yuhu ró jéé ndoho xeén rō. Te coto ró núū Abraham jíin Isaac jíin Jacob jíin ndihí tēe ni canacani jñūhun Yaā Dios, cáyūcú de ñuu nuū ndácu ya jniñu. Te rohó, vésú cácuu ró yúcūn de, te quívicoo ró núū

ndoho ró. ²⁹ Te cuehē ñayuu, vēsú tu cácuu i yucūn de, te quijicoo i ichi núū cáne niāndii jíín ichi núū quée niāndii, ichi norte jíín ichi sur. Te cucōo i mesa caji i staā ñuu nuū ndácu Yaā Dios jniñu. ³⁰ Te sava ñayuu jeē vijna cácuu i sandīhí, ichi yúcuan nduu i nuū. Te sava ñayuu jeē vijna cácuu i nuū, ichi yúcuan nduu i sandīhí. Achí yá.

Jeē ní cucuīhyá ni yā siquī ñáyuu ñuu Jerusalén
(Mt. 23.37-39)

³¹ Te máá quívī un ní quecoo jecu tēe fariseo, te ni cacahān de jíín yá:

Cujiyo ní quíhīn ní inga lado, chi cúní Herodes cahni de níhīn, áchí de.

³² Te ni cahān yā:

Cuángoo te castūhun ró nuū tēe mañoso un jēē ná tu jinū quívī cuu rī, chi vijna jíín sájnē quenehen ri tachī ini ñayuu, te nasávāha ri ñayuu cácuu. Te isá te jīnu jniñu sáha ri, achi rō. ³³ Chi cánuú jēē cáca ri quíhīn rī vijna jíín sájnē jíín isá, te jinū rī Jerusalén. Chi tēe cánacani jnūhun Yaā Dios, tu cájihī de inga lado, chi máá-ni ini ñuu Jerusalén cájehni i de. Achí yá.

³⁴ Róhó ñuu Jerusalén, jéhni rō tēe cánacani jnūhun Yaā Dios, te jéhe ró yúū xinī tēe tájí Yaā Dios vējicoo nuū rō. Te cuehē jínu ni cuni rī nastútú rí sēhe ró, nájnūhun ndují jēē nastútú tí sēhe tí chíji ndijēn tī, te tu ní cúní rō.

³⁵ Núu súcuan te vijna te stóo uun na ri rohó jíín sēhe ró. Te cáhán rī jíín ró jēē ndé vijna te ma cóto cuítī gā rō nuū rī, chi nde quiji quívī jeē cahán sēhe ró: Yōhyo vāha Yaā cúu Yaā véndiji jíín jniñu máá Jítóho yō Yaā Dios, achi i. Achí yá.

Jeē ní nasávāha ya ñin tēe cúhú cuehyī cuiñī

14

¹ Te ñin quivī ndétātu ní jehēn yā vehe ñin tēe fariseo cujéhnū, ni jecaji yā staā jíin de. Te tāca gá tēe fariseo cájito yuhu de ya núu stívi yá. ² Te yūcuan íne ñin tēe cúhú de cuehyī cuiñi, índichi de nuū yā. ³ Te ni cajñūhun yá tēe cástéén tutu ley Yaā Dios jíin táca tēe fariseo:

¿A íyó ley jeē nasávāha ri ñayuu cácuñū quivī ndétātu, chí tuú? áchí yá.

⁴ Te máa de tu ní cácahān cuiti de. Te ni jñi ya tēe cúhú un, te ni nasávāha ya de, te ni cahān yā jeē na núhun de vehe de. ⁵ Te ni cahān yā jíin de jíjñāhan de:

¿Ndé ñin róhó núu burro ró chí stíquī rō ñingava ti ini pozo, te á tu yachī natava rō tī vēsú quivī ndétātu cúu, chí naún? Achí yá.

⁶ Te tu ní cúu stío cuiñi de ni ñin jñūhun nuū yā jeē súcuan ni cahān yā.

Jñūhun siquī ñayuu jéngoo vico

⁷ Te ni jito Jesús jeē tēe ni cataca ún, cánacāji de silla yíñúhún gá nuū mesa cucōo de. Te ni cahān yā jñūhun yáha jíin de:

⁸ Núu ñin tēe cana de jeē quihín rō ñin vico nándāha, te ma cucōo ró lugar nuū yíñúhún gá. Chi núu súcuan te sanaa te je ni cana de ñin tēe cújéhnū ga vēsú rohó. ⁹ Te quee tēe ni cana róhó, te cahān de jíin ró: Ndonda, te na cucōo tēe yáha jíñā. Yūcuán na te cucanu rō jeē quihín rō cucōo ró ndé sandíhi na. ¹⁰ Chi sa suhva núu ni cana ñin tēe róhó, te cucōo ró ndé lugar sandíhi na. Te núu quee tēe ni cana róhó, te cahān de jíin ró: Amigo, nehen cucōo ró ñin lugar nuū yíñúhún gá, achi de. Yūcuán na te ñayuu cáyūcu mesa jíin ró coto i jeē sajehnū de róhó. ¹¹ Súcuan ni cahān rī jñūhun yáha návāha cuni rō jeē tāca ñáyuu jeē sajehnū i máa i, nuu i sáha Yaā Dios. Te ñayuu jeē snúū i máa i, ndujéhnū i sáha ya. Achí yá.

¹² Te suni ni cahān yā jín tēe ni cana ya yéji yā staā:

Núu sáha ró ñin vico cúsámá chí jēe cuxíni, te ma cána ró ñáyuu cácuu amigo rō, jín ñani rō, jín jnáhan ró, jín ñáyuu cucá. Chi núu súcuan te suni máa i nacana i róló, te súcuan nanihīn rō jeē ni jéhe ró. ¹³ Chi sa suhva núu sáha ró vico, te cana ró ñáyuu ndahú, ñayuu cuhndú, ñayuu chacuá, jín ñáyuu cuaá. ¹⁴ Te súcuan te quendōo ndetū rō, chí ma cúu nacuaāha i nuū rō. Te nihīn rō tahū rō quivī nátecu ñayuu ndaā, achí yá.

Jnūhun yátá síquī vico cúxíni

¹⁵ Te ñin tēe yéji staā jín yá, ni jini de jnūhun yáha, te ni cahān de jín yá:

Yōhyo ndetū ñayuu jeē cáji staā nde ñuu nuū ndácu Yaā Dios jniñu, achí de.

¹⁶ Yūcuán na te ni cahān Jesús ñin jnūhun yátá jēe steén yā jeē cána Yaā Dios ñayuu quivīcoo i ñuu nuū ndácu ya jniñu:

Ñin tēe ni sáha de ñin vico cáhnu cuxíni, te ni tají de mozo ni cana cuehē ñayuu. ¹⁷ Te máa quivī cuxíni, te ni tají de mozo de cuacana ñayuu jeē quijicoo caji staā: Nehen ní jínáhan ní, chí je íyó túhva ndihī, achí mozo. ¹⁸ Te ndihī i ni cacahān i jeē na cóne cáhnu ni de chí ma quíngoo i. ñin tēe ni cahān de: Sáa ní jeen ri ñin ñuhun te cánuú quícondēhe rí, te na cóne cáhnu ni de chí ma jeé rī. Achí de. ¹⁹ Te inga de ni cahān: Ni jeen ri uhūn yunta stiquī, te quihīn rī coto ndee rī tī, te na cóne cáhnu ni de nuū rī chí ma jeé rī, achí de. ²⁰ Te inga de ni cahān de: Sáa ní quijnáhan ri, te jeē yúcuan ma cúu jeē rī, achí de. ²¹ Te cuanuhun mozo un, te ni castūhún de nuū patrón de ndese ni cacahān ñayuu. Yūcuán na te ni quitī ni patrón, te ni cahān de jín mozo de: Yachī quihīn rō tāca calle náhnu jín calle lulí, te cana ró ñáyuu ndahú, ñayuu

cuhndú, ñayuu chacuá, jíin ñáyuu cuaá, na quíjicoo i vico, áchí de. ²² Te ni jehēn mozo, te ni ndee de, te ni cahān de jíin patrón de: Je ni sáha ná jēē ni cáhān ní, te cúmanī gā ñayuu te chitú vehe ní, áchí de. ²³ Te ni cahān tucu patrón: Quihīn tucu ró táca calle jíin ichi, te cana fuerza rō ñayuu na quíjicoo i, návāha chitú vehe ri. ²⁴ Chi cáhān rī jíin ró jeē ní ĩn tēe ni cana ri xīhna ñūhún, ma cuáha cuiti rī jnūhun jeē cuxíni de vehe ri, achí de. Achí yá.

Jnūhun jeē cánuú nacani vāha ni yō te condiquīn yō Cristo

²⁵ Te cuehē ndasí ñáyuu cándiquīn i Jesús cuangoo i jíin yá, te ni ndió cóto ya nuū i, te ni cahān yā jíin i:

²⁶ Núu na-ni ñayuu cuní condiquīn ruhū, te núu manī gā i jíin tátá i, náná i, ñasihí i, sēhe i, ñani i, cuáha i, vēsú jíin rúhū, ma cúu cuu i ñayuu scuáha jíin rí. Te núu ndíhvi gā ni i siquī jeē cóo vāha máa i vēsú jeē cóndiquīn i ruhū, te suni ma cúu tucu. ²⁷ Te na-ni ñayuu núu tu jéhe i jnūhun ndoho i jnūndóho vēsú nde cuu i jeē siquí jeē cóndiquīn i ruhū, te ma cúu cuu i ñayuu scuáha jíin rí. ²⁸ Chi núu ndé ĩn ró cúní rō sáha ró ĩn vehe cáhnu, ¿á tu cánuú jēē xīhna gā cucōo ró te tava rō cuenta núu canda xūhun jēē sínu ró? ²⁹ Chi núu tuú, te núu je ni jequin rō cimientto, te tu canda xūhun ró sínu ró, yūcuán na te tāca ñáyuu sácata i coto i róhó. ³⁰ Te cahān i: Tēe yáha ní quejéé de sáha de vehe, te tu ní canda de sínu de, achi i. ³¹ Te suni súcuan núu ĩn rey quihīn de cuajnáhan de jíin inga rey jeē véji siquī de, ¿á tu cánuú jēē xīhna gā cucōo de te nacani ni de núu canda uxī mil soldado jeē cuajnáhan de jíin inga rey jeē véji siquī de jíin ócō mil soldado? ³² Chi núu tú canda de, te níní jícá gá vēji inga rey, te tají de tēe cándiso jníñu, cajnūhún de na vé cuní inga rey jeē cuáha de nuū, te jecuiñi-ni. ³³ Te máa ró jijnáhan ró, suni súcuan cánuú jēē xīhna gā nacani ni

rō cahnde ni rō stóo ró ndihī jeē névāha ró, chi núu tuú te ma cúu cuu ró ñáyuu scuáha jíin rí.

Jnūhun yátá síquī ññ

(Mt. 5.13; Mr. 9.50)

³⁴ Te ñayuu cá candíje cá cuu i nájnūhun ññ. Vāha íyó ññ, te núu ññ ún na náā jeē uhvuá, ¿te ndese nduu uhvuā tucu? ³⁵ Tuá cuajníñu cuítī, ni jeē chúhun ñayuu nuū ítu, ni jeē ndúu jēhen, chi máá cate ī-ni i. Tāca rōhó jēē jíni sōho, na chúsohó ró. Achí yá.

Jnūhun yátá síquī lanchi ní sana

(Mt. 18.10-14)

15

¹ Te tāca tēe cástútú xúhun renta jíin táca gá tēe cásaaha cuēchi, ni quecoo de nuū Jesús jeē cuni sōho de jnūhun cáhán yā. ² Te tāca tēe grupo fariseo jíin tēe cástēen tutu ley Yā Dios, ni cacahān de síquī yā:

Tēe yāha jétáhú de tāca tēe cásaaha cuēchi te yéji de jíin, áchí de.

³ Te ni cahān yā jnūhun yátá yāha jíin de:

⁴ ¿Ndé ñn ró núu névāha ró ñn ciento lanchi, te núu scuíta ró ñn tí, te á tu stóo ró cúun xico xahūn cuūn gā tí yucu, te quinanducú ró quítī ní sana ún ndé nanihīn rō tí? ⁵ Te núu ni nanihīn rō tí, te coso sūcun ró tí, te cusīñ ni rō. ⁶ Te núu ni ndee rō vehe ró, te nastútú ró tācá amigo rō jíin ñáyuu yúcu yajni jíin ró, te cahān rō jíin i: Na cusīñ ni yō, chi ni nanihīn rī lanchi ri jeē ní sana. Achi rō. ⁷ Te cáhán rī jíin ró jeē suni sūcuan cúu nde andiví. Chi cusīñ gā ni yā jíin ñn ñayuu iyó cuéchi núu nacani ni i jeē stóo i cuéchi i, vēsú jíin cúun xico xahūn cuūn ñayuu iyó ndāā jeē tuá jíni ñúhún nacani ni i.

Jnūhun yátá síquī ñahan ní scuíta xūhún

⁸ 'Te núu ñin ñahan névāha ña uxī peso cāa, te núu scuíta ña ñin, ¿á tu nastñin ña lámpara te nastāa ña vehe, te nanducú yúcún ña nde nanihñin ña? ⁹ Te núu ni nanihñin ña, te nastútú ña tēcá amiga ña jíin ñáyuu yúcu yajni jíin ña, te cahān ña jíin i: Na cúsiñ ni yō, chi ni nanihñin rī xūhun jēē ni scuíta ri. Achí ña. ¹⁰ Te cáhán rī jíin ró jeē suni súcuan cúsiñ ni tēcá ndajéhé Yaā Dios siquē ñin ñayuu iyó cuéchi núu nacani ni i jeē stóo i cuéchi i. Achí yá.

Jnūhun yátá síquē sūchi ní jéhēn jecó

¹¹ Te ni cahān gā yā:

ñin tēe ni iyo uū sēhe yí de. ¹² Te tēe suchí gá ni cahān i jíin tátá i: Tátā, tahú sáva ní ndajññu ní, te cuāha ní sava cuu tahū ná, áchí i. Te ni tahú sáva de tahū ndñdúú i. ¹³ Te ni cuu jecu-ni quivī, te tēe suchí gá un ní stutú ndñhi i ndajññu i. Te ni quenda i cuahān i ñin ñuu jicá. Te yūcuan ní snāa i tahū i, chi ni jexñ cāhá i. ¹⁴ Te ná ni ndñhi ni jexñ i, te ni quee ñin jnamā xeén ini ñuu ún, te ni quejéé cúmanī jeē caji i. ¹⁵ Yūcuán na te cuanducú jññu i nuū ñin tēe ñuu ún. Te ni tají de i cuahān i rancho de jeē cóto i quín de. ¹⁶ Te cúni i caji i vēsú soō ndúchi jeē cáyeji quín ún, návāha ndutú chíji i. Te ni ñin ñayuu tú na vé jéhe nuū i. ¹⁷ Yūcuán na te ni quejéé i nácani ni i: Tāca mozo casájññu vehe tátá rī, iyó cuéhē staā cáyeji i. Te ruhū chi jíi rī sōco yāhá. ¹⁸ Na quínuhun rī nuū tátá rī, te cahān rī jíin de: Tátā, ni sáha ná cuéchi nuū Yaā Dios jíin núu maá ní. ¹⁹ Vijna te nasūu gá tēe vāha cúu ná jēē cónaní ná sēhe ní. Te cuāha ní jnúhun cuu ná nájññuhun ñin mozo ni, achi rī. ²⁰ Yūcuán na te ni naquihñin i ichi cuanuhun i vehe tátá i.

'Te níní jicá gá vēji i, te ni jito tátá i nuū i, te ni cundáhú ni de i. Te jínu de cuajnahan de i, te ni nundee de sucñ i, te ni techūhú de i. ²¹ Yūcuán na te ni cahān i jíin de: Tátā, ni sáha ná cuéchi nuū Yaā Dios jíin núu maá ní. Vijna

te nasūu gá tēe vāha cúu ná jēē cónaní ná sēhe ní. Achí i. ²² Te máá tátá i chi sa ni cahān de jíin táca mozo de: Cuáquihin sahma váha ga te chuhun ró i. Te chuhun ró ñn xehyu ndaha i, te chihi ró ndíjēn jehē i. ²³ Te quiquihin ró becerro xéhen, te cahni rō tī na cáji yō, chi sáha yó vico. ²⁴ Chi sēhe yí rí yáha, nájnūhun je ni jihī i, te ni natecu i. Chi tu ní jíní rī ndé chi ní jéhēn i, te ni ndee i, áchí de. Te ni caquejéé de cásáha de vico.

²⁵ Te sūchi jévāha, íne i nde rancho, te vëndiji i, te ni cuyajni i yatā véhe. Te ni jini i jeē cúu yaa te cájita jéhé ñáyuu. ²⁶ Te ni cana i ñn mozo, te ni cajnūhún i na vé cúu jeē cúu. ²⁷ Te ni cachi mozo un núu i: Ni ndee ñani rō, te tátá rō ni jehni de becerro xéhen, chi ni ndee vāha i nuū de, áchí mozo. ²⁸ Yūcuán na te ni quitī ni sūchi jévāha, te tu ní cúní i ndívi i. Te ni quenda tátá i, te ni cahān ndahú de jíin i jeē na ndívi i. ²⁹ Te ni cahān i jíin tátá i: Níní sáha ná jniñu ndácu ní, te tu cúnihni cuiti ni na núu ní. Te tu jéhe ní vēsú ñn lítú núu ná, jeē sáha ná vico caji na jíin táca amigo na. ³⁰ Te ni ndee sēhe ní yáha jeē ni jéxīn cāhá i xūhun ní jíin táca ñahan. Te ni jehni ní becerro xéhen caji i, áchí i jíin tátá i. ³¹ Yūcuán na te ni cahān de jíin i: Séhē, róhó chi níní ndéé ró jíin rí, te ndihī jeē névāha ri chi suni cuenta maá ró cúu. ³² Te vijna chi íyó váha jeē sáha yó vico te cusī ni yō. Chi ñani rō yāhá, nájnūhun ni jihī i, te ni natecu i. Chi tu ní jíní yō ndé chi ní jéhēn i, te ni ndee i, áchí de. Achí yá.

Jnūhun yátá síquī mozo jeē ni stáhú de patrón de

16

¹ Te suni ni cahān Jesús jíin tēe cáscuáha jíin yá:

ñn tēe cúcá ní íyo ñn mozo de jeē ndíso jniñu nuū tāca gá mozo. Te ni cacahān jíin patrón un jēē mozo un snāā cāhá ndajniñu de. ² Te ni cana de mozo un, te ni cahān de

jín: ¿Na jnūhun cúu yāha jeē nihín rī siquī rō? Nacuāha cuenta jniñu ndíso ró, chí ma cóndiso jniñu ga rō nuū mozo rī. Achí de. ³ Yūcuán na te jéni ni maá de: ¿Ndese sáha ri vijna? Chi patrón rī quenehen de jniñu ri. Te tú ndacuī rī jeē cáte ri ñuhun, te jeē cacán rī caridad chí cúcanu rī. ⁴ Núu súcuan te jíní rī ñn jeē sáha ri, návāha ñayuu cájeen nuū patrón rī, cuāha i vehe condee rī núu na quée quivī jeē quénehen de jniñu ri. ⁵ Te ni cana de ná ñn ná ñn tēe jeē cátaū nuū patrón de. Te ni cajnūhún de ñn: ¿Nasaa táu rō nuū patrón rī? ⁶ Te ni cahān tēe ún: ñn ciento barril aceite, achí de. Te ni cahān mozo un: Yāhá na cuáha ri lista rō, te cucōo yachī rō, te na sáha ró ñga lista jeē uú xico uxī na, achí de. ⁷ Yūcuán na te ni cajnūhún de ñga tēe: Te rōhó, ¿nasaa táu rō? Te tēe un ní cahān de: ñn ciento cajón trigo, achí de. Te ni cahān de jín tēe ún: Yāhá na cuáha ri lista rō, te na sáha ró ñga lista jeē cuún xico na, achí de. ⁸ Yūcuán na te patrón ni cahān de: Nacā jeē ndichí ní sáha tēe cúnée un, achí de. Te cáhán rī jín ró jeē ñayuu ñayīvi yáha, ndíchí gá casáha i jeē quendōo vāha i nuū jnáhan i, vēsú ñayuu cácandíje nuū Yaā Dios.

⁹ Núu súcuan te cáhán rī jín ró jeē ndichí gá na sáha ró vēsú jeē ni sáha mozo ndichí un. Chi ini ñayīvi yáha nuū yīhi cuēchi, na sáha ró jniñu váha jín xūhun ró, cuāha ró núu ñayuu ndahú, návāha vēsú núu ni ndihí xūhun ró ñayīvi yáha, te quivīcoo ró andiví núu coo vehe ró ñí cáni.

¹⁰ Tēe jeē squícu vāha jín ñn jniñu lúlí-ni, suni squícu vāha de jín jniñu cáhnu. Te tēe jeē stahú jín ñn jniñu lúlí-ni, suni stáhú de jín jniñu cáhnu. ¹¹ Núu súcuan te núu tu squícu vāha ró jín xūhun jeē iyó ñayīvi yáha nuū yīhi cuēchi, te ma cuáha ya jeē váha cuu ró ñí cáni andiví. ¹² Te núu tu squícu vāha ró jín ndajniñu jeē ni jéhe núu ya nuū rō ñayīvi yáha, te ma cuáha ya tahū cuu ró ñí cáni.

¹³ Ni ñn mozo ma cúu cuajniñu de nuū uū patrón. Chi

quitī ni de nuū ñin te coo manī de jíin ñnga, chí squícu vāha de nuū ñin te sájéē ni de nuū ñnga. Te suni súcuan ma cúu cuajníñu ró núū Yaā Dios te núu máni síquī xúhun ndíhví ni rō, achí yá.

¹⁴ Te tēe fariseo ni casácatā de nuū yā jeē ní cajini de tāca jnūhun cáhán yā, chi tēe cútóó xúhun cácuu de. ¹⁵ Te ni cahān yā jíin de:

Máá ró casáha ró jeē tēe ndaā cácuu ró núū ñayuu. Te Yaā Dios chi jíin yā ndese cáa ini anuá rō. Chi jniñu cájeni ni ñayuu jeē jniñu jéhu núu, te nuū Yaā Dios chi jniñu néé cúu.

Siquī ley Yaā Dios jíin síquī jeē ndácu ya jniñu

¹⁶ 'Nde ná tu quiji Juan tēe scuándute, te ni ñyo ley jeē ni jéhe Yaā Dios nuū Moisés, te suni ni castéén tāca tēe cáncani jnūhun ya. Yūcuán na te ná ni quiji Juan, te ni quejéé jítē núu jnūhun vāha ndese ndácu Yaā Dios jniñu. Te tāca ñayuu nducú ndéyí i quívicoo i ndaha ya.

¹⁷ 'Te yí gá cúu jeē náā ñin letra nuū tútu ley yā vēsú jeē náā andíví jíin ñáyiví, chi squícu ndihí jnūhun cáhán.

Siquī jeē ma stóo jnāhan tēe jíin ñahan

(Mt. 19.1-12; Mr. 10.1-12)

¹⁸ 'Núu ñin tēe stóo de ñasihí de te quijnāhan de jíin ñnga ñahan, núu súcuan te cásiquí ndéē de ña. Te núu ñin tēe condeca de ñahan ní ndusñin, suni cásiquí ndéē de ña, achí yá.

Jnūhun tēe cúcá jíin Lázaro

¹⁹ Te ni cahān gā yā:

Ni ñyo ñin tēe cúcá, ní ñuhun de sahma lúu váha ndasí. Te ndíquíví ni ñyo vāha ndasí jéē ní yeji de. ²⁰ Te suni ni ñyo ñin tēe ndáhu, nání de Lázaro, néne de yéhyí tēe cúcá un, te ní cáhnu de ñin ndíhyi. ²¹ Te máni cúni de jeē ndutú chíji de jíin stāā cuēchi jeē stívi tēe cúcá un. Te quécoo

ina te cānyuu tī nuū ndíhyi de. ²² Te ni jihī tēe ndáhú un, te tācá ndajéhé Yaā Dios cuango ya jíin ánuá de nde andiví nuū néne Abraham. Te suni ni jihī tēe cúcá un, te ni quindūji de. ²³ Te tēe cúcá un xeēn ndóho de íne de lugar nuū cáyūcu ndíyī tu ní cándíje. Te ni ndacoto de, te nde jicá ní jito de nuū Abraham, te néne Lázaro jíin de. ²⁴ Yūcuán na te ni cana cóhó de: Tátā Abraham, cundáhú ni ni sáña, te tají ní Lázaro, na quíchundaji de xinī ndáha de nuū ndúte, te quiji de stáji de yáá ná. Chi xeēn ndóho ná núū yáñuhūn yāhá. Achí de. ²⁵ Te ni cahān Abraham jíin de: Séhē, nucūhun ni rō jeē ni níhīn rō ndihī jeē váha ná ni cotecu rō, te Lázaro chi sa suhva jnūndóho ni nihīn de. Te vijna je ni ndusī ni de yāhá, te róhó chi ndóho ró jíñā. ²⁶ Te suni íyó ĩn jeē cunú téyí, íne mēhñu yó jijnáhan yó. Te ñayuu cáhīn yāhá, vēsú cécuni i yāha i jeē i nuū rō, te ma cúu. Te ni ma cúu yāha máá ró quijicoo ró yáha. Achí Abraham. ²⁷ Yūcuán na te ni cahān tēe cúcá: Núu súcuan te cáhān ndahú ná jíin ní, Tátā Abraham, tají ní Lázaro na quíhīn de vehe tátá na. ²⁸ Chi íyó úhūn gā ñani ná, te na quícachi de nuū i jeē na nácani ni i te stóo i cuēchi i, návāha ma quívicoo i nuū ndóho ná yáha, áchí de. ²⁹ Te ni cahān Abraham jíin de: Je cánevāha i tutu jeē ní tee Moisés jíin táca tēe ni canacani jnūhun Yaā Dios. Suu yūcuán na chúhun ni i, áchí Abraham. ³⁰ Te ni cahān tucu tēe cúcá: Vēsú súcuan, Tátā Abraham, te núu ĩn ñayuu ni jihī quihīn nuū i, yūcuán na te nacani ni i jeē stóo i cuēchi i, áchí de. ³¹ Te ni cahān Abraham jíin de: Núu tu chúhun ni i jnūhun ni nacani Moisés jíin táca tēe ni canacani jnūhun Yaā Dios, suni ma candíje cuítī i núu natecu ĩn ndíyī quihīn nuū i, áchí de.

*Xeēn coo siquī ñáyuu squívi jnáhan nuū cuéchi
(Mt. 18.6-7, 21-22; Mr. 9.42)*

17

¹ Te ni cahān Jesús jiín tée cáscuáha jiín yá:

Máni íyó jēē nducú squívi ñayuu nuū cuéchi. Te nacā xeēn ndoho ñayuu jeē squívi jnáhan nuū cuéchi. ² Vāha ga núu ni conuhnī ñin yōso cáhnu sucūn i te quēe i chíji ndute mar, vēsú jeē squívi i ñin sūchi lúli yáha nuū cuéchi.

³ Coto ma sáha ró súcuan jíjnáhan ró.

'Te núu jnáhan ró sáha de cuéchi siquī rō, te cahān rō nuū de. Te núu nacani ni de, te cone cáhnu ni rō nuū de. ⁴ Te núu uxā jínu jeē ñin quivī sáha de cuéchi siquī rō, te núu uxā jínu nácani ni de te cahān de jíin ró jeē cone cáhnu ni rō chí ma sáha ga de, te cánuú cone cáhnu ni rō nuū de. Achí yá.

Jeē yóhyo cújéhnū jnūhun cándíje

⁵ Te tēe cácuu apóstol ni cacahān de jíin Jítóho yō:

Sáha ní jēē nihin ga candíje ná jēē sáha Yaā Dios jeē cájicān na nuū yā, achí de.

⁶ Te ni cahān maá Jítóho yō jíin de:

Núu cácandíje ró vēsú ñin tíhlí-ni, nájñūhun ñin ndiquin mostaza jeē tíhlí-ni cáa, te cuu cahān rō jeē nuyūhndu yáha na quénda te nucondichi nde nuū mar, te coo nájñūhun cahān rō.

Jeē cánuú squícu vāha yó núu yā

⁷ 'Ndé ñin ró íyó mozo rō jeē jítu de chí ndíto de quiti ndéca ró, te núu ni najinū de vehe ró, te tu cáhán rō jíin de jeē cúcōo de caji de staā. ⁸ Chi sa suhva cáhán rō: Sáha ró ndeyu cuxíni ri, te cani ró cóhō rī. Te núu ni cuu ni yeji rī ni jihi ri, yūcuán na te caji maá ró coho ró, cácahān rō.

⁹ Te cácahān rō jeē tu cánuú nacuatáhu ró nuū mozo núu ni sáha de jniñu ní ndacu ró, chí jeē cánuú sáha de cúu.

¹⁰ Te suni súcuan máá ró jíjnáhan ró, cácuu ró mozo Yaā Dios. Te núu ni casquícu ró táca jniñu ní ndacu ya nuū rō,

te cahān rō: Tu cánuú nacuatáhú yá nuū rī, chi ni sáha ri máá-ni jeē cánuú sáha ri, achi rō. Achí yá.

Jeē ní nasávāha ya uxī tēe ndóho cuehyī stehyú

¹¹ Te jíca Jesús ichi cuahān yā ñuu Jerusalén, te ni yāha ya cuahān yā mēhñú región Samaria jíin Galilea. ¹² Te ni jinū yā ñin ñuu, te uxī tēe ndóho cuehyī stehyú ni quendacoo de vejnahan de ya, te jíca ní cajecuiñī de. ¹³ Te ni cacana jee de:

Jesús, Maestro, cundáhú ni ni sáña, áchí de jíjnáhan de.

¹⁴ Te ni jito Jesús nuū de, te ni cahān yā jíin de:

Cuángoo te stéen rō maá ró nuū tāca sūtū jeē ní canduvāha ró, áchí yá.

Te níní cuángoo de te ni canduvāha-ni de. ¹⁵ Yūcuán na te ñin-ni de ni nandió cóo de nuū Jesús, te cáhán jee de, nácuatáhú de nuū Yaā Dios jeē ní nduvāha de. ¹⁶ Te ni jecuiñī yití de nuū yā, te ni jequin de nuū de nde nuū ñúhun, te ni nacuatáhú de nuū yā. Te tēe Samaria cúu de. ¹⁷ Te ni cahān Jesús:

¿A násūú ndihúxí de ni canduvāha? Te ñin gā de, ¿naun tu ní cánandicó de nacuatáhú de? ¹⁸ ¿A máñúhún-ni tēe ñuu jíca yáha cúu jeē ní nandicó de nácuatáhú de nuū Yaā Dios?

¹⁹ Te ni cahān yā jíin tēe ún:

Ndocuiñī quinhun rō. Chi ni candíje ró jēe cuu nasávāha ri rohó, te jeē yúcuan ní nduvāha ró, áchí yá.

Ndese coo quivī jeē ndíji ya ndacu ya jniñu

(Mt. 24.23-28, 36-41)

²⁰ Te tēe fariseo ni cacajñuhún de Jesús ndé quivī quejéé jēe ndácu Yaā Dios jniñu ini ñayiví. Te ni cahān yā jíin de:

Ma quée ndijin jeē ndácu Yaā Dios jniñu. ²¹ Ni ma cúu cahān ñayuu: Yāha íne ya ndácu ya jniñu, chí: Yūcuan íne

ya, achi i. Chi je ndácu Yaā Dios jniñu mēhñu ró jijnáhan ró. Achí yá.

²² Yūcuán na te ni cahān yā jiín tée cáscuáha jíin yá:

Quee tiempo jeē yóhyo cúu ni rō coto ró jéē ndiji ruhū, Yaā ní nduu tēe, te ma cóto ró jijnáhan ró. ²³ Te cahān ñayuu jíin ró: Yāha íne ya, chí: Yūcuan íne ya, achi i. Te ma quíngoo ró condēhe ró, ni ma cóndiquīn rō i. ²⁴ Chi nájnūhun sáha taja jeē ndíndēé ñn lado andiví te cúndijin nde inga lado, suni súcuan cuu quiví ndíji ruhū, Yaā ní nduu tēe, chi ndíhi ñayuu coto. ²⁵ Te jíni ñúhún jéē xíhna gā ndoho xeēn rī, te ñayuu iyó vijna, squéhichī i ruhū. ²⁶ Chi nájnūhun ni cuu quiví ni íyo Noé, suni súcuan cuu quiví ndíji ruhū, Yaā ní nduu tēe. ²⁷ Chi quiví un ní cayeji i, ni cajihí i, ni canandāha i, ni cajēhe i sēhe síhí i jeē nándāha, nde ni jinū quiví jeē ni quiví Noé ini barco cáhnu jeē naní arca. Te ni cuun saū xeén, te ni ndaa ndute ni cajihí ndíhi i. ²⁸ Te suni súcuan ni cuu quiví ni íyo Lot. Ni cayeji i, ni cajihí i, ni cajeen i, ni caxícó i, ni cataji i itu, ni cajeni i vehe. ²⁹ Te quiví jeē ní quenda Lot ini ñuu Sodoma cuahān de, te ni cuun ñuhūn jíin azufre ichi ándiví, te ni snáā ndíhi ñayuu. ³⁰ Te suni súcuan coo quiví jeē ndíji ruhū, Yaā ní nduu tēe.

³¹ Te quiví ún te ñayuu cáhīn yatā véhe, te ndajníñu i ñúhun ini vehe, cáhán rī jíin i jeē ma ndíví i naquihin i, chí cánuú cunu yachí i jeē cácu i. Te suni súcuan ñayuu casájniñu nuū ítu, ma quínuhun i vehe i jeē quíhin i ndajníñu i. ³² Te nucūhun ni rō ndese ni ndoho ñasíhí Lot jeē ni jhí ña. ³³ Te núu ndé ñáyuu cuní i cācu i nuū jnúndóho quiji nuū i jeē síquí ruhū, núu súcuan te jnahnū ndetū i ní cáni. Te núu ndé ñáyuu, vēsú na cúu i jeē síquí ruhū, te cotecu i ní cáni.

³⁴ Te cáhán rī jíin ró jeē quiví ndíji ri te quíxí uū tēe ñn jīto jecuáā, te ñn de naquihin ri, te inga de ndōo, chí tu ní

cándije de. ³⁵ Te coo uū ñahan jeē ndíco cáhnu, te ñin ña naquihin ri, te ñnga ña ndōo. ³⁶ Te uū tēe sájniñu de nuū ítu, te ñin de naquihin ri, te ñnga de ndōo. Achí yá.

³⁷ Te jeē ní cajini de jnūhun yáha, te ni cacajñuhún de ya:

¿Ndé mí coo súcuan nájñuhun ni cahān ní? Achí de.

Te ni cahān yā jíin de:

Nájñuhun jeē cutútú téji ndé-ni cúu nuū catú quití ní jíhī, suni súcuan coo tāca jéē ni cáhān rī ndé-ni cúu-ni nuū cáhīyo ñayuu.

Jnūhun yátá síquī juez jíin ñahan viuda

18

¹ Te ni cahān yā ñin jnūhun yátá jíin de jeē cánuú jeē niní cácan tahu de, te ma ndínuu ni de jíin. ² Te ni cahān yā:

Ni iyo ñin juez ini ñin ñuu. Te ni tu ndíso iyo de nuū Yaā Dios, ni tu yúhú de nuū ní ñin ñayuu. ³ Te suni ñuu un íyó ñin ñahan ní ndóo ndáhú. Te ñahan un jéhén-ni jéhén-ni ña nuū de, jícan ña jeē na sándaā de síquī ñin ñayuu jeē jíto uhū i ña. ⁴ Te cuehē quivī tu ní cúní de sándaā de, te yūcuán na te ni jeni ni de: Vēsú tu ndíso iyo ri nuū Yaā Dios, ni tu yúhú rí nuū ní ñin ñayuu, ⁵ te ñahan viuda yáha, yōhyo stáhān ña ruhū, te jeē yúcuan na sándaā rī síquī ñayuu jeē jíto uhū i ña. Chi núu tuú, te quejéé rí jnaníní ni rī jeē quíji quíji ña. Achí de. Achí máá Jítóho yō.

⁶ Te ni cahān gā yā:

Súcuan cúu jeē ni cáhān juez, tēe tú ndaā. ⁷ Te Yaā Dios, nasūu súcuan cúu ya, chi sándaā yā síquī jñíñu ñayuu ní nacāji ya jeē nduú ñuú cácahān ndahú i jíin yá. Chi jnama ya i nuū tāca jéē cájito uhū i. ¿Te á cuéé jnama ya i? ⁸ Cáhān rī jíin ró jeē yachī. Te quivī ndíji ruhū, Yaā ní nduu

tēe, ¿á n̄h̄n gā rī ñayuu cá candíje n̄hin ini ñayiví? Achí yá.

Jnūhun yátá síquī tēe fariseo jíin tēe stútú xúhun renta

⁹ Te suni ni cahān yā jnūhun yátá yáha jíin jecu ñayuu jeē cájeni ni i jeē ñáyuu ndaā cácuu i, te cájeni ni i jeē sava ga ñayuu tu cáh̄yo ndaā:

¹⁰ ĩn tēe fariseo cuahān de templo jeē cacān tahu de. Te ĩn tēe stútú xúhun renta suni cuacacān tahu de templo.

¹¹ Te tēe fariseo, índichi de, te súcuan ni jicān tahu de: Tátā Yaā Dios, na cútahū na núū ní, chi tu cúu ná nájñūhun cándāa sava ga tēe, tēe cuihná, tēe neé, tēe cásiquí ndēe jnāhan cácuu de. Ni tu cúu ná nájñūhun cáa tēe yúcuan jēe stútú xúhun renta jeē scáa ga de jícan de nuū ñáyuu.

¹² Te uū jínu jeē semana iyó ndite ni na núū ní, te jéhe ná nuū ní ĩn ĩn síquī tāca úxī ndajníñu níhín na, áchí de.

¹³ Te tēe stútú xúhun renta, ni jecuiñī jicá de nuū templo, ni tu ní chúndeyí ni de jeē ndonehen de nuū de, chí sa suhva ni cani de yíqui jíca de jeē cucuíhyá ni de. Te ni cahān de: Tátā Yaā Dios, cundáhú ni ni sáña, chí tēe iyó cuéchi cúu ná, áchí de. ¹⁴ Te cáhan rī jíin ró jeē tēe stútú xúhun renta, ni jetáhú Yaā Dios de, te cuanuhun de vehe de. Te tēe fariseo chí tu ní jétáhú yá de. Chí ñayuu jeē sajéhnu i máá i, sa ndululí i. Te ñayuu jeē sálulí i máá i, sa ndujéhnu i. Achí yá.

Jeē ni jícan tahu Jesús jehē sūchi lúlí

(Mt. 19.13-15; Mr. 10.13-16)

¹⁵ Te ni quecoo ñayuu jíin sūchi lúlí núū Jesús, jeē na sóo yá ndaha ya xiní i. Te tēe cáscuáha un ní cajini de jeē súcuan cúu, te ni cacahān de nuū ñáyuu vējicoo jíin i. ¹⁶ Te máá Jesús ni cana ya de, te ni cahān yā:

Cuāha jnūhun na quíjicoo sūchi lúlí jíñā nuū rī, te ma cási rō jeē quíjicoo i. Chí ñayuu jeē ndió cóo ni i cani ni i

nájnūhun sūchi yáha, suu i quívi ndaha Yaā Dios jeē ndacu ya jniñu nuū i. ¹⁷ Te jendaá cahán rī jíin ró, núu ñin ñayuu tú cuatáhú i jeē ndácu Yaā Dios jniñu nuū i, nájnūhun jétáhú ñin sūchi lúlí, ma quívi cuiti i ndaha ya, achí yá.

Jnūhun tēe cúca

(Mt. 19.16-30; Mr. 10.17-31)

¹⁸ Te ñin tēe cújéhnū ni cajnūhún de ya:

Tēe vāha cúu ní Maestro. ¿Te na jniñu vāha sáha ná te nihin tahu na cotecu na ñí cáni andiví? Achí de.

¹⁹ Te ni cahán Jesús jíin de:

¿Naun cáhán rō jeē tēe vāha cúu ri? Tú ni ñin tēe vāha íyó, chi máa ñin-ni Yaā Dios. ²⁰ Je jíin rō tēcá jniñu ní ndacu Yaā Dios: Ma cosíquí ndéē jnáhan ró. Ma cáhni rō ndíyi. Ma sacuíhná ró. Ma sajnūhún ró. Cuatáhú ró nuū tatá rō nuū naná rō. Achí yá.

²¹ Te ni cahán maá de:

Tēcá jniñu yáha je ni squícu ná ndé ná lulí ná, achí de.

²² Te Jesús ni jini ya jnūhun yáha, te ni cahán yā jíin de:

Ñin na jniñu cúmaní sáha ró núu súcuan. Xícó ndíhi jeē névāha ró, te cuāha ró núu ñayuu ndahú. Te nde andiví cuāha ya jeē vāha ndasí núu rō. Yūcuán na te quiji ró condiquin rō ruhū, achí yá.

²³ Te ná ni jini sōho de jnūhun yáha, te yōhyo ni cucuíhyá ni de, chi cúca ndasí de. ²⁴ Te jíto Jesús jeē súcuan cucuíhyá ni de, te ni cahán yā:

Tēe cúca chi yōhyo yí quívicoo de ndaha Yaā Dios jeē ndacu ya jniñu nuū de. ²⁵ Yachí gā yāha ñin camello yaū yutícuí vēsú jeē quívi ñin ñayuu cucá ndaha Yaā Dios jeē ndacu ya jniñu nuū i, achí yá.

²⁶ Te tēe ní cajini jnūhun yáha, ní cacahán de:

¿Ndé ñayuu cúu jeē cácu núu súcuan? Achí de.

²⁷ Te ni cahán yā jíin de:

Ñayuu chi ma cúu squívi i máá i ndaha Yaā Dios, te máá yá chí cuu sáha ya, achí yá.

²⁸ Yūcuán na te ni cahān Pedro:

Sāña jǰnāhan ná ní castóo ná ndíhi jeē cánevāha ná, te cándiquīn na níhín, áchí de.

²⁹ Te máá yá ni cahān yā jíin de:

Jendaá cahán rī jíin ró jǰnāhan ró, núu na-ni ñayuu stóo i vehe, chí tátá, chí ñani, chí ñasihí, chí séhe, jeē síquí jeē scáca i jnūhun jeē ndácu Yaā Dios jniñu nuū ñáyuu, ³⁰ núu súcuan te nanihīn cuehē gā i ini ñayīvi yáha, te tiempo quiji te cotecu i ní cáni, áchí yá.

Jeē ni cáhān tucu ya jeē cúu yā

(Mt. 20.17-19; Mr. 10.32-34)

³¹ Te ni cana sǰn ya ndíhúxí uū tēe cáscuáha jíin yá, te ni cahān yā jíin de:

Vijna je cuángoo yó ñuu Jerusalén. Te yūcuan squícu ndíhi jnūhun ndese ndoho ruhū, Yaā ní nduu tēe, nájnūhun ni catee tēe ni canacani jnūhun Yaā Dios nde jenahán. ³² Chi ñayuu nastúu i ruhū nuū tēe nación Roma jeē cáyūcú Jerusalén cándacu jniñu. Te tēe un sácatā de nuū rī, te cahān neé de nuū rī, te tesíhí de nuū rī. ³³ Te cani de ruhū, te sáa te cahni de ruhū. Te nuū uní quiví te natecu rī. Achí yá.

³⁴ Te máá de tu ní cájecūhun cuiti ni de tāca jnúhun yáha. Chi jnūhun yí cúu, te tu ní cúu jecūhun ni de jeē cahán yā.

Jeē ní nasávāha ya ñin tēe cuáá ñuu Jericó

(Mt. 20.29-34; Mr. 10.46-52)

³⁵ Te ni cuyajni ya cuahān yā ñuu Jericó. Te ñin tēe cuáá néne de yuhíchi, jícan de caridad. ³⁶ Te ni jini sōho de jeē yáha cuehē ñayuu cuángoo i, te ni cajnūhún de naun cuángoo i. ³⁷ Te ni cacahān i jíin de jeē Jesús, tēe ñuu

Nazaret, yáha ya cuahān yā. ³⁸ Yūcuán na te ni cana jee de:

Jesús Sēhe yucūn David, cundáhú ni ni sáña, áchí de.

³⁹ Te ñayuu cuango ichi núú yā, ni cacahān i nuū de jeē na cási de yuhu de. Te máá de víhyá gā ni cana jee de:

Máá ní jeē cúu ní Séhe yucūn David, cundáhú ni ni sáña víí, achí de.

⁴⁰ Yūcuán na te ni jecuiñī Jesús, te ni cahān yā jeē na quíndeca i de. Te nuū ní cuyajni de nuū yā, te ni cajnūhun yá de:

⁴¹ ¿Na vé cuní rō jeē sáha ri jíin ró? achí yá.

Te ni cahān de:

Jeē na ndúndijin tinūu ná cuní na, áchí de.

⁴² Te ni cahān Jesús jíin de:

Ndundijin tinūu ró núu súcuan. Ni candíje ró jeē cuu nasávāha ri rohó, te jeē yúcuan ní nduvāha ró, áchí yá.

⁴³ Te ni ndundijin-ni tinūú de, te ni ndiquīn de ya, te nácuatáhú de nuū Yaā Dios. Te ndīhi ñayuu jeē ní cajito i, suni ni cacahān i jeē yóhyo vāha Yaā cúu Yaā Dios.

Jnūhun Zaqueo

19

¹ Te ni quīvi Jesús ini ñuu Jericó, te ni yāha-ni ya cuahān yā. ² Te yūcuan íyó ñn tēe cúcá nání de Zaqueo, te cújéhnú de nuū tēe cástútú xúhun renta. ³ Te cuní de coto de návāha cuni de ndé ñn cúu Jesús. Te tu ní cúu, chi cuehē ñayuu cuango i jíin yá, te ndīqui-ni cáa de. ⁴ Te jínu de ni cosnūú de. Te ni caa de xinī ñn nuyūhndú návāha coto de nuū yā, chi yūcuan yáha ya quihīn yā. ⁵ Te ni jinū yā yūcuán, te ni ndacoto ndaa ya nuū de. Te ni cahān yā:

Zaqueo, yachī nuu ró, chi jíni ñúhún jēē ndóo ri vehe ró vijna, áchí yá.

⁶ Yūcuán na te ni cusī ni de, te yachī ni nanuu de, te ni jeca de ya cuahān de jíin yá vehe de. ⁷ Te ni cajito ñayuu jeē súcuan ni cuu, te ni cacahān i síquī yā jeē cuahán yā ndōo ya vehe ñn tēe sáha cuēchi. ⁸ Yūcuán na te ni ndocuiñī Zaqueo, te ni cahān de jíin máa Jítóho yō:

Vijna te sava ndīhi ndajniñu ná chi cuāha ná núu ñáyuu ndahú. Te núu ni scáa ga na ní jicān na xúhun nuū ñáyuu, te nacuāha ná únī gā síquī naquihin i, áchí de.

⁹ Te ni cahān Jesús:

Vijna te vehe yáha je ni cācu ñn tēe jeē ma jnahnú ndetū de, chi ni candíje de nájnūhun ni candíje jí de Abraham. ¹⁰ Chi ruhū, Yaā ní nduu tēe, ni quiji ri nducú rí ñayuu jeē jnahnú ndetū, te jnama ri i, áchí yá.

Jnūhun yátá síquī uxī mozo jíin xúhun

¹¹ Te nuū ñáyuu ní cajini tāca jnūhun yáha, ní cahān gā Jesús ñn jnūhun yátá jēe steén yā ndese coo quivī ndíji ya. Chi je ni cuyajni ya ñuu Jerusalén, te cájeni ni i jeē víjna ñúhún quejéé jēe ndácu ya jniñu sáha Yaā Dios. ¹² Te ni cahān yā:

Ñn tēe cújéhnū cuahān jicá de ñnga nación, návāha nihīn jniñu de cuu de rey, te ndíji de ndacu de jniñu. ¹³ Te nde ná tu quihīn de, te ni cana de uxī mozo de, te nuū ñn ñn i ni jēhe de ñn xūhun jēe ndeé yahu ndasí. Te ni cahān de jíin i: Sájniñu ró jēe na ndúcuehē xūhun yáha jíjnáhan ró níni jēe quihín rī te ndee rī, achí de. ¹⁴ Te ñayuu nación de cáquitī ni i nuū de, te ni catajī i jecu tēe cándiso jniñu cuango yatā de jeē cahān: Tu cánujnahan ni ñayuu nación na jēe cuáha ní jniñu nuū tēe yáha jēe cuu de rey nuū i, áchí. ¹⁵ Te vēsú súcuan te ni nihīn jniñu de cuu de rey, te vendíji de nación de. Te nuū ní ndee de, te ni ndacu de jniñu jeē na quíjicoo mozo jeē ni jēhe de xūhun núu, návāha na cúni de naśaa ni canihīn ñn ñn i síquī. ¹⁶ Te ni quee ñn mozo un núu de, te ni cahān i: ñn

xūhun jēē ni jéhe ní núū ná, ni nduu uxī, achí i. ¹⁷ Te ni cahān maá rey: Vāha mozo cúu ró, te vāha ni sáha ró. Chi ni squícu vāha ró jíín ñn jniñu lúli-ni, te vijna te sáha ri jeē cujéhnú ró ndacu ró jniñu nuū uxí ñuu jnǎ ri, achí de. ¹⁸ Te ni quee inga mozo, te ni cahān i: ñn xūhun jēē ni jéhe ní núū ná, ni nduu uhūn, achí i. ¹⁹ Te suni ni cahān de jíín mozo un: Róhó, cujéhnú ró ndacu ró jniñu nuū uhún ñuu jnǎ ri, achí de. ²⁰ Te ni quee inga mozo, ni cahān i: Yāha nácuāha ná xúhun ní, chi ni chuvāha ná ini ñn pañuelo. ²¹ Chi ni yūhu ná nihín, chi tēe xeēn cúu ní. Chi cuehē gā nándacān ní vēsú jeē ni jéhe ní, te cuehē gā cuní ni vēsú jeē cúu sáha mozo ni, áchí de. ²² Yūcuán na te ni cahān rey: Mozo neé cúu ró núu súcuan, te jíín jnúhun ni cahān rō te sándaā rī jeē iyó cuéchi ró jéē tu ní sájniñu ró jíín xúhun rí. Chi jéni ni rō jeē tēe xeēn cúu ri, te cuehē gā nándacān rī vēsú jeē ni jéhe ri, te cuehē gā cuní rī vēsú jeē cúu sáha mozo rī. ²³ Núu súcuan ¿te naun tu ní chúne ró xúhun rí vēsú nuū banco? Te jeē ní ndee rī te naquihin ri xūhun rí nde jíín séhe xūhun núú. Achí de. ²⁴ Te ni cahān de jíín ñáyuu cáhiin yūcuán: Quende xūhun jíínā nuū i, te cuāha ró núū mozo jeē névāha uxī, achí de. ²⁵ Te ñayuu un ní cacahān i jíín de: Te ndese, chi je névāha de uxī, achí i. ²⁶ Te ni cahān tucu rey: Cáhán rī jíín ró jeē ñáyuu je névāha, sa quiji ga nuū i, te conevāha cuehē i. Te ñayuu jeē tu névāha, sa cujiyo-ni vēsú jecu jeē névāha i. ²⁷ Te tēe jeē cájito uhū ruhū, jeē tu ní cánujnahan ni de jeē cuu ri rey nuū de, cuáquihin de na quíjicoo de yāhá. Te cahni rō de coto ri, achí de. Achí Jesús.

Jeē ni quívi Jesús ñuu Jerusalén

(Mt. 21.1-11; Mr. 11.1-11; Jn. 12.12-19)

²⁸ Te nuū ní ndíhi ni cahān yā jnūhun yáha, te ni jica ga yā cuahān yā ñuu Jerusalén. ²⁹ Te nuū ní cuyajni ya

ñuu Betfagé jíin ñuu Betania, yajni nuū íne yucu nání yucu Olivos, te ni tají yá uū tēe cáscuáha jíin yá jeē quíngoo de.

³⁰ Te áchí yá jíin de:

Cuáhán ñuu lulí íne ichi núú. Te núu ni quívi ró, te nihīn rō ñin burro núhní tī, jeē ní ñin tēe ná tu coso de tī. Te ndají ró tī quiji ró jíin tī. ³¹ Te núu ndé ñin cajnūhún naun cándají ró tī, te cahān rō jíin: Máá Jítóho yō jíni ñúhún yá tī, achi rō. Achí yá.

³² Te cuangoo tēe ni tají yá, te ni canihīn de tī nájñuhun ni cahān yā jíin de. ³³ Te jeē cándají de tī, te ni cacahān jítóho tī jíin de:

¿Naun cándají ró burro ri? achí.

³⁴ Te ni cacahān de:

Máá Jítóho yō jíni ñúhún yá tī.

³⁵ Te ni ndecoo de jíin tī nuū Jesús. Te ni casoó de sahma de siquī tī, te ni casáha de jeē ní jecosō yā siquī tī.

³⁶ Te ná-ni cuahān yā, sáá cáscáá ñayuu sahma i ini ichi.

³⁷ Te nuū ní cuyajni ya nuū cúun ichi yucu Olivos, te ndíhi ñayuu cácdíje jeē cándiquīn i ya, ni caquejéé i cácusī ni i, te cácana jee i jeē yóhyo vāha Yaā cúu Yaā Dios siquī tācá jniñu jéhnú ni sáha ya ni cajito i. ³⁸ Te áchí i:

Yóhyo vāha Yaā cúu Rey jeē véji jíin jniñu máá Jítóho yō Yaā Dios. Te sáha ya jeē cóo manī yō jíin Yaā Dios andiví. Te yóhyo cújéhnú Yaā Dios, achí i jíináhan i.

³⁹ Yūcuán na te jecu tēe fariseo cáhiin mēhñu ñáyuu cuehē ún, ní cacahān de jíin yá:

Maestro, cahān ni núu ñáyuu cándiquīn nihín jēé na cási i yuhu i, achí de.

⁴⁰ Te ni cahān Jesús:

Cáhán rī jíin ró jeē núu ñayuu yáha na cási i yuhu i, te tāca yúu chi cana jee, achí yá.

⁴¹ Te nuū ní cuyajni ya Jerusalén, te ni jito ya ñuu ún, te ni ndahyū yā siquī. ⁴² Te ni cahān yā:

Róhó ñáyuu Jerusalén, yōhyo ni cuu ni rī jeē na jécūhun ni rō jeē cuu ndumanī rō jíin Yaā Dios sáha ri. Te siquī jeē tu cá candíje ró, te vijna chi ma cúu ga jecūhun ni rō. ⁴³ Chi quee quivī jeē coo jnūndóho, te ñayuu cájito uhū rohó, cuicó ndūū i ñuu rō, te casi cutú i jíin yūū, te tāca lado ndonda i siquī rō. ⁴⁴ Te ndīhi vehe scótúú i, te cahni i róhó jíjnáhan ró. Te ma stóo i ni ñin vehe jeē cóso jnáhan ga yuū. Chi ni quiji ri nde nuū Yaā Dios jeē jnáma ri rohó, te tu ní cá candíje ró. Achí yá.

Jeē ní quenehen ya ñayuu ini templo

(Mt. 21.12-17; Mr. 11.15-19; Jn. 2.13-22)

⁴⁵ Te ni quivī ya ini templo cáhnu, te ni quejéé yá quenehen ya tāca ñáyuu cájeen quitī te cánaxico núū ñáyuu jeē socō i. ⁴⁶ Te ni cahān yā jíin i:

Yósó núū tútu iī jeē cahān Yaā Dios: Vehe ri chi vehe nuū cájicān tahu cúu, áchí Yaā Dios. Te máá ró jíjnáhan ró, chí nájnūhun yaū cava ñacuihna ní canasáha ró, áchí yá.

⁴⁷ Te ndiquivī ni steén yā jnūhun ini templo. Te sutū cácujeñhu jíin tée cástéén tutu ley Yaā Dios jíin tée cácujeñhu nuū ñáyuu ñuu ún, cánducú de modo ndese cahni de ya. ⁴⁸ Te tu cánihin de modo sáha de, chí ndivii ñayuu yōhyo cájetáhú i cájini nahín i jnūhun cáhān yā.

Siquī jeē ndíso jníñu Jesús

(Mt. 21.23-27; Mr. 11.27-33)

20

¹ Te ñin quivī steén yā jnūhun nuū ñáyuu ini templo, te nácani ya jnūhun jeē jnáma Yaā Dios ñayuu. Te ni quecoo sutū cácujeñhu jíin tée cástéén tutu ley Yaā Dios jíin táca tée jéñhu cándacu jniñu. ² Te ni cacahān de:

Castūhún, ¿ndé ní nihīn jniñu ró jéē sāha ró jniñu yáha? ¿Te ndé ñin ni tee jniñu siquī rō jeē sāha ró súcuan? Achí de.

³ Te ni cahān Jesús jíin de:

Suni ruhū cajnūhun rí rohó ñin jnūhun jíinahan ró. Castūhun núū rī: ⁴ ¿Ndé ñin ni tee jniñu siquī Juan jeē ni scuándute de? ¿A Yaā Dios chí táca téé? Achí yá.

⁵ Yūcuán na te ni candajnūhun máá de:

¿Ndese cahān yō? Núu cahān yō jeē Yaā Dios ni tee ya jniñu un siquī Juan, te cahān de jíin yó: ¿Najehē tu ní cácanđije ró de núu súcuan? ⁶ Te núu cahān yō jeē ñáyuu ni catee jniñu un siquī de, te ndivii ñáyuu cahni i yóhó jíin yūū, chí cácanđije i jeē téé ni nacani jnūhun Yaā Dios ni cuu ndije Juan, achí de cácahān maá de.

⁷ Te ni cacahān de jeē tu cájini de ndé ñin ni tee jniñu siquī Juan jeē ni scuándute de. ⁸ Yūcuán na te ni cahān Jesús:

Ni ruhū, suni ma cáchi rī nuū rō ndé ñin ni tee jniñu siquī rī sāha ri jniñu yáha, áchí yá.

Jnūhun yátá siquī tēe néé cásájniñu nuū uva

(Mt. 21.33-44; Mr. 12.1-11)

⁹ Te ni quejéé Jesús cahān yā jnūhun yátá yáha jíin ñáyuu ún:

Ñin tēe ni nachuhun de cuehē uva nuū ñúhun de. Te ní stóo de nuū sava tēe sájniñu nuū, te cuu sava de ndehē jíin. Te ni tee de ichi jeē cuahān nahān de inga ñuu. ¹⁰ Te máá tiempo ndutútú uva, te ni tají de ñin mozo cuahān nuū téé cásájniñu ún, návāha naquihin de sava ndehē uva un. Te tēe un ní cacani de mozo, te ni canatajé de i cuanuhun i súcuan-ni. ¹¹ Te tēe chíí uva ni tají tucu de inga mozo cuahān. Te tēe cásájniñu ún, suni ni cacahān ndevāha de nuū i, te ni cacani de i, te ni canatajé de i cuanuhun i súcuan-ni. ¹² Te tēe chíí uva ni tají tucu de inga mozo

cuahān. Te tēe cásájniñu ún, suni ni castújí de mozo un, te ni cascúnu de i.

¹³ Yūcuán na te ni cahān tēe chíí uva: ¿Ndese sáha ri? Na tájí rí sēhe ri jeē maní rī jíín, chi sanaa te núu ni cajito de i te coo yíñúhún de nuū i. Achí de. ¹⁴ Te tēe cásájniñu ún, ná ni cajito de jeē véji i, te ni cacahān de: Tēe chíí táhū cúu jeē véji ún. Na cáhni yō de, te ndōo tahū de cuu máá yó, achí. ¹⁵ Te ni caquenehen de i inga lado, te ni cajehni de i, achí yá.

Te ni cajnūhun yá de:

Núu súcuan ¿te ndese sáha tēe chíí uva jíín tēe cásájniñu ún? ¹⁶ Ndihi de te cahni de tēe un jíínáhan, te cuāha de ñuhun cáá uva un núu inga sava tēe sájniñu nuū, achí yá.

Te jeē ní cajini ñayuu jnūhun yáha, te ni cacahān i:

Aí, núu ma cóo cuiñi súcuan víí, achí i.

¹⁷ Te ndéhé yá nuū i jíínáhan i, te ni cahān yā:

Núu súcuan ¿te á cájecūhun ni rō jnūhun yáha jeē yosó núu tútu íi jeē cúu ri nájnūhun ñn yuū? Chi achí tutu:

Yuū jeē ní casquéhichí tēe cájeni vehe, yuū yáha nduu jeē quítuu vehe.

Achí. ¹⁸ Te ñayuu tu cácandíje, ndoho i nájnūhun ndóho ñayuu jeē cotúú siquī yuú te jnánhú i. Te quiví sándaā Yaā Dios cuēchi, te ñayuu tu cácandíje, ndoho i nájnūhun ndóho ñayuu jeē nínga yuū siquī i te cundihí i sáha. Achí yá.

Siquī xúhun renta

(Mt. 21.45-46; 22.15-22; Mr. 12.12-17)

¹⁹ Yūcuán na te sutū cácujuhnu jíín tēe cástéén tutu ley Yaā Dios, ni cacuni de jñi de ya maá hora un. Chi ni cajecūhun ni de jeē siquī maá de cúu jnūhun yátá ní cahān yā siquī tēe cásájniñu nuū uva jíín tēe cájeni vehe. Te tu ní cúu, chi cáyuhú de jeē quítí ni ñayuu. ²⁰ Yūcuán na te ni

cataj́ de jecu tēe cuacoto yuhu de ya, te tēe un cásáha-ni de jeē tēe ndaā cácuu de. Te cánducú de sáha de jeē cahán yā ìn jnūhun jeē nihín de cuēchi siquī yā, te quindeca de ya nuū tēe cúu gobernador. ²¹ Te ni cacahān de:

Maestro, cájini na jēē cahán vāha ní, te stēén ndaā ní. Te tu sáha ní cuenta ndese cúu ìn ìn ñayuu, chi ìnuú-ni sáha ní jíin i. Te stēén ndaā ní ndese squícu ñayuu nuū Yaā Dios. ²² Núu súcuan te cachi ní: ¿A íyó váha jeē chúnaa yō renta nuū rey nación Roma jeē jnń́ nación yō, chí tuú? áchí de.

²³ Te ni jini yā jeē cácuni de stáhú de ya, te ni cahán yā jíin de:

¿Najehē cájito ndee rō ruhū? ²⁴ Stēén ìn xūhún na cóto ri. ¿Ndé ìn nuū cúu jeē ndeé nuū xūhun yáha, te ndé síhví cúu jeē ndeé yáhá? áchí yá.

Te ni cacahān de jíin yá:

Nuū jíin síhví rey un cúu, áchí de.

²⁵ Yūcuán na te ni cahán yā jíin de:

Núu súcuan te nacuāha ró núu rey un jēē yíhi cuenta nuū de, te nacuāha ró núu Yaā Dios tāca jēē yíhi cuenta nuū maá yá, achí yá.

²⁶ Te tāca tēe ún tu ní cúu nihín de cuēchi siquī yā jíin ni ìn jnūhun cáhán yā, cájito jíinúū ñayuu. Chi sa ni canaa ni de jeē ndichí ní stió cúíń́ yā jnūhun nuū de, te tuá na vé ni cácahān de.

Jeē ní cacajñūhún de siquī jeē nátecu ndīyi

(Mt. 22.23-33; Mr. 12.18-27)

²⁷ Yūcuán na te jecu tēe grupo saduceo ni quecoo de nuū yā. Te tēe un cácahān jeē tu nátecu cuítí ndīyi. Te ni cacahān de jíin yá:

²⁸ Maestro, Moisés ni tee de nuū tútu jeē cánevāha yó: Núu ìn tēe cuu de, te ndōo ñasihí de, te núu tu ní íyo sēhe de jíin ña, núu súcuan te cánuú jeē ñani de naquihin ñasihí

de, te sēhe de jeē cácu jíin ña nucuĩñī i nuū ndýi ñani de, áchí tutu. ²⁹ Núu súcuan te ni iyo uxā ñani. Te tēe núu ní quijnáhan de jíin ñahan. Te ni jihī de, te tú sēhe de ní íyo. ³⁰ Te tēe uū ni naquihin de ña, te suni ni jihī de, te tú na sēhe de ní íyo. ³¹ Te tēe unī ni naquihin de ña. Te suni súcuan ndihúxá de ni condeca de ña, te ni cajihī ndihī de, te ni ñin de tú sēhe de ní íyo. ³² Te jeē sándihí te suni ni jihī ñahan ún. ³³ Núu súcuan te núu na nátecu de jíjnáhan de quiñī nátecu ndīyi, ¿te ndé ñin de cuu ña ñasihí de? Chi ndihúxá de ni condeca de ña. Achí de jíjnáhan de.

³⁴ Yūcuán na te ni cahān yā jíin de:

Ñayīvi yáha chi cáquiñáhan tēe jíin ñahan. ³⁵ Te ñayuu vāha jeē natecu i quiñícoo i andíví, ma quiñáhan ga i yūcuán, chi tuá na jnūhun quiñáhan tēe jíin ñahan coo. ³⁶ Ni ma cúu cuiñi gā i, chi coo i nájnūhun ndajéhé Yaā Dios. Te sēhe Yaā Dios cuu i, chi je ni canatecu i. ³⁷ Te suni máá Moisés cáhán de jeē nátecu ndīyi, chi ni tee de nuū tútu ndese ni cahān yā jíin de mēhñu yúcū jeē cayú yáñuhūn. Chi ni cahān de jeē cúu ya Yaā Dios Abraham jíin Isaac jíin Jacob. ³⁸ Te jeē ni cáhán de súcuan cúu jeē ní cachi de jeē cátecu tāca ndýi. Chi vēsú je ni cajihī i, te cátecu i nuū iyó máá yá, chi cúu ya Yaā sáha jeē técu ñayuu ní cáni. Achí yá jíin de.

³⁹ Te jecu tēe cástéén tutu ley Yaā Dios ni cacahān de:

Vāha ni cahān ní Maestro.

⁴⁰ Te tuá ni cáchundeyí ni de cajnūhún de ya.

Siquī jeē cúu Cristo sēhe yucūn David

(Mt. 22.41-46; Mr. 12.35-37)

⁴¹ Te ni cahān yā jíin de jíjnáhan de:

¿Ndese cúu jeē cácahān ñayuu jeē Cristo cúu sēhe yucūn David? ⁴² Chi máá David suhva ni cahān de jnūhun ya nuū tútu Salmo:

Máá Jítóho yō Yaā Dios suhva ni cahān yā jín Jítóho rī, Yaā quiji:

Cucōo ró lado váha ri nuū cujéhnū ró,

⁴³ te na sáha ri jeē quende rō poder tāca jéē cájito uhū rohó.

Achí Yaā Dios. Achí David. ⁴⁴ Te núu sēhe yucūn David cúu Cristo, ¿te ndese cúu jeē ni cáhān de jeē Jítóho de cúu ya? áchí yá.

Jeē ni cáhān yā jeē iyó cuéchi de jínáhan de

(Mt. 23.1-36; Mr. 12.38-40; Lc. 11.37-54)

⁴⁵ Te ni cahān yā jín tée cáscuáha jín yá, te suni ni cajini sōho ndíhi ñayuu:

⁴⁶ Coto má cándíje ró táca tée cástéén tutu ley. Chi cácusíi ni de cáñuhun de sahma cáni jeē steén jeē cujéhnū de, cájica cuu de jín. Te cánujnahan ni de jeē cahán yíñúhún ñáyuu jín de nuū yáhu. Te cánujnahan ni de cucōo de nuū silla yíñúhún gá ini vehe iī sinagoga, jín silla yíñúhún gá nuū víco cáyeji ñayuu. ⁴⁷ Te cáquende de vehe ñahan ní caquendōo ndáhú. Te nahán cájicān tahu de návāha cani ni ñayuu jeē tú na cuéchi de. Tēe yáha jínáhan de chi xeēn gā ndoho de castigo. Achí yá.

Jeē ni sócō ñahan viuda xūhún

(Mr. 12.41-44)

21

¹ Te ná ni iyo ya ini templo, te jító ya nuū ñáyuu cucá jéē cáchuhun i cuehē xūhún ini tāca yéjnū nuū cásocō i.

² Te suni ni jito ya nuū iñ ñahan viuda jeē ndóho ndáhú, te ni chuhun ña uū centavo lulí ini yejnū ún. ³ Te ni cahān yā:

Jendaá cahán rī jín ró jeē cuehē gā cúu jeē ni sócō ñahan viuda ndahú yáha, vēsú jeē ní casocō tāca gá ñayuu.

⁴ Chi tācá i ni casocō i jeē ni ndóo siquī xúhun cuéhē i. Te

ñahan yáha, vēsú ndahú ndóho ña, te ni chuhun ndíhi ña jeē cótecu ña. Achí yá jíin de.

Jeē ní cachi yā jeē náā templo

(Mt. 24.1-2; Mr. 13.1-2)

⁵ Te sava de ni cacahān de jeē luu cáa templo cáhnu, chi ni cuvāha jíin táca yúū luu jíin táca jéē ní casocō ñayuu. Yūcuán na te ni cahān yā:

⁶ Ndíhi jeē cájito ró yáha, quee quivī jeē ma cóso jnáhan ga ni ĩin yuū, chi ndíhi jnanū, achí yá.

Na seña coo nuū cuácuyajni ndíhi ñayīví

(Mt. 24.3-28; Mr. 13.3-23)

⁷ Te ni cacajnūhún de ya:

Maestro, ¿ndé quivī coo tāca jéē ní cachi ní jéē coo? ¿Te na seña coo nuū cuácuyajni squícu tāca jéē ni cáhān ní? áchí de.

⁸ Te ni cahān yā:

Coto ró jéē ma stahú i róhó. Chi quijicoo cuehē tēe jeē stahú jíin síhví rí, te cahān de: Máá rí cúu Cristo. Te suni cahān de: Je ni quee quivī ndíhi ñayīví, achi de. Te ma cóndiquīn rō de. ⁹ Te núu nihīn rō jnūhun jeē tāca lado iyó guerra te cándonda ñayuu siquī tohō, te ma yūhu ró, chi cánuú jéē xíhna gā coo súcuan, te ni ma jinú yachī quivī ndíhi ñayīví. Achí yá.

¹⁰ Te ni cahān gā yā:

Ndonda nación siquī inga nación, te ndonda ñuu siquī inga ñuu jeē cuajnáhan. ¹¹ Te cháha chúcuan jnáa téyí, te coo jnamā jíin cuéhyī xeēn. Te coo seña jéhnu ichi ándiví jéē yūhú ndasí ñayuu coto i.

¹² Te nde ná tu coo tācá jniñu yáha, te coto xeēn i róhó, te jni i róhó. Te quindecia i sava ró táca vehe ĩi sinagoga jeē cahán i cuéchi siquī rō. Te chune i sava ró vecāa. Te quindecia i sava ró núū tāca rey jíin núū tācá gobernador,

te cahān i cuēchi siquī rō jeē siquí jeē cá candíje ró rúhū. ¹³ Te jeē súcuan coo, te cuitē núu ga jnūhun ri, chi nacani ndaā rō nuū de jíjnáhan de. ¹⁴ Núu súcuan te cundaā ni rō jeē ma nácani ni rō xihna gā ndese stío cuiñí rō nuū de te cācu ró. ¹⁵ Chi ruhū cuāha ri jnūhun ndíchí cahān rō, návāha ñayuu jeē cájito uhū rohó, ma cúndeyí i jíin ró ni ma cúu cahān i siquī rō. ¹⁶ Te nde tatá rō, naná rō, ñani rō, jnáhan ró, jíin amigo rō, nastúu i róhó núu ñayuu xeēn. Te cahni i sava ró. ¹⁷ Te tāca ñáyuu chi quití ni i nuū rō jeē siquí ruhū. ¹⁸ Te ni ñin ixi xíní rō jíjnáhan ró ma náā, chi coto ya rohó. ¹⁹ Te núu cuiñí nihin ró jíin jnúhun ri, te cotecu rō ní cáni.

²⁰ Te núu ni cajito ró jéē ní cajicó ndúu soldado ñuu Jerusalén, te na jécūhun ni rō jeē jé yajni naa ñuu ún. ²¹ Yūcuán na te ñayuu cáyūcú región Judea, na cúnu i caa i yucu quingoo i. Te ñayuu cáyūcú Jerusalén, na quéndacoo i quingoo i. Te ñayuu cáhiin nde rancho, ma nándicó i ñuu ún. ²² Chi tāca quiví un cuáha Yaā Dios castigo nuū ñáyuu jeē siquí cuéchi i, návāha squícu tāca jnúhun jeē yosó núu tútu. ²³ Te quiví ún nacā jeē ndahú ñahan cáñuhun sēhe jíin ñahan cándeca yiquín, chi ma cúnihin ña cunu yachí ña. Chi yōhyo xeēn coo jnūndóho ini ñayiví, te quiji castigo xeēn siquí ñáyuu yáha. ²⁴ Te sava i cuu nuū guerra, te sava i quingoo preso nde tācá inga nación. Te ñayuu tāca gá nación ndacu nihin i jniñu nuū ñáyuu ñuu Jerusalén, nde jīnu tiempo jeē jéhe Yaā Dios jnūhun ndacu i jniñu.

Ndese coo quiví ndiji Yaā ní nduu tēe

(Mt. 24.29-35, 42-44; Mr. 13.24-37)

²⁵ Yūcuán na te coo seña nuū níandii jíin núu yoó jíin núu quími. Te ini ñayiví te quiji jnūndóho xeēn siquí ñáyuu tācá nación. Te cunéé ni i, te yūhú i jeē níhin xeēn mar te ndóna xeēn ndute mar vēji nuū ñúhun. ²⁶ Te cuu

sōó sava ñayuu jeē cáyūhú i cándetu i tāca jnúndóho quiji síquī ñayīví. Te tāca jéē ín andīví chi quisí i. ²⁷ Yūcuán na te coto ñayuu nuū maá rí, Yaā ní nduu tēe, ndiji ri jíin vícō, te condiso ri cuehē poder, te yōhyo luu kujéhnú ri. ²⁸ Te núu ni quejéé táca jniñu yáha, te ndeyí coo ni rō, te cocunuū rō andīví, chi je yajni jnama ya rohó. Achí yá jíin de jíjnáhan de.

²⁹ Te suni ni cahān yā jnūhun yátá yáha:

Condēhe jíjnáhan ró ndese sáha nundēhe higo jíin táca gá yujnu. ³⁰ Núu cájito ró jéē ní quejéé náne numa yújnu ún, te cájini rō jeē jé yajni coo tiempo jihní. ³¹ Te suni súcuan núu ni cajito ró jéē ní quejéé cúu tācá jniñu jeē ni cáhān rī, yūcuán na te na jécūhun ni rō jeē ní cuyajni quivī ndacu Yaā Dios jniñu ini ñayīví.

³² Jendaá cahán rī jíin ró jeē ma cúū ndīhi ñayuu tiempo un, chi nde squícu ndīhi jniñu ún. ³³ Andīví jíin ñáyīví chi naa, te tāca jnúhun cáhān rī chi ma náā, chí ndīhi squícu.

³⁴ Te coto ma stívi ró maá ró jíjnáhan ró jéē sáha ró táca cuéchi, jíin jéē najīni ró, jíin jéē kujnéñu ró jíin táca ndajniñu cotecu rō, návāha tú sanaa ni rō te quee quivī un síquī rō. ³⁵ Chi nájnūhun jeē núu ĩn trampa, súcuan quee jnúndóho síquī ñáyuu cáyūcu ní cáhnu ñayīví. ³⁶ Núu súcuan te ndito coo ni rō, te níni cácan tahu rō, návāha cuu cācu ró núu tāca jnúndóho jeē quíji ún, te cuu cuiñi ró núu ruhū, Yaā ní nduu tēe. Achí yá.

³⁷ Te ndiquivī steén yā jnūhun ini templo, te ndijnahan jecuáa jéndōo ya nde yucu jeē naní Olivos. ³⁸ Te tāca jénéhen quécoo ñayuu nuū yā ini templo jeē cúni sōho i jnūhun stéén yā.

*Jeē ní casquíjnáhan de jnūhun jni de Jesús
(Mt. 26.1-5, 14-16; Mr. 14.1-2, 10-11; Jn. 11.45-53)*

22

¹ Yūcuán na te ni cuyajni vico pascua jeē cáyeji ñayuu hebreo pan jeē tú na levadura yáhi. ² Te sutū cácujeñnu jíin tée cásteén tutu ley, ni canducú yuhu de modo cahni de Jesús, chi cáyūhú de jeē quitī ni ñayuu.

³ Te ni quīvi Satanás ini anuá Judas jeē nastúu de ya. Te suni nání de Iscariote, te cúu de ñin jnáhan jeē ndihúxí uū tēe apóstol. ⁴ Te ni jehēn de ni candajnūhún de jíin táca sūtū cácujeñnu jíin tée cándiso jníñu ini templo, núu ndese nastúu de ya nuū tée un jíjnáhan. ⁵ Te tēe un ní cacusiñ ni de, te ni cajejnūhun de jeē cuáha de xūhun núu Judas. ⁶ Te ni jetáhu Judas, te ni nducú de modo ndese nastúu yuhu de ya hora jeē tú na ñayuu iyó.

Jeē ní jequin yā Cena yā

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Te ni quee maá quívī vico jeē cáyeji ñayuu pan jeē tú na levadura yáhi, te suni quívī un cájehni i londe nájñūhun ni ndacu Yaā Dios jniñu jeē sáha i vico pascua un. ⁸ Te Jesús ni tají yá Pedro jíin Juan quingoo de, te áchí yá jíin de:

Cuángoo te sátūhva ró jéē cuxíni yó vico pascua, achí yá.

⁹ Te ni cacajnūhún de ya:

¿Ndé nuū cuní ni jéē quisátūhva ná? áchí de.

¹⁰ Te ni cahān yā jíin de:

Cuángoo ñuu yūcuán, te núu ni quīvicoo ró te najnáhan ró jíin ñin tēe ndíso quīyi ndute. Te condiquīn rō de quihīn rō jíin de nde vehe nuū ndívi de. ¹¹ Te cahān rō jíin tée chíi vehe ún: Achí máá Maestro: ¿Ndé ñin cúu cuarto vehe ní cuáha núu ní núu cuxíni ya vico pascua jíin tée cáscuáha jíin yá, achí rō. ¹² Yūcuán na te stéen de ñin cuarto cáhnu nde xinī véhe jeē je íyó túhva, te yūcuan sátūhva ró jéē cuxíni yó, achí yá.

¹³ Te cuangoo de, te ni canihin de najnūhun ni cahān yā. Te ni casātūhva de jeē cuxíni ya vico pascua.

¹⁴ Yūcuán na te ni jinū hora jeē cuxíni, te ni quee Jesús, te ni cucōo ya mesa jíin tée cácuu apóstol. ¹⁵ Te ni cahān yā jíin de:

Yōhyo ni cuu ni rī cuxíni ri jíin ró jijnáhan ró vico pascua yáha, vijna nde ná tu cuu rī. ¹⁶ Chi cáhán rī jíin ró jeē ma cáji cuíti gā rī vico pascua, chi nde quiji quiṽī ndacu Yaā Dios jniñu ní ñayṽí, te sáá te caji tucu ri, achí yá.

¹⁷ Te ni quihin ya ñin copa ndūxi uva, te ni nacuatáhu yá, te ni cahān yā:

Quihin copa yáha, te coho ró jíin jnáhan ró. ¹⁸ Chi cáhán rī jíin ró jeē ndé vijna te ma cóho ga rī ndūxi uva, chi nde quiji quiṽī ndacu Yaā Dios jniñu ní ñayṽí, te sáá te coho tucu ri. Achí yá.

¹⁹ Te ni quihin ya pan, te ni nacuatáhu yá, te ni tahu cuéchi yá, te ni jēhe ya nuū de jíjnáhan de. Te ni cahān yā:

Yāha cúu yiqui cúñu rī jeē socō rī jeē chunaa rī cuéchi ró jíjnáhan ró. Te níni caji rō súcuan jeē cáñuhun ni rō ruhū jeē ni jíhī rī jehē rō. Achí yá.

²⁰ Te suni súcuan ni sáha ya jíin copa ndūxi uva, ná ni cuu ni cuxíni ya. Te ni cahān yā jíin de:

Yāha cúu niñī rī jeē cuáha ri jeē cúu contrato jeé, te cati jeē ndundoo cuéchi ró jíjnáhan ró.

²¹ Te vijna chi tēe nastúu ruhū, néne de jíin rí nuū mesa yáha. ²² Chi ruhū, Yaā ní nduu tēe, jendaá cúu jeē quihín rī cuu rī najnūhun je ni sándaā Yaā Dios jeē súcuan coo. Te nacā xeēn ndoho tēe jeē nastúu ruhū, achí yá.

²³ Yūcuán na te ni caquejé de cácajnūhun jnáhan de ndé ñin de cúu jeē nastúu de ya.

Jeē ní cacahān de siquī ndé ìn de cújéhnū ga

²⁴ Yūcuán na te yōhyo ni cacahān de siquī ndé ìn de cújéhnū ga nuū jnáhan de. ²⁵ Te ni cahān Jesús jíin de:

Rey tācá nación chi cándacu nīhin de jniñu nuū ñáyuu cájni ì de, te cácahān i jeē tēe cásáha vāha cúu jeē cácu-jéhnū nuū i. ²⁶ Te róhó jíjnáhan ró, ma cóo ró súcuan. Chi núu ndé ìn ró cújéhnū ga, te sa nasáha lulí ró maá ró. Te núu ndé ìn ró ndácu jniñu, te sa nasáha ró máá ró tēe jéjniñu nuū jnáhan. ²⁷ ¿Te ndé ìn cúu jeē cújéhnū ga, á tēe yéji nuū mesa, chí tēe jéni cohō? ¿A násūu tēe jeē yéji nuū mesa cúu jeē cújéhnū ga? Te ruhū násūu súcuan cúu ri, chi ni nasáha ri maá rí nájñūhun tēe jéjniñu nuū rō, chí vēji ri sáha ri jeē nihín tahu rō.

²⁸ Te máá ró cácuu tēe jeē niní cáhīin jíin rí tāca quívī jeē ndóho ri jñūndóho. ²⁹ Núu súcuan te nájñūhun ni sáha Tátá ri jeē ndácu ri jniñu, suni súcuan sáha ri jeē ndacu ró jniñu jíjnáhan ró. ³⁰ Te caji rō coho ró jíin rí ini ñuu nuū ndacu ri jniñu. Te cucōo ró ìn ìn mesa jeē sándaā rō jniñu ndíhúxí uū yucūn Israel. Achí yá.

Jeē ní cachi yā jeē yūhu Pedro cahān de jeē jini de ya
(Mt. 26.31-35; Mr. 14.27-31; Jn. 13.36-38)

³¹ Te suni ni cahān maá Jítóho yō jíin Simón Pedro:

Simón, cuni sōho ró, chi ni jicān Satanás rohó jíjnáhan ró jéē coto ndee rohó nájñūhun jeē síjin trigo, te stúu ndé ìn ró cácuu nájñūhun paja jeē nayūhu ró, te ndé ìn ró cácuu nájñūhun trigo jeē candíje nīhin ró. ³² Te ni jicān tahu rī jehē rō návāha ma náyūhu ró jeē ma cándíje ga rō. Te jeē nácandíje tucu ró, te sáha ró jéē íje tāca jnáhan ró jíin jnúhun ri. Achí yá.

³³ Te ni cahān de jíin yá:

Je íyó túhva ná quíhīn na jíin ní vecāa te vēsú na cuu na jíin ní, achí de.

³⁴ Te ni cahān yā:

Pedro, cáhán rī jín ró jeē nde ná tu cana líhli vijna, te yūhu ró jeē jniñ ñayuu rohó, te unī jínu cahān rō jeē tu jíní rō ruhū, achí yá.

Jeē ní cuyajni coto ya jnūndóho

³⁵ Yūcuán na te ni cajnúhun yá de jínáhan de:

Ná ni tají rí rohó ní jengoo ró jēē tu ní cóndiso ró ñunu ni yjñi xūhún ni ndijēn, ¿te á ní iyo ññ jeē ní cumani nuū rō? Achí yá.

Te ni cacahān de:

Tú ni ññ ní cúmani.

³⁶ Te ni cahān yā:

Nde vijna sa cáhán rī jeē cóndiso ró ñunu ró, te suni yjñi xūhún. Te tēē jeē tu névāha espada jeē coto de máá de, na xíco de ticāchí de te na cuáan de. ³⁷ Chi cáhán rī jín ró jeē quee quivī ndoho yó jnúndóho, chi cánuú squícu jnúhun yáha jēē cahán nuū tútu siquī rī: Sáha ñayuu jín yá nájnūhun casáha i jín tēē sáha cuēchi xeēn, achí tutu. Chi tāca jnúhun un jēē yosó cáhán siquī rī, chi squícu nahín, achí yá.

³⁸ Yūcuán na te ni cacahān de:

Yāha íyó úū espada, achí de.

Te ni cahān yā jín de:

Jín jēē yáha-ni, achí yá.

Jeē ni jícān tahu yā nuū huerto Getsemani

(Mt. 26.36-46; Mr. 14.32-42)

³⁹ Te ni quenda ya cuahān yā yucu Olivos nájnūhun sáha sáha ya. Te tēē cáscuáha jín yá ni candiquín de ya cuangoo de jín yá. ⁴⁰ Te nuū ni jínū yā yūcuán, te ni cahān yā jín de:

Cacān tahu rō jijnáhan ró jēē chindéē ñáhán yá rohó jēē ma sáha ró cuéchi núu coto ndee jeneé rohó, achí yá.

⁴¹ Te ni jica ya jecu, cūhva jeē jicá jínú yuū jeē squiín. Te ni jecuiñī yití yá, te suhva ni jicān tahu yā:

⁴² Tátā, núu cúní ni te tejiyo ní jnúndóho yáha jéē ma quiji siquī ná. Te nasūu jéē cuní maá ná, chi jeē cuní maá ní na cóo, áchí yá.

⁴³ Te ni cane iin ndajéhé andiví núu yā, te ni jēhe fuerza nuū yā. ⁴⁴ Te cúcuíhyá ndasí ni yā jeē quiji jnúndóho siquī yā, te ni nducú ndeyí gá yā ni jicān tahu yā. Te ni cane jnañū yā, te tóo nuū ñúhun nájñūhun yúyú náhnu niñī.

⁴⁵ Te ná ni ndocuiñī yā jeē ni jícān tahu yā, te ni ndee yā nuū tée cáscuáha jíín yá. Te ni jito ya jeē cáquixí de, chi tuá cáhīyo ndeyí ni de cacān tahu de jeē cácuquíhyá ndasí ni de. ⁴⁶ Te ni cahān yā jíín de:

¿Naun cáquixí rō? Ndonga te cacān tahu rō jeē chindéé ñáhán yá rohó jéē ma sáha ró cuéchi jeē cóto ndee jeneé rōhó. Achí yá.

Jeē ní cajñī de Jesús

(Mt. 26.47-56; Mr. 14.43-50; Jn. 18.2-11)

⁴⁷ Te sá cáhán gā yā súcuan, te ni quecoo cuehē ñayuu. Te tēe nání Judas, iin jnáhan jeē uxí uū tēe scuáha jíín yá, yósnúu de nuū ñáyuu un véji de. Te ni quee de nde nuū Jesús, te ni techūhú de ya, te súcuan ni nastúu de ya. ⁴⁸ Te ni cahān Jesús jíín de:

Judas, ¿á jíín jéē téchūhu ró ruhū cúu jeē nastúu ró rúhū, Yaā ní nduu tēe? Achí yá.

⁴⁹ Te tēe cáhīin jíín yá, ni cajito de jeē ní quejéé cúu, te ni cacajñūhún de ya:

¿A ndonga ná jíínáhan ná síquī de jíín espada? áchí de.

⁵⁰ Te iin de ni stují de mozo sutū cujéhnu ga, chi ni jehnde de sōho lado váha. ⁵¹ Te ni cahān Jesús:

Siáá, na jécuiñī, achí yá.

Te ni tee ya ndaha ya sōho mozo un, te ni nasávāha ya de. ⁵² Te ni cahān yā jíin sūtū cácujuhnu jíin tée cándiso jníñu ini templo jíin táca tée jéhu jeē ní quecoo de jeē jní de ya:

¿Te va tēe cuíhná cúu ri jeē véjicoo ró jíin espada jíin yujnu jeē jní ró rúhū jeē súcuan? ⁵³ Tāca quívī ni ine ri jíin ró jijnáhan ró ini templo cáhnu, te tu ní cájni ró rúhū. Te vijna te ni quee hora jeē jní ró rúhū jíin jéé sáha ró táca jniñu jeē ndácu jeneé jéé ndeé núū néē. Achí yá.

Jeē ní cachi Pedro jeē tu jíin de ya

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Te ni cajni de ya cuangoo de jíin yá vehe sūtū cujéhu ga. Te Pedro chi jíca-ni ndíquín de ya. ⁵⁵ Te táca policia ni cascáyú de ñuhūn ini patio, te ni condúu de yuñúhún un cáyúcú de. Te suni ni cucōo Pedro jíin de. ⁵⁶ Te ñin ñahan jéjníñu ini vehe un, ní jito ña nuū de jeē néne de yuñúhún. Te ni jito vāha ña nuū de, te ni cahān ña:

Tēe yáha suni ni jica de jíin tée ún, achí ña.

⁵⁷ Te máá de tu ní cáchi de, chi ni cahān de:

Tu jíin rī tēe ún, achí de.

⁵⁸ Te ni cunúu jecu gā, te ni jito tucu inga ñayuu nuū Pedro, te ni cahān:

Róhó, suni jnáhan táca tée un cúu ró, achí.

Te ni cahān Pedro:

Nasūu cúu ri, hombre, achí de.

⁵⁹ Te ni cuu nájnūhun ñin hora gā, te ni cahān ñihin inga de:

Jendaá ndije jeē tée yáha ní jica de jíin tée ún, chi suni tēe región Galilea cúu de, achí de.

⁶⁰ Te ni cahān Pedro:

Hombre, tu jíin rī na jnūhun cáhán rō.

Te sá súcuan cáhán gā de, te ni cana-ni líhli. ⁶¹ Yūcuán na te ni ndió cóto máá Jítoho yō, te ni jito ya nuū Pedro.

Te ni nucūhun ni de jnūhun ni cahān yā jíin de: Nde ná tu cana líhli, te yūhu ró te cahān rō unī jínu jeē tu jíin rō ruhū. ⁶² Te ni quenda de cuahān de, te yōhyo ni ndahyū de jeē ní cachi de jeē tu jíin de ya.

Jeē ní casácatā de nuū yā

(Mt. 26.67-68; Mr. 14.65)

⁶³ Te tāca tēe cándito Jesús, ni casácatā de nuū yā, te ni cacani de ya. ⁶⁴ Te ni cajesí de sahma nuū yā, te ni cacani de nuū yā, te ni cacahān de:

Cachi ndé ñin cúu jeē ní cani róhó, áchí de.

⁶⁵ Te cuehē gā jnūhun súcuan ni cacahān neé de jíin yá.

Jeē ní indichi Jesús nuū junta tēe cácujuhnu ga

(Mt. 26.59-66; Mr. 14.55-64; Jn. 18.19-24)

⁶⁶ Te jeē ní cundijin, te ni candutútú táca tēe jéhnú cándacu jniñu nuū ñayuu hebreo, jíin sūtū cácujuhnu, jíin tēe cástéén tutu ley Yaā Dios. Te cuango de jíin yá nuū junta tēe cácujuhnu ga, te yūcuan ní cacajnūhún de ya:

⁶⁷ Cachi, ¿á máá ró cúu Cristo jeē ní tají Yaā Dios? Achí de.

Te ni cahān yā jíin de:

Vēsú na cáhán rī jeē suu ri cúu, te ni ma candíje cuítí rō.

⁶⁸ Te suni núu cajnūhun máá rí rohó jíináhan ró, te suni ma stió cuíñí rō nuū rī, ni ma siaá rō ruhū. ⁶⁹ Te ruhū, Yaā ní nduu tēe, táca quívi jeē quíji conene ri lado váha máá Yaā iyó poder, achí yá.

⁷⁰ Yūcuán na te ndíhi de ni cacajnūhún de ya:

¿A máá ró cúu Sēhe Yaā Dios núu súcuan?

Te ni cahān yā jíin de:

Suu ri cúu, nájnūhun cácahān rō, achí yá.

⁷¹ Yūcuán na te ni cacahān de:

¿Na testigo gā jíni ñúhún yó núu súcuan? Chi ni cajini sōho yó jíin yuhu máá de jeē cahán ndevāha de jeē cúu de Sēhe Yaā Dios. Achí de jíjnáhan de.

Jeē ní indichi Jesús nuū Pilato

(Mt. 27.1-2, 11-14; Mr. 15.1-5; Jn. 18.28-38)

23

¹ Yūcuán na te ni candocuiñī ndihi de, te cuango de jíin yá nuū Pilato. ² Te yūcuan ní caquejéé de cácahān de cuēchi siquī yā:

Ni canihīn na tēe yáha jēē stónnda de ñayuu siquī tohō. Te cáhán de jeē tú vāha jeē cuāha ná xúhun renta nuū rey nación Roma jeē ndácu jniñu nuū nación na. Te suni cáhán de jeē máá de cúu Cristo, Rey jeē ní tají Yaā Dios. Achí de jíjnáhan de.

³ Yūcuán na te Pilato ni cajnūhún de ya:

¿A máá ró cúu Rey ñayuu hebreo?

Te ni cahān yā:

Suu ri cúu, nájñūhun cáhán rō, achí yá.

⁴ Te ni cahān Pilato jíin sūtū cácujuhnu jíin ñayuu cuehē ún:

Tú ni ññ jñūhun stívi cáhán tēe yáha jēē nihín rī cuēchi siquī de, achí de.

⁵ Te máá de víhyá gā ni cacahān de:

Tēe yáha stónnda ndasí de ñayuu siquī tohō jíin jñūhun stéén de ní Judea. Chi ni quejéé de stéén de nde Galilea, te vijna te nde yāha, achí de.

Jeē ní indichi Jesús nuū Herodes

⁶ Te nuū ní jini sōho Pilato jeē Galilea cácahān, te ni cajnūhún de ñayuu núu tēe región Galilea cúu ya. ⁷ Te nuū ní cacahān ñayuu jeē cúu ya tēe Galilea, te ni ndacu de jniñu jeē na quíngo de jíin yá nuū Herodes, tēe cúu gobernador Galilea. Chi quivī ún suni íne Herodes ñuu

Jerusalén. ⁸ Te nuū ní jito de nuū Jesús, te yōhyo ni cusī ni de, chi je ni cuu cuehē tiempo jeē cuní de coto de nuū yā. Chi ni nihīn de jnūhun ya, te ñūhun ni de jeē sáha ya ñin jniñu jéhu coto de. ⁹ Te ni cajnūhún de ya cuehē jnūhun, te tu ní stío cuñí yā ni ñin jnūhun nuū de. ¹⁰ Te suni cáhiin tāca sūtū cácujuhnu jíin tée cástéén tutu ley, te nihin ni cacahān de cuēchi siquī yā. ¹¹ Yūcuán na te Herodes jíin táca soldado de ni cacahān neé de jíin yá, te ni casácatā de nuū yā, chi ni cachuhun de ya sahma váha luu jeē cúu sahma rey. Te Herodes ni ndacu de jniñu jeē na quínundeca de ya nuū Pilato. ¹² Te máa quívī un ní candumanī jnáhan Pilato jíin Herodes, chi ichi yátá ni caquitī jnáhan ni de.

Jeē ní cundaā jeē cúu yā

(Mt. 27.15-26; Mr. 15.6-15; Jn. 18.39-19.16)

¹³ Yūcuán na te ni cana Pilato tāca sūtū cácujuhnu jíin táca tée cándiso jniñu jíin táca gá ñayuu, ni candutútú.

¹⁴ Te ni cahān de:

Ni caquindeca ró tée yáha núu rī, jeē cácahān rō jeē stónnda de ñayuu siquī tohō. Te je ni stichí rī de, ni cajito jínúu rō. Te tu ní níhín rī ni ñin cuēchi siquī de nájnūhun jeē cácahān rō. ¹⁵ Te ni Herodes, tu ní níhín de, chi ni natají tucu de tēe yáha núu rī. Te tú cuítī ni ñin cuēchi ní sáha de jeē cúu de. ¹⁶ Núu súcuan te na cuáha ri castigo de, te siáá rī de quihīn de, áchí Pilato.

¹⁷ Te íyó costumbre jeē tācá vico pascua siaá Pilato ñin preso jeē cuní ñayuu. ¹⁸ Te ñayuu cuehē ún, inuú-ni ni cacana jee i:

Na cúu tēe jíñá, te siáá ní Barrabás, achí i.

¹⁹ Te Barrabás íne de vecāa siquī jeē ni stónnda de ñayuu siquī tohō ini ñuu ún, te ni jehni de ndīyi. ²⁰ Te Pilato cuní de siáá de Jesús, te ni cahān tucu de jíin ñáyuu. ²¹ Te máa i víhyá gā ni cacana jee i:

Cata caa ní de jicā cruz, na cúu de, áchí i.

²² Te ni cahān tucu de jíin i vuelta unī:

¿Na cuēchi ni sáha de núu súcuan? Tu ní níhín cuiti rī ni ĩn cuēchi siquī de jeē cúu de. Núu súcuan te na cuáha ri castigo de, te siáá rī de quihīn de, áchí Pilato.

²³ Te víhyá gā ni cacana jee ñayuu un, ní cacahān nihin i jeē na cúu yā jicā cruz. Te máá i jíin táca sūtū cácujuhnu, ni cacana jee ndasí i. Te ni cacundeyí i ni cascáhān i Pilato jeē na cúu yā. ²⁴ Yūcuán na te ni ndacu Pilato jniñu jeē na cóo nájnūhun cáconi i. ²⁵ Te ni siaá de tēe jeē ní cajicān i, tēe jeē ĩne vecāa jeē ni stóna de ñayuu siquī tohō te ni jehni de ndīyi. Te ni jēhe de jnūhun jeē na cúu Jesús nájnūhun cáconi i.

Jeē ní cacata caa de ya jicā cruz

(Mt. 27.32-44; Mr. 15.21-32; Jn. 19.17-27)

²⁶ Te cuangoo tācá soldado jíin yá jeē cahni de ya jicā cruz. Te ni canihīn de ĩn tēe ñuu Cirene, nání de Simón, vendiji de jeē ní jēhēn de rancho. Te ni catejniñu de tēe un jeē cóndiso de cruz yā quihīn de yatā yā.

²⁷ Te cuehē ndasí ñayuu ndíquín i yatā yā cuangoo i. Te suni cuehē ñahan cuangoo ña, te cándahyū cohó ña jeē cácuquíhyá ni ña jehē yā. ²⁸ Te ni ndió cóto Jesús nuū ña, te ni cahān yā:

Róhó ñahan Jerusalén jijnáhan ró, ma ndahyú rō jehē rī, chi sa suhva ndahyū rō jehē maá ró jíin jēhē sēhe ró jijnáhan i. ²⁹ Chi quee quivī jeē coo jnūndóho xeēn siquī rō, te cahān rō: Yōhyo ndetū tācá ñahan númá, jíin jēē tu ní scácu sēhe, jíin jēē tu ní cóndeca yiquín, chi tú sēhe ña jeē jnahuhū ni ña jeē ndóho i, achi rō jijnáhan ró. ³⁰ Quivī ún te quejéé ñayuu cahān i jíin táca yucu: Cotúu síquī rī jijnáhan ri návāha cuu rī. Te suni jíin táca loma: Casi siquī rī jijnáhan ri, achi i. ³¹ Chi núu casáha xeēn i jíin rúhū jeē

tú na cuēchi ri, te nagā ni cuu jeē ma cóo xeēn siquī ndihi ñayuu chi íyó cuéchi i. Achí yá.

³² Te suni cuango de jíin úū tēe ni casáha cuēchi xeēn, jeē suni cuu de jíin yá. ³³ Te ni jinūcoo de lugar nuū naní Yiqui Xíní, te yūcuan ní cacata caa de ya jicā cruz. Te suni ni cacata caa de ndindúú tēe ni casáha cuēchi xeēn un núū uū gā cruz, ñin de lado váha ya, te inga de lado jecó yá. ³⁴ Te níni jēe súcuan cúu, te ni cahān Jesús:

Tátā, cone cáhnu ni ni núū de jíinánhan de, chi tu cájini de na vé casáha de, achí yá.

Te soldado un ní casáha de sorteo jeē siquí ndese nihīn ñin ñin de sahma ya. ³⁵ Te cáhīin ñayuu yūcuan, cájito i nuū yā. Te suni nde tēe cándiso jníñu, cácahān catá de cájito de ya:

Núū inga ñayuu ni jnama de, te na jnáma de máá de vijna, te núū ndaā jeē Cristo jeē ní nacāji Yaā Dios cúu de, achí.

³⁶ Te tēcá soldado suni ni casácatā de nuū yā, chi ni quecoo de nde nuū yā, te ni cajēhe de vinagre iyá coho ya. ³⁷ Te cácahān de jíin yá:

Núū máá ró cúu Rey ñayuu hebreo, te na jnáma ró máá ró, achí de.

³⁸ Te suni ni íyo jnūhun jeē ndeé xinī cruz yā jeē cahán na siquī ni jíhī yā, te suhva yósó jíin yuhu griego jíin latín jíin hebreo: Yāha cúu Rey ñayuu hebreo, achí.

³⁹ Te ñin jeē ndindúú tēe ni casáha cuēchi xeēn, jeē cándita caa, ni cahān neé de nuū yā:

Núū máá ró cúu Cristo, te na jnáma ró máá ró te suni jnama ró ndindúú rí, achí de.

⁴⁰ Te inga de ni cahān de nuū jnánhan de:

¿A tu yúhú ró Yaā Dios naún? Chi ñnuú cándoho yó jíin Yaā yáha. ⁴¹ Te máá yó chi vetū-ni cándoho yó, chi yáha

cánihīn yō castigo siquī jniñu néé ní casáha yó. Te Yaā yáha chí tú ni ñin cuēchi ní sáha ya, áhí de.

⁴² Te ni cahān de jíin yá:

Jesús, nucūhun ni ni sáña jeē quéjéé ní ndacu ní jniñu, áhí de.

⁴³ Yūcuán na te ni cahān Jesús jíin de:

Jendaá cahán rī jíin ró jeē víjna te condee rō jíin rí nuū jardín andiví, áhí yá.

Jeē ni jíhī Jesús

(Mt. 27.45-56; Mr. 15.33-41; Jn. 19.28-30)

⁴⁴ Te nuū ní cuu nájnūhun cahuxī uū, te ni cunee ní cáhnu nde cahunī. ⁴⁵ Te ni cujnúú níāndii. Te sahma ndíta caa jeē ndihyú cuarto iī ini templo cáhnu, ni ndatā-ni sava sava. ⁴⁶ Yūcuán na te ni cana jee Jesús:

Tátā, naquihin ní ánuá na, áhí yá.

Te súcuan ni cahān yā, te ni jihī-ni ya.

⁴⁷ Te tēe nación Roma jeē cúu capitán ni jito de jeē súcuan ni cuu, te ni cahān de jeē yóhyo cújéhnu Yaā Dios, te áhí de:

Jendaá ndije jeē tée tú na cuēchi cúu tēe yáha, áhí de.

⁴⁸ Te ndivii ñayuu cáhiin yūcuan ní cajito i tāca jeē ní cuu, te cácani i yīqui jíca i jeē cájnahuhū ni i, te ni nandió cóo i cuanungoo i. ⁴⁹ Te tāca ñáyuu cájini jnáhan jíin yá, jíin tāca ñahan Galilea jeē ní cajica ña jíin yá, cáhiin jíca ña cájito ña tāca jeē ní cuu.

Jeē ní quindūji Jesús

(Mt. 27.57-61; Mr. 15.42-47; Jn. 19.38-42)

⁵⁰ Te ni iyo ñin tēe vāha tēe ndaā, nání de José. Te tēe ñuu Arimatea ndañūū Judea cúu de. Te cúu de jnáhan tāca tēe hebreo cácujuhnu ga jeē casáha junta. ⁵¹ Te ñúhun ni de jeē quiji quivī jeē ndacu Yaā Dios jniñu, te suni tu ní nújnahan ni de jeē ní casándaā junta un jeē cúu Jesús. ⁵² Te

tēe un ní jehēn de nuū Pilato, ni jicān de yiqui cúñu Jesús. ⁵³ Te ni snúu de ya jicā cruz, te ni chusúcún de ya ñin sahma cuitá. Te ni chindūji de ya ini ñin yaū jeē ní caan jicā ñin cava, nuū ná tu quindūji ndīyi. ⁵⁴ Te quiv̄ un cúu quiv̄ casátūhva ñayuu, chi jehíni un quéjéé quiv̄ ndétátú.

⁵⁵ Te ñahan ní quijicoo jíin yá nde Galilea, ni jengoo ña jíin José, te ni cajito vāha ña yaū ún, jíin ndese ni cachindūji de ya. ⁵⁶ Te cuanungoo ña vehe ña, te ni casátūhva ña tǎcá perfume jíin aceite yucū jeén as̄in. Te ni candetátú ña quiv̄ ndétátú, nájnūhun ndácu ley Yaā Dios jniñu.

Jeē ní natecu Jesús

(Mt. 28.1-10; Mr. 16.1-8; Jn. 20.1-10)

24

¹ Te jenéhen ndasí quiv̄ domingo, te ni jinūcoo tucu ñahan un núu ní yindūji Jesús, te cándahá ña tǎcá perfume jíin aceite ni casátūhva ña. Te suni cuangoo sava ga ñahan jíin ña. ² Te nuū ni jínūcoo ña, te ni cajito ña jeē ní cujiyo yuū ndihyú yuyáú ndīyi. ³ Te ni quiv̄nicoo ña yaū ún, te tuá yiqui cúñu Jitoho yō Jesús ni cájito ña. ⁴ Te ni cacunéé ni ña cájito ña jeē tuá ndīyi. Sáa te ni cajito ña uū ndajéhé Yaā Dios jeē cáa nájnūhun tēe, cáhiin ya xiin ña, te cáñūhun ya sahma ndíndēé. ⁵ Te yōhyo ni cayūhú ña, te ni cajexin ña nuū ña nde nuū ñūhun. Te ni cacahān ndajéhé un jíin ña:

¿Naun sa nuū cáyindūji ndīyi cánanducú ró Yaā técu? ⁶ Tuá yā yāhá, chi je ni natecu yā. Te nucūhun ni rō ndese ni cahān yā jíin ró ná íne ga yā región Galilea. ⁷ Chi ni cachi ya jeē maá yá, Yaā ní nduu tēe, cánuú natūu ya nuū tǎca tée cáhiyo cuēchi, jeē jniñ de ya cahni de ya jicā cruz, te nuū uní quiv̄ te natecu yā. Achí ndajéhé un.

⁸ Yūcuán na te ni canucūhun ni ña tāca jnúhun ni cahān Jesús. ⁹ Te ni quendacoo ña nuū ní yindūji ya, te cuanungoo ña. Te ni canacani ña tāca jnúhun yáha núū ndihúxí ñn apóstol jíin núū tāca gá de. ¹⁰ Te ñahan ní canacani jnúhun yáha núū tée cácuu apóstol, cúu ña María ñuu Magdala, jíin Juana, jíin María naná Jacobo, jíin sava ga ña. ¹¹ Te tācá apóstol chi cájeni ni de jeē jnúhun cánée cáñúú cácahān ña, te tu ní cácanđije de.

¹² Te vēsú súcuan, te Pedro ni quenda de, te jínu de cuacondēhé de nuū ní yindūji ya. Te ni jito nihni de ini yaū, te ni jito de jeē sahma cuitá un cáyūcu máá na. Te cuanuhun de vehe de, te nahán náā ni de jeē ní jito de jeē tuá yā.

*Jeē ní ndajnúhun yá jíin úū de ichi cuáhán Emaús
(Mr. 16.12-13)*

¹³ Te suu quivī un cuángoo uū jnáhan de ñn ñuu naní Emaús, jeē jíca nájnūhun uxī ñn kilómetro jíin ñuu Jerusalén. ¹⁴ Te cándajnúhún de síquī tācá jniñu jeē ní cuu ún. ¹⁵ Te níiní cándajnúhún de te cácajnūhun jnáhan de, te máá Jesús ni cuyajni ya yatā de, te jíca ya cuahān yā jíin de. ¹⁶ Te ni sáha jíin de jeē tu ní cánacuni de ya, vēsú cájito de nuū yā. ¹⁷ Te ni cajnúhun yá de:

¿Na jnúhun cándajnúhun ró cájica ró? ¿Te najehē cácuuíhyá ni rō? Achí yá.

¹⁸ Te ñn de jeē naní Cleofas ni cahān de jíin yá:

Nđihi cuiti ñayuu cájini i tācá jniñu ní cuu ini ñuu Jerusalén tāca quívī yáha. ¿Te á máñúhún-ni níhín cúu jeē ní quee ní ñuu un jéē tu jíiní ni na vé ni cuu? Achí de.

¹⁹ Te ni cajnúhun yá de:

¿Te na vé ni cuu? Achí yá.

Te ni cacahān de jíin yá:

Jeē ní ndoho Jesús ñuu Nazaret, Yaā ní nacani jnūhun Yaā Dios. Te jíin poder Yaā Dios ni sáha ya tācá jniñu jéhnú te ni nacani ya jnūhun, jíto jíinúu Yaā Dios jíin táca ñáyuu. ²⁰ Te sutū cácujehnú jíin téé cándiso jniñu nuū ná, ni canastúu de ya nuū tāca téé Roma, te téé un ní casándaā de jeē cúu yā jicā cruz. ²¹ Te máá ná ní cañūhun ni na jéē máá yá jnama ya nación na Israel nuū ñáyuu Roma nuú. Te siquī tācá jniñu yáha, te ni cane inga jnūhun. Chi vijna je íyó únī quivī jeē ní cuu ún. ²² Te sava ñahan cájini jnáhan ná jíin, ni canacani ña ñin jnūhun jeē yóhoyo cánaa ni na sáha, chi cácahān ña jeē ní natecu yā. Chi jenéhen ndasí ní jengoo ña yaū ndīyī ún. ²³ Te tuá ni cájito ña yiqui cúñu yā. Te ni ndecoo ña nuū na jíináhan ná, te cácahān ña jeē ní cajito ña jeē ní canecoo ndajéhé Yaā Dios nuū ña, te ni cacahān jeē ní natecu Jesús. ²⁴ Te ni jengoo sava jnáhan ná ndé yaū ndīyī ún, te ni cajito de jeē súcuan íyó, nájnūhun ni cacahān ñahan ún, te tu ní cájito cuítī de nuū yā.

²⁵ Yūcuán na te ni cahān máá yá jíin de:

Téé tu cájecūhun cuítī ni cácuu ró. Yóhoyo uhū cá-candíje ró táca jnúhun Cristo ni cacahān téé ni canacani jnūhun Yaā Dios nde jenahán. ²⁶ ¿Te á tu súcuan ní jíini ñúhún ndoho Cristo táca jnúndóho yáha, te sáá te quinuhun yā nuū lúu cujéhnú ya? Achí yá.

²⁷ Te ni nacani cájí yá táca jnúhun jeē yosó núú tútu íi jeē cahán siquī máá yá. Te ni quejéé yá jíin jnúhun ni tee Moisés, te ni cahān gā yā táca jnúhun jeē ní catee téé ni canacani jnūhun ya nde jenahán.

²⁸ Te nuū ni jíinúcoo de ñuu nuū cuángoo de ún, te Jesús ni sáha ya jeē cáca ga yā quihīn yā. ²⁹ Te máá de ni castétu de ya, ni cacahān de jíin yá:

Ndōo ní vehe ná, chi je ni ini te je yajni cuaa, áchí de.

Yūcuán na te ni quīvi ya jeē quéndōo ya jíin de. ³⁰ Te nuū ní cucōo ya mesa jeē cáji yā jíin de jíjnáhan de, te ni quihin ya staā, te ni jicān tahu yā, te ni tahu cuéchi yá, te ni jēhe ya nuū de. ³¹ Te jeē sáha ya súcuan, te nájnuhun ni cananune tinūú de, te ni canacuni de ya. Te ni ndoñúhún-ni ya nuū de cuahān yā. ³² Te ni cacahān maá de:

Jendaá jeē yóhoyo ni cacusiñ ni yō ná ni nacani ya jnuhun nuū yō ichi ún te ni castūhun cáji yá jnuhun cáhán tutu iī. Achí de.

³³ Yūcuán na te yachī ni canaquihin de ichi, ni canandicó de cuanungoo de ñuu Jerusalén. Te ni cana-jnáhan de jíin ndihúxí ñn ga apóstol, cáyūcu tútú de jíin sava ga jnáhan de. ³⁴ Te ni cacahān tēe cáyūcu tútú un:

Jendaá ndije jeē ní natecu maá Jítoho yō, te ni nane ndijin yā nuū Simón, achí de jíjnáhan de.

³⁵ Yūcuán na te ndindúú tēe un ní canacani de jnuhun ndese ni najnáhan ya jíin de ichi, jíin ndese ni canacuni de ya ná ni tahu cuéchi yá staā.

*Jeē ní nane ya nuū tēe cáscuáha jíin yá
(Mt. 28.16-20; Mr. 16.14-18; Jn. 20.19-23)*

³⁶ Te sá cácahān gā de tāca jnúhun yáha, te ni jecuiññ-ni Jesús mēhñú de jíjnáhan de. Te ni cahān yā jíin de:

Ndeyí sñ coo ni rō jijnáhan ró, achí yá.

³⁷ Te ni candacoto iyo de, ni cayūhú ndasí de, chi ni cajeni ni de jeē ñn ánuá cúu ya. ³⁸ Te ni cahān yā jíin de:

¿Naun cáyūhu ró, te naun cájeni siquí ni rō súcuan?

³⁹ Condēhé ndaha ri jíin jéhē rī, te cuni rō jeē maá rí cúu. Jññ ruhū te cuni rō, chi ñn ánuá tu névāha cūñu ni yiqui nájnuhun cájito ró jēē névāha máá rí, achí yá.

⁴⁰ Te jeē ni cáhān yā súcuan, te ni steén yā ndaha ya jehē yā nuū ni yññi ndūyu cāa. ⁴¹ Te yóhoyo ni cacusiñ ni de, te

cánaa ni de. Te vēsú súcuan te ná tu candíje vāha vāha de jeē maá yá cúu. Te ni cahān yā jíin de:

¿A cánevāha ró jecu jeē cáji rī yāhá? áchí yá.

⁴² Yūcuán na te ni cajēhe de ĩn pedazo chācá ní tau nuū yā, jíin ĩn pedazo ñahmā ndūxi yocō. ⁴³ Te ni quihin ya, te ni yeji yā nuū de jíjnáhan de. ⁴⁴ Te ni cahān yā jíin de:

Tāca jēē ní cuu jíin rí cúu jeē ni cáhān rī ná ni ine ri jíin ró jíjnáhan ró ndé saá, jeē cánuú squícu tāca jnūhun ri jeē yosó núu tútu ley Moisés, jíin núu tācá tutu tēe ni canacani jnūhun Yaā Dios, jíin núu tútu salmo, achí yá.

⁴⁵ Te ni nune ya jeē níjnūnī de, návāha cuu jecūhun ni de tāca jēē cahán tutu ĩ. ⁴⁶ Te ni cahān yā:

Súcuan cáhān nuū tútu jeē ruhū Cristo, cánuú cuu rī, te nuū uní quivī natecu rī. ⁴⁷ Te cuitē núu jnūhun ri jeē cánuú nacani ni ñayuu jeē stóo i cuēchi i, te cone cáhnu ni Yaā Dios nuū i. Te ñuu Jerusalén quejéé cuitē núu jnūhun yáha, te quihīn nuū ñayuu tācá nación. ⁴⁸ Te máá ró cácuu tēe nacani jnūhun tācá jniñu ní cajito ró. ⁴⁹ Te tají rí Espíritu Santo quiji ya nuū rō jíjnáhan ró, nájnūhun ni jejnūhun Tátá rī. Te na quéndōo ró ñuu Jerusalén condetu ró ndé nihīn rō poder Espíritu Santo jeē quíji nde andiví. Achí yá.

Jeē ní ndaa ya cuanuhun yā andiví

(Mr. 16.19-20)

⁵⁰ Yūcuán na te ni quenda ya ñuu Jerusalén, cuahān yā nde ñuu Betania jíin de jíjnáhan de. Te ni ndonehen ya ndíndúú ndaha ya, te ni jícān tahu yā jehē de. ⁵¹ Te níin jícān tahu yā jehē de, te ni cujiyo-ni ya nuū de, ni ndaa ya cuanuhun yā andiví. ⁵² Te máá de ni cachiñúhún de ya. Te sáá te cuanungoo de ñuu Jerusalén, te yōhyo cácusī ni de. ⁵³ Te níin cáhīn de ini templo cáhnu, cánacuatáhu de nuū Yaā Dios. Te ni cuu. Amén.

Nuevo Testamento en mixteco

New Testament in Mixtec, Atatláhuca (MX:mib:Mixtec, Atatláhuca)
copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
